



PL
2718
.I95



Digitized by the Internet Archive
in 2009 with funding from
Ontario Council of University Libraries



YORK UNIVERSITY

JUL 03 2001

EAST ASIAN STUDIES

食古齋詩錄

姚孟起書



食古齋文錄序

嘉興陳震澤書

五月二十三日余眎子屏病子屏之病莊子所謂兀者也至榻前強起趺坐告余曰昨芸舫來索詩古文彙付梓編校之事將以累子雖然詩可刻文不可刻也我邑自張氏鱸江鐵甫淵甫以通經碩儒相繼爲古文辭而沈南一陳子松兩先生受桐城義法於婁姚春木氏三張氏我不及見及見兩先生以詩就正亦以孺子爲可教方應京兆試未遑請益也後獲交於青浦熊君純叔始稍稍爲之家貧客授精力半耗於舉業倦而思返年將四十矣夫言水也氣浮沕也氣盛則言之短長與聲之高下皆宜我體孱氣怯而所養又不逮古人遠甚構一文輒數日病

以是不多作婁姚氏始好駢儷三十後爲古文猶自謂晚學況
晚而病病不竟學乎余曰昔班孟堅志漢藝文諸家著錄者或
百數十篇或數十篇或僅一二篇及觀晉中經簿百數十篇與
數十篇者已不盡傳而一二篇者或至今猶傳文之傳不傳命
也而足傳與否則視乎其人豈以多少論哉子屏曰文有體焉
姚姬傳氏纂古文辭爲類十三曾文正公增損爲十一以備體
也我少丁喪亂長涉憂患旣不能馳驅戎馬磨盾草檄又不獲
紀功述德潤色中興而模山範水之作病廢不復能遊故體不
備余曰世固有哀然大集譬之優孟登場衣冠具而哀樂不真
子之文兀者之文也闔跂支離無朕之悅衛靈公也靈公悅之

而視全人其脰肩肩夫體莫備於優孟登場莫不備於闐跂支
離無脰自知文者視之孰備乎孰不備乎子屏曰兀者之視喪
其足猶遺土也方以文字爲贅疣奚刻爲余曰果爾德充符矣
子之文可以傳矣旣論子屏詩芸舫復以其文屬校於是距子
屏之卒將兩月矣追憶榻前問答語次爲序光緒壬辰同邑凌
泗撰

柳君子屏家傳

吳江費延釐

君諱以菴字价人號子屏晚號弢廬其先由慈谿遷吳江遂著籍焉曾祖球祖太學生夢祥潛德勿耀父清源積學工詩爲郭頻伽先生所稱賞君少而岐嶷擽染家學年未冠補縣學生爲文用意高遠力追先正視世俗所爲時文蔑如也旣念親老非科舉無由進嘗一試京兆再應省試皆不利二親先後歿君慨然曰學豈爲干祿計耶雖得之如親不逮養何於是絕意仕進敦行力學以古人自期數年中爲祖父營窀穸爲弟妹畢婚嫁雖甚窶艱莫不就理以遺產讓兩弟而已授徒自給平生不妄受人一錢其廉介蓋天性也君少好爲詩中年後兼爲古文自

言於文用力淺朱敢自信然下筆不苟使假之年必斬至於古
所居分湖湄中年多病閉門苦吟所爲詩清微澹遠渺意澄思
天人消息之幾與身世變遷之故一一於靜中得之終身坎坷
且無子世幾謂天道之茫苒而君未嘗有幾微愠悔也晚年主
講切問書院弟子高第者秀水沈成章元和陶惟坻尤著卒年
五十有八著有食古齋詩文錄病亟出以授余兼屬凌君磬生
編定今將刊行以慰其志云

費廷釐曰余與君訂交於鹿城試寓時年皆二十餘君爲同邑
沈南一陳子松兩先生所心許有國士之目旣而兩先生沒君
哭之以詩今閱三十年而余又哭君遇不遇奚足論繼兩先生

而傳者舍君其誰寧獨爲逝者痛耶

柳君价人墓表

長洲諸福坤

性情同精氣同而或者其生也如拘其死也如蛻卒克邁等夷
式來者自古賢俊之異於人類然則其自異之也歟天異之
也歟吾於故友柳君之亡反覆而得其說矣君吳江人諱以蕃
字价人號子屏晚號韜廬曾祖諱球國學生祖諱夢祥國學生
父諱清源優廩生世有潛德清源以詩鳴世號松琴先生生三
子君其伯幼承家學姿性穎異奏筆驚其座未弱冠遊學宮以
附貢生試北闈闈中友某病君調護之幾不克試旣而罷歸遭
粵寇亂有薦之制軍某某不之異君拂衣去某卒敗當是時君
名四震意氣亦豪甚顧不得展所學所居分湖大港地僻避難

來者皆一時魁傑士相與跌蕩詩酒間或歌或泣人不知也旋
宅父母憂丁家中落營葬先世撫仲季授室入郡邑庠以次歸
其妹百計艱窘客授以資之赴省試屢薦弗登然是時掇科目
者咸服君文也君爲人碩身廣頰曰炯如電談唾清雄未嘗有
愠色先後知交鄉先生若陳子松壽熊沈南一曰富同時若吳
望雲仁傑費吉甫延慶芸舫延釐李詠裳葆恩辛垞齡壽張元
之文璿凌磬生泗礪生淦秀水沈蒙叔景修青浦熊純叔其英
後輩若秀水沈達卿成章元和陶小沚惟坻罔弗心折於君年
四十髮禿露其巔仲卒鬱傷得腹疾畏風因是蟄居且十年以
筆札自遣爲文縝密高雅宗桐城姚氏鼐詩追逐蘇黃二家雄

處入韓要其藻采返素鞭迫心光使四迸而不露則詩文一也
以病故通軒岐奧旨主講切問書院稱得士最後詩益超詣疾
益甚朋輩起居信宿酣談君雖憊必款洽周至予時往訪望其
氣瘁則惕澤則愉非獨予也君見予色亦然非獨於予也蓋其
睦其嫻無弗篤也其任其恤無弗摯也亦非獨予言之也而君
卒以鬱傷死矣配黃氏先卒顧氏無子遺一女君病亟期月不
安寐攣其足將卒十日不食以此厄君人輒不平於天雖然良
玉堅金不際湛羶不可得而寶瑰材碩德不挫困窮不可得而
仰若君之行足以厚性情文足以綿精氣無間於並時後世者
於已礪之於天成之宜其有異於世之所逢者也生道光十五

年九月十四日卒光緒十八年閏六月八日年五十有八十月
十日葬邑之廿九都西房圩君嘗訣子曰愿有述述君之所以
異者揭諸其墓十二月朔友弟諸福坤表

祭文

秀水沈成章

維光緒十八年冬十二月朔門下士沈成章謹以瓣香清酌致
祭於弢廬柳先生之靈烏乎我之生也蓋晚未見師之盛年惟
風聲與氣烈久籍甚而流傳側聞之而竊歎想頭角之嶄焉及
東來而上謁幸親炙於書壇語絮絮以若嫗頭童童而欲禪微
耳熟於疇昔又殊謂其不然知半生之學養由英傑而聖賢譬
金玉之渾璞盡圭角而磨研雖多方以仰測終莫名其真筌師
亦假以辭色目奇才而裾牽示承學之大較期毋溺於俗詮惜
有用之口力屏無益之丹鉛退自維乎孤苦畊一研以爲田勉
窺竊乎故紙挹涓滴而遺淵乃人棄而不棄師或謬乎衡銓第

勿孤茲盛心亦以補夫前譽羗途長而力弱動靜失其節宣炎
五志之壯火攢百感而交煎仍踵門而求理庶國手之能痊飲
太和之元氣授七發之妙篇亮文章而司命惟我師之兼權我
貞疾之未已師美疢而亦纏豈畏風而簡出筋力衰而日股抑
鬱居而唸苦神思灼而妨眠從羣公以權訪宿吟館而床聯張
縱橫之譚陣翼左右而必堅叱風雲於百代幹冬春於三椽泊
十盪而十決迭勝負而未竣鼓風舉之逸興羨諸老之若僊我
二人之不拒實天棣之相憐嗟我辰兮安在春暉儵其不延痛
屬纊之未親空見星而西還師亦聞而動色哀鮮民之不天馳
尺素以遙唁兼藥石與策鞭謂人子之大義在啟後而承先業

羸軀之莫保恐滅性之爲偏緬送終於我昔亦缺陷之難填尙
有責於服闋勿息壞之在前守茲訓以視息歎寒賈而暑遷期
母喪之勉終又師館之遽捐將執禮於北面胡葵哲於重泉憶
去冬之問疾侍臥榻以留連值沈痾之小愈情惻愴而纏綿屬
衡文之越代勞請禱之往還復執手而深語倘僕病之能全期
與子乎卜鄰喬禊湖而受廬數晨夕於斗室共風雨於一編曾
斯言之在耳忽睽焉而涕漣繫吾師之學行及境遇之迍邐在
立言之執友旣大書而銘鐫獨請業之私誼載十三而拳拳師
再作而不可云從誰以周旋托招魂而長慟假絮酒以明虔靈
有知而降鑒儻愀歎乎几筵

哭柳子屏六首

秀水

沈景修

歐齋

斯人窮到死天道竟如何病骨支離叟名心春夢婆門楣撐獨木身世入悲歌蠶老絲難盡情猶繫女蘿

屈指論交日曹騰過卅年瘦腰比春柳冥想入秋烟骨肉辭柯葉功名逆水船曉風殘月岸揮淚灑屯田

憶昔西冷夜湖樓共短檠平泉今廢址舊雨早歸耕私定門生諡清題處士旌榻前聞苦語淒絕故人情

嗣續中年感千鈞繫一絲終身應有恨弱弟況無兒扶病謀窀穸經旬斷粥糜九原當破涕或不類生時

吉甫先朝露匏齋又賁星朋交相代謝吾道益伶仃蒿里悲風

曲藤陰夜雨聽人琴增我痛吟館忍重經
敬禮遺編定知君慰夜臺人生纔夢覺佛說此輪迴情誼潭千
尺文章土一坏高山今已矣撫軫不勝哀

古齋文錄

吳江 柳以蕃 价人

謹書先君子諭兒帖後

諭兒帖二十八條先君子於道光己酉年手錄以授不肖者也其言間採古人格言又益以先君子平昔所恆言自立身行己倫常大端以至日用纖悉之事無弗備竟其量雖賢哲猶難之循其程中智以下皆可勉焉不肖愚鈍無似顧幼稟庭誥頗知競守二十歲後惑於時名陷溺於章句矜心客氣望道寢遠矣今鮮民也追念提命渺不可聞爰卽此冊之塵存者乞費君履綏端錄一通謹置座隅倘循是以往日繩月檢以稍補向者之

食古齋文集
卷之六
訃幸也否則將終其身於愧疚中矣悲夫

書熊純叔撰先君子墓誌銘後

先君子葬於同治壬戌既十年未有所以識於葬者夫並吾之
世卽吾所曾相識之人非無一二鉅公能以文章自鳴而於不
肖子顯揚其親之心若有待焉既而納交於青浦熊君純叔篤
厚文行君子也於是謹致向所爲先君子狀請銘於君君讓不
獲乃諾其後五年君往賑豫省荒以勤事死豫之人爲祠以祀
私諡惠愍先生夫以一諸生之所爲而義振天下死亦榮矣特
憾並吾之世欲再覲篤厚文行如熊君者蓋弗可得然則吾先
君子之及銘於君不可謂非幸而遇其人矣今將勒文家乘埒

書於後

任一清詩序

詩之爲境多矣其上者清靈寥遠夔絕世表如餐霞飲露令人
不復作人間想者吾求之久而未有以遇然或縱橫排奐不事
雕飾抗然欲追韓杜而從之遊所見亦鮮焉吾邑任先生一清
志韓杜之言者也所爲詩多傷時弔古及闡揚貞烈之作長歌
大句意氣勃勃雖未知於韓杜何如而一切庸音曼響盪滌殆
盡矣顧先生名不出鄉里既不願與當世稱詩者通往來而世
亦罕知其詩常獨行閭巷間聽時政之得失考國俗之盛衰與
夫遭亂後耳聞躬際之事變意有所激輒會而鳴之於詩而先

生亦遂以詩老矣今年春其從子友濂將刊行先生遺詩而屬以蕃以釐訂之役既爲刪存如千首并論之如此友濂深於詩者也其以所言爲何如

黃子眉侍御時藝序

余與子眉少相識顧子眉家鶯湖余居分湖相隔二三十里不數數見咸豐戊午同入都應京兆試又同館舍相與篝燈談藝酣恣不厭時京師中墨冊別有所謂風氣者余爲之久而未有以似子眉則一變而儼然京師之文也是年同下第余出都子眉旋仕爲戶部員外郎觀政之暇與四方士大夫能文者遊所資益廣而爲文亦益工辛酉舉順天鄉試累赴春官不第其後

以郎中入直軍機處復轉御史官資物望溟溟光大矣而余
自戊午出都後連蹇不遇不復再至京師鄉之人自都來者爲
言子眉雍容赴職克稱華選余方歎其進用之未可量乃未幾
而倦於仕宦棄官歸矣頃者訪余於分湖之廬握手道故回憶
曩昔在京時游處之樂志氣之壯忽忽二十餘年余衰羸多病
方屏居江濱田間以自息子眉意氣亦不如故俯仰身世多可
慨者而因念其時相從譚譙之人或出或處遽已零落過半而
余兩人猶得歡然相見於顛髮頽白時則又爲之輟然以喜臨
別出所爲時文一編示余曰區區者不足齒顧少壯精力頗瘁
於是子爲我序之昔方望溪侍郎有言曰士果得行其志無所

爲書子眉歸田甫兩年遽思託於文字語言以自見自是將不復出矣乎雖然古今學問之事惟淡於外慕者乃能入之而益深繼白今子眉以寬閒之日月徜徉乎煙波佳秀之地優游涵演發憤著書吾知異日之必更有以示我矣姑以時文爲發端可爾

送李詠裳孝廉之宿遷校官序

以一官而居數年之久苟竭其心力爲之尙何患教之不行哉顧世往往鄙其官爲無足爲卽爲之其自處亦在閒曹冗吏之間庸碌者羈靡于升斗狠鄙者壘斷于庠序求所爲振風俗植人材之道卒無一二之可聞焉嗚呼學校之不振豈非司教者

之不舉其職與吾友李君詠裳爲邑中名孝廉旣累試春官不
中第以大挑得教諭職選宿遷人方憾其所就之隘而君顧不
以爲無足爲行有口矣宿于春秋爲鍾吾子國秦改下相項羽
生焉北魏齊梁之朝代有戰爭故其民剽健而善武其俗强悍
而好鬪然秉性忱直忠義奮發之氣亦時時呈露于其間而士
之習于其鄉者文采或簡樸誠未漓顧以兵燹之後弦誦久廢
或無所藉以陶鑄其氣質誠得醇行之師擴之以典籍申之以
條約俾中材之士有所稟法而有志振拔者且自奮于蒼涼艱
苦之中以成就其業則所謂振風俗植人材孰有大于是者邪
抑余更有說焉宿爲東南要區負高山大川之雄勝君子文酒

之暇與都人士登臨縱目覽黃運二河之流眺崑崙馬陵之崗
麓巍乎浩乎皆足以恢廓其志氣退而徘徊訪古瞻拜魏忠壯
公之祠爲之一發其慷慨吾知是行也必益有以壯君之才者
則君之有資于宿與宿人之資君又無以異也爰書此爲贈并
以風世之浮沈于其官者

諸先生壽序

光緒丁亥爲穎村諸丈翰香先生與其配徐太君七十雙壽之
歲其子元簡寓書於余曰福坤家貧無能廣賓客稱觴以壽吾
親因爲書徧告徒友間丐求歌詩爲老人光悅願吾子爲之文
夫余之文何足爲先生重顧與元簡交且厚又嘗敬晞先生之

光儀遂濡筆而申其所欲言憶余之初識元簡也於金陵試寓
聆其言絕異之然未相習也其後元簡來館余從父蒔庵先生
家距余居僅三里常常櫂小舟往來窮日夜深語歲終積手書
動盈寸元簡之性情志趣文章藝術余既稔知之矣而獨未一
得見先生然以元簡之才且賢又數側聞其稱述家庭之辭輒
時時慕思先生之爲人先生秉節高介不牽於世俗榮利之慕
少躬艱貧仍歲客授斗室中坐六七童子口講手示時於其間
讀書作畫充然自怡壹不問家中有無羸紬徐太君昕宵殫職
黽勉輔相以紓生理之隘元簡年十七亦出爲童蒙師旣壯學
成遠近禮延歲脩足以寧其室而先生始得優游退休於家規

小園一畝許藝蘭種菊雜時蔬果與太君周行省覽玩心於時
候節物之化用以慰衰齡而娛殽寔而比歲元簡亦且棄館歸
養賣藥以助甘毳每當園葩獻新風日嫿美奉公姥飲酒譙笑
愉愉悵悵二老人相顧色喜暢然不知人世之更有何樂者夫
若是宜其壽爾抑余聞潁村之鄉右襟蜺江左枕沈龍湖湖挹
澱山風濤雲樹曠蕩縹緲之致彌望無際而廬村數十家咸務
耕多諸氏族姓桑麻雞犬環溪相接也良辰佳日先生夫婦扶
杖觀游而子孫娛侍於其側鄉之垂髫黃髮迎巾屢慰問笑語
如在武陵桃源中則其樂又有得於頤養之外而將陶陶焉進
於無窮量之壽也歟

鬻田記

光緒二年七月柳子鬻浙江嘉善縣田百八十畝有奇自是業他邑者無一壟之存旣而客有諭其故而難之曰子孫之于祖父田產也如守墳墓祭器效死弗去卽去矣必有說焉以處此先儒楊園張子之訓曰夫人爲祖宗之故不得已而廢業可也否則水火盜賊出于不意猶可也若乃賦役凶災婚姻疾病已不宜廢矣況無事乎今子當室十八年寇亂之中畢父母之喪舉祖考以下葬斃矣繼是而婚嫁死喪之事又至七八舉所費繁重矣而皆隱約不敢廢先人之業間者之鬻奚以爲柳子曰是也然有說也人之欲恆產曰以贍衣食耳今余所業嘉善之

田界胥塘陶莊二鎮間陶莊地較樸隸耕者守常業無故猶樂輸其租而胥塘風氣浮惰農事失職又地尙陶陶之利倍耕田多棄田而歸間募人墾種歲輸米一二斗三五升而已而是時官暴吏橫催苛百端荒田亦科歛如額稍弗應則移而勒償于熟田之佃瓜分豆剖及于業者無三之一焉夫以取諸佃若彼而應之官若此尙何衣食之足贍哉衣食之不贍而奚以爲守哉雖然恆產之不可廢久矣自今以後余將補良田于先人之鄉甯沃毋磽甯約毋多量其歲入以供賓寮弦誦之資夫亦楊園之訓也客曰善旣退遂次其語爲鬻田記

少甫俞先生家傳

俞先生諱岳字子駿一字少甫晚自號止齋老人震澤人祖某父景有隱惠先生生而穎異讀書數過卽成誦工楷法得汪文升大意年二十三受知于陳侍郎希曾補諸生越三年廩于學名日起與朱水部榆葉明經廷琯陸學博嵩徐茂才晉銘輩交諸君皆以詩古文詞稱于時每見必通究其藝而尤長于畫嘗從崑山王國簿學浩游盡得其傳而變化之一時聲譽噪甚遠近士大夫走書幣造請者相次不絕零星尺幅流傳於外者爭相藏弄以爲貴道光戊子應順天鄉試入都長安貴人慕先生畫無不各手一縑以請先生信筆揮灑未嘗求工而並時之以畫稱京師者戴侍郎熙外卒無一人過先生也旣報罷以太公

春秋高束裝遽歸是時先生旣連試不見收急於祿養乃援例爲校官故事校官謁選先試於大吏大吏採其合格者以充額時侯官林文忠方撫吳見先生文激賞不寅擢高等每進謁款接甚慤並數徵先生畫曰畫藝也如子之潔身高行實有得於畫之外者則畫非藝矣先生遂有生平知己之言尋攝溧陽丹陽宜興學篆教諸生一以道義爲重月課爲捐俸資膏火故所至皆有聲咸豐癸丑攝太倉州學篆八月青浦土寇周立春爲亂將撲城先生驅妻子匿窮鄉自乃正衣冠北向再拜作絕命詞一律城破誓投泮水以殉俄傳州守蔡侯開城擊賊斃賊數百人城賴以保而先生得無死嗚呼其始之必以死誓者義不

可無死也其繼之不輕一死者義可以無死也觀此而先生之志可見矣明年俸滿歸遂一意杜門居所謂笠東草堂者蒔花藝木圍棊投壺暇則治酒饌招里中諸故人與風雅士之宦斯土者引觴賦詩意氣豪劇而先生亦既老矣庚申春粵賊南犯蘇常陷吳江尋失守先生避居東鄉之蘆墟鎮其時田疇荒穢家無積儲老弱四五口舉仰先生以食中間又喪其嗣子不得已賣盡取活而局促闔巷無幾人能知之者其真知之者皆力不足以贍先生蓋至是而不免有饑寒之憂巡撫薛公先生舊交也方移軍滬上戎馬之暇大會東南名士累書招先生先生自揣癯老不復能隨人走趨然環顧內地數百里狂寇沟沟且

夕且不保遂以家往明年賊平又明年爲嘉定校官閱數月里
中人有自嘉定來者言先生抱恙方劇並述其到官後經行盛
暑中與邑人士謀建文廟整葺陸清獻公所立當湖書院事甫
訖會奉特命補行江南鄉試倥傯間爲諸生訂冊籍治文書日
夜不少休迨試者行而先生已病篤矣已而訃果至悲夫先生
長身玉立偉鬚髯巾服整潔如畫性儻爽不問家人生產好贍
賓客蓄古器物及名人書畫雖傾其所有不吝爲人有至行少
失恃事太公以孝聞太公歿撫弟妹甚力與人交能委曲隨分
然亦未嘗詭隨善談先輩軼事纒纒數百言皆動聽自先生歿
而松陵之故老盡矣先生生於乾隆五十六年正月初九日其

卒於嘉定學任爲同治三年十二月朔日年七十有四配朱孺人無子嗣子二爾穀前卒爾幹太學生女三皆朱出長適王嘉燕次適費延慶次適王樹芝孫四人曾孫一人著有笠東草堂詩若干卷未刊撰先生事乞傳者延慶也

柳以蕃曰余自束髮卽聞俞先生畫名後十年延慶爲余言先生事甚悉比交先生益知其深蓋慷慨好義節君子也獨怪夫世之論先生者輒斤斤稱說其畫其名至鄉曲委巷無不傳而所謂慷慨好義節之風則余之外罕有知焉嗚呼觀太倉一事可以得其概矣

費君吉甫家傳

光緒九年二月二十四日國子監學正費君吉甫卒于家先十日君疾發驟劇弟中允君延釐在京師親舊聞耗視君疾者皆惶愕相向曰其殆矣然以天之道必無他已而益篤其友吳祭酒仁傑至手疏爭於城隍謂君必不可死及歿邑人士奔走會弔有哭失聲者而其他之不夙習於君者亦太息曰今而後吾邑無長者嗚呼以一士而感動於人人之心若此非君子而能庶幾乎君諱延慶字善鈞吉甫其號世家吳江城曾祖諱振勳刑科掌印給事中祖諱蘭墀翰林院編修父諱元鎔舉人爲安徽休甯縣學訓導君爲人恭勤慈惠尤篤於內修旣少孤事母梁太恭人甚孝非事外事及赴試未嘗不在母側在側未嘗不

作孺子容以是終母身君長中允君一歲兄弟至相愛自幼訖壯數十年雖離合殊致而心肫肫無毫髮異兒時見者以爲難能平生治學多心得爲文章粹然有根柢同治三年以拔貢生舉順天鄉試連赴會試不第而是時君弟方以翰林嚮用君念門第有繼者遂一意退理家政其大要主於刻己以省財薄佃租以恤農力論者謂君之處家寬厚一如訓導公而儉約則兼守梁太恭人規法云君旣修其門內而施於鄉者甚博兵燹以後邑有舉罔不會君在其事君所在事自有司及同列罔不信且服故於功罔不成厥後亦罔不善而君退然若無能泯然若不見其有勞人益欽君而事之屬君者滋益多先世故以爲善

著於鄉道光癸未大水後編修公倡舉仁善局月俵米餼獨
者世爲常及君而鄉俗重困歲有埤額其他義舉之及見聞者
無艱易必力成之且時或陰全曲濟而人不能言其德觀君者
率以此多君而不知平日之隆於宗族誼於親戚忠信於朋友
而根極於孝友也其源有自嗚呼可謂君子也已以蕃善君久
得於君者微每見君必深語溫溫愉愉能厚人意氣退而益令
人深思先是君嘗避兵來予村村中人見君行大感君仁孝至
今亦樂道君事不稍衰君生道光十四年三月卒年五十配俞
恭人嗣子樹達樹蔚女二長適徐文藻次字予從子念曾君之
歿也中介君解官歸執喪甚哀踰年而葬復狀事行乞黃岡洪

侍御詔墓而以家傳屬以蕃夫稱述朋友之善以詔其後於義應爾惜以蕃非其人也然不敢辭謹傳

論曰昔歐陽永叔作瀧岡阡表曰爲善無不報而王介甫氏之祭張安國則曰善不必福久矣何二說之不相合而皆若有定據哉不知由前之說理之正者也由後之說數之變者也衰世以來理常不勝數報常與施反如君者非其一與雖然天旣不祐於盛德安知鬱而發者之不將有待於後耶是又在樹達兄弟之能自勉而已

沈君菊裳家傳

君諱文鵠字廷和號菊裳浙江秀水縣諸生先世自歸安竹墩

遷縣之北鄉項家厓父太學生坤南有子三長文鴻季文鵬仲
卽君太學君客德清時所生也少俊異族父鴻年廣文至愛之
因受業焉業成入應鄉試卒不舉太學君以服賈德清豪於貲
後客武康簞頭市君就塾德清時徒步往省復客德清自家
往省亦如之或構於其兄兄中其言寢疎之後兄在德清疽發
腐氣彌室子婦莫之近君躬伺左右洎扶以歸兄顧而歎曰吾
今而知兄弟骨肉也中年鄉居尙義歲歉私賙公輸金粟弗惜
咸豐庚中寇警項家厓黎里鎮黎里方設團卒爲衛君發困
給甿與爲犄角未幾賊躡黎里四鄉不逞之徒乘機擄劫君於
是子身走上海時湖州趙忠節公方力扼孤城君介人書將往

贊其軍聞城陷歎曰我憾不之先也中竄德清居族弟養之家
相驚寇至君掖幼子成章走亂山中不數里望見養之提其子
率且急將仆慨然曰我已育子遂棄置成章崖谷徑負其子迨
返成章猶在乃挈歸養之廣文子也賊平還故里貲殖一空戚
有以銀幣託者亦被掠顧急責償至券屋以足之君始遇豐不
問生計至是艱窶頓躋四顧靡騁乃客處授徒橐橐轉徙者十
五年風盲雨沈幼子殘卷意嚮濬如始事著撰悉畀兵火素習
壬遁術訖無用荒江敝屋飢寒暄洽或嫺而侮溫然不動聲氣
至與上下古今忠佞眉稜輒暴聳顧發火色齟齬錚錚知其耿
然者如茹堅金終古不得而化之也以光緒四年四月四日卒

年五十有五

柳以蕃曰余往從全椒薛慰農先生遊一時及門類皆昂藏魁偉不數年取科第者踵相接也而余獨伊鬱佗傺垂翅荒郊君於己未浙闈爲先生分校所得士遇而不遇齋志以老嗚呼阨窮之子無獨有偶乃亦出先生門耶余向亦聞君矣今交其子成章蓋益詳君之爲人云

從父起亭府君家傳

光緒七年從父蒔庵先生纂修宗譜以蕃既僭爲傳文數則編次于家牒夫傳以述行顧或蚤年淪沒末繇追徵其事蹟獨其耿耿不磨之志有足動終古之悼歎後之人不能無辭以聲之

者則有如我從父起亭府君諱兆青字烈君起亭其號自
少天姿遲頓而耆學若渴我從祖古槎府君繩教又甚嚴業進
則慙稍退則否府君於是晝而讀書而不輟遇有扞格則合併
宵晝之力以冥思而極索常子半孤燈熒然倦眼朦朧不可視
輒就案假寐須臾又讀如故功詣日埤而心氣則日就損矣旋
患咯血疾一應試不售血連咯弗瘥再讀再于有司仍不售遂
伊鬱病瘵而亡聞先是屢向繼母顧太君曰兒心不如往年樂
矣叩之終不答嗚呼豈隱知其降年之不永歟抑自傷其敝精
勞神而不得一褻于世也謹哉湘鄉曾文正公之論曰自 國
家以制舉文取士士皆俛首以就瑣瑣者之繩尺而近世有司

并無所謂繩與尺若閉目以探庾中之豆白黑大小惟其所值
府君偶不值閉目者之取而一朝被誣至于齎恨入地而不悔
彼天下之困于學以求奮者將何恃而不思哉予表府君亦欲
爲世之操文衡者諗焉

凌敏之密之家傳

光緒丁亥三月吾友凌君磬生過余並篋其二子敏之密之遺
藁以來曰區區者不足言著述然費日力於此不忍聽其遽湮
佚願賜甄擇以存又請各爲之家傳次諸宗牒以垂詔久遠蓋
二子之志也以蕃敬諾爰掇大較而爲之言敏之名實樹字蔭
午磬生長子也生而令懿夙成事父母先意曲揣咸適厥指與

其弟甚相得涵濡煦沫若極天下之至愛無以加旣偕入塾各
以英姿偶思刻勵問學未幾同歲爲縣學生益奮拔思有以自
表見密之旣才高能讀書慨然有慕乎古人述作之林君獨好
稱詩意有所會則矯首獨吟叢橐委積得失壹就其弟相往復
雖朋好不使觀也體故羸嘗有咯血疾君父不使應省試乙酉
秋密之喪婦請于父偕之金陵舟次唱酬爲笑樂明年密之大
究心方輿家言君參助鉤稽甚勤且覈七月朔血衝溢幾頓密
之早夕在視及君稍瘥而密之邁奇恙遽死君從是神氣槁喪
常獨自悽愴呻歎曰吾兩人車兩轂鳥兩翼弟死吾殆不能孤
立矣疾發遂無已時當是時有主術家言者謂居宅丁大凶不

速遷重且獲盤君父惶愕不知所計避君于平望黃氏外家方
嚴冬大風中道起雨雪且急獨舸掉巨浪中汪洋顛頓茫不知
所屆從人色色震恐君于暝眩中神思忽大動爲長歌數百言
縱聲高吟飄飄乎若神厲九霄而身遊千仞之外也旣抵平疾
急父友李君辛垞往診之君笑謂五丈且毋鞫我病力起索楮
筆書前所作相眎李君駭歎以爲仙人語也然心知其不祥
促磬生使歸歸越日而君死矣悲夫臨卒從容語家人謂我弟
待我于某山方丈間我世法盡亦必往力勸其父置筵言未來
事若甚了了者嗚呼異矣君卒光緒十三年正月十七日後其
弟才一月年二十三曾祖高榮候選縣丞祖大鯤候選州判以

君父內閣中書加四級貤贈及贈皆奉直大夫父泗恩貢生同治癸酉科副榜母費母黃君兄弟皆黃出妻陸氏無子所著有制舉文自編古今體詩爲第六水村居集余于數年前卽聞君兄弟才名而未得一見君嘗邂逅密之于勝溪草堂癯貌玉立沈沈寡言人謂兄弟絕相似也

密之名寶樞字拱辰磬生次子爲人壹如其兄而才特高勝然深沈內函人故莫測其所際所爲制舉文及律賦試帖之屬無不善而文爲魁嘗病今世操觚之士顛守時俗人骯髒膚陋之文形摹聲襲游談無根有幸而以此冒得科第者則更騰聲標揭流風相師其弊至于濫漫充塞而不可止當此之時非一切

剗刮力追古人而從之蓋幾無所措手矣其爲文一衷此旨而
其量又不欲以此自限蓋君雖少年未能輟舉業而隱然而志
于述作之事久矣君父故通博好聚書君與邑子沈君詠詔善
讀書其家江曲書莊莊爲沈君曾祖翠嶺翁所築嘗校葉昭代
叢書者也君旣盡發其所藏書尤留心輿地鎮洋畢尙書沅采
集太康三年地記王隱晉書地道記君病其疏漏爲補輯各一
卷後附刊誤會長沙王祭酒先謙督學政江南下車之始命諸
生撰獻吳疆域圖說又欲爲酈氏水經註疏吳江分得清水淇
水君之從事吳疆域也據春秋內外傳吳越春秋史記爲世表
年表一卷據杜氏集解釋例證以兩漢晉志爲地名考一卷開

方爲圖墨識今府州廳縣而以朱綴古地名旣皆釐舉獨所爲水道記及攷訂清水淇水沿革至唐宋而止從事過銳心氣暴損業未卒而奄及于死可哀也已且人之修短固有命也獨其才與志之所發見幾若可以有爲而卒不得年壽以俟其至此愛才者所爲愈加惜焉抑吾邑自乾嘉間張氏鱸江鐵夫淵甫三先生起而文章經術之事偉然復振于風寥響寂之會承學者始有所歸嚮其後沈沃之陳獻青兩先生師法婁姚氏以傳述桐城之緒文事乃益昌自是而後流風寢衰矣其間非無恢奇英秀之士足以與于斯事者而或牽于人事或累于俗學今皆垂老無所成而回顧後之興者如仲元熙鄭恭和之倫又皆

蚤歲夭逝及是而君且復然百餘年中傳禮之緒其遂終替已乎斯固非一人之可爲悼慟者已君卒光緒十二年十二月十七日年二十一妻陶氏先一年卒無子所箸輿地外有小茗柯館詩詞彙君之學旣受自庭教又嘗從其從兄範甫講業範甫名其模爲吾友礪生之胞兄子善文有名稱顧亦蚤死並箸之以見淩氏子弟多異材云

外嫂王恭人傳

恭人王姓直隸寶坻人吳江候選縣丞 卹贈雲騎尉世職顧君祖恆之繼配廣西養利州知州友義冢婦也王氏于寶坻爲著族其祖父以宦游家於閩而祖恆之王父教忠官廈門同知

兩家以交厚締婚姻故昶恆兩娶皆于王前室卽恭人女兒也
方恭人來嬪時在道光己酉廈門君父子先後赴京師姑陳恭
人實主其婚明年歸吳江始拜君舅于家又明年舅將之官廣
西以冢婦才家事壹委之時恭人年十八進則奉槃執悅起居
陳恭人前退則條理各事敕家人更迭事事規法大著及養利
君丁外艱歸恭人始返家政亡何昶恆遘奇疾醫弗能省恭人
焚香齋祓禱百日疾良已子昌齡生矣而養利君又猝病瘵終
歲尊處承奉之役非恭人及其長女在輒不慝于是兩人均力
壹志雞初鳴起治湯粥日午具藥餌夜則謹侍幃箔外有所需
卽舉以進且常先其意之所未發時其旣寐又豫戒詰旦所進

物必漏三下恭人方卽私寢以翼護其呱呱兒如是者彌年而
養利君歿後一年爲咸豐庚申粵賊淪蘇州將逼吳江城昶恆
命恭人移家窮鄉吳江陷昶恆殉難所親自賊中歛其尸以出
乘間殫先塋旁恭人抱昌齡而泣曰汝父以義死矣我豈不能
爲汝父死其若汝何乃彊自支拄曰抱子奉其姑明年某月昌
齡又病病浹旬而殤才四歲閱昶恆之死僅一年當是時承顧
氏後者獨夫弟昶復一人年且弱恭人念門祚不絕如綫延師
督昶復學力佐陳恭人持門戶夫以一女子之身而橫罹慘變
髮獨蕭然衰嫗在堂孤叔蒙穉薦遭喪亂流離播遷而老母弱
弟又遼絕三千里外計慮無所告憂傷無與解他人處此有死

而已而獨能從容鎮定忍萬死以挽顧宗于存亡絕續之交天下之至難孰有踰于是哉寇平再遷邑黎里鎮佐陳恭人畢夫弟昶復婚嫁夫長女弟卽以蕃繼娶婦也又爲昶復續舉婚而陳恭人旋患瘍大劇斃于啜哺恭人以匕飼之繼而匕齟齬不可進則代以匙陳恭人創痛不安寢恭人入帳中爲按摩方盛暑飛蚊四侵帳圍動拂甚微及退候望榻側雖甚汗未嘗一展簷此乃以蕃問疾時親見者於戲勤已陳恭人旣喪葬恭人乃嫁前室所生女爲秀水舉人王景曾繼配至是而家事始稍息然又無歲不病無病不劇嘗語余妻吾料不能久于世然一念亡人淺葬宗祀未繼卽死猶不瞑也至光緒二年昶復始生子

昌年恭人喜曰吾夫有後矣告家廟定爲夫嗣辛勤翼字中夜
十起會逢大病靡勞弗殫侍嫗皆曰主母憊矣乎恭人曰吾上
爲舅姑下爲吾夫甯惜力哉其通曉大義類如此是年秋度墓
田數十畝將筮日改葬夫匱並葬夫弟同在殯者四棺未舉也
恭人才雖肆應然憂傷憔悴見于顏色以鬱火得喉痺證數年
肝風作則齒磨擊有聲後乃氣逆不得息遂以是疾卒時光緒
六年二月七日也年四十七余妻哭之過時而哀常流涕語余
曰吾嫂苦節人也亦懿孝人也不聽其閔沒有文者之責非私
誼也柳以蕃曰嗚呼是可以傳矣乃書其大者以備志乘之甄
采焉

從伯母節母俞安人家傳

節母俞安人從伯父候選布政司理問秋園府君諱煌之配也來嬪時舅姑已前卒襄理問君治家理問君用財豪節母則一以儉殼而賓祭饋問必豐必備理問君卒節母年三十長子壘八齡次子坡才四齡家益藉而節母儉勤之操亦益厲蚤興晏息日匡月敕洪纖內外一手經畫節歲所入以隆禮其塾之師以優給其督租之傭以立其家而長成其孤會逢火災燬室過半於是始割產爲壘授室未幾壘咯血死節母益併力翼坡負責爲坡娶婦而婦又死坡旋發瘵痺屢殆節母於是再割產以療坡患卒不起遂命從孫待麟承二祧待麟賈於外當是時一

廬之中惟節母與冢婦沈節婦兩人節婦素嚴事節母及是益刻苦以承節母志嚮晨節婦先起櫛髮徐而捧櫛節母將食節婦執炊節母拭槃案將息節婦鑰戶節母秉燭燭之以爲常節母既齋食日多嘗就隙地與節婦雜蒔蔬果以時收掇固而藏之瓶罍常纍纍壁間又姑婦共治木棉花甚劬紡紗聲昏黃不絕歲出布衣兩人恆有贏嘗一日謂吾母曰吾兩世嫠且獨必艱難辛苦以保餘阡陌者以吾舅姑吾夫吾子終將恃以安骨耳蕃時雖幼小亦知聞而哀越數年爲道光丙午節母年五十五矣遂終割其產若干晦舉三世葬虛姑婦兩穴以待後二年節母卒又後二十年得旌如例計守節二十八年節婦年

二十七喪夫嘗有一子殤五十四而歿守節同其姑之年而處境又艱於姑與姑同歲旌

論曰吾聞之苦節之後其終必昌信然耶以予所見古今紀載狀述奇節其始極天下之至悲而其後或挺爲魁儒傑人次亦科第文學不絕何前此之艱而後此之壯也然或蒼涼堅苦久挂於層冰積雪之中而湮鬱弗伸甚且終奪其後如節母者又胡可勝數豈天道神而莫測與抑冥冥者仍視其家運之興敗以分報施與嗚呼吾弗能知之矣

湯先生墓碣

先生諱嘉樹字枝百一字小云姓湯氏浙江杭州府學生六世

祖右曾以進士官吏部右侍郎有聲康熙朝事載國史父詠嘉慶二十一年恩科舉人爲淞江遂昌學教諭母王太君出吾邑黎里鎮士族生一子卽先生也年十六隨教諭君授徒黎里鎮及教諭君卒於官旣歸葬遂奉母居黎里家故貧取與介然居恆寡言笑不苟交接里中往還止五六人而一時士大夫知其入及與教諭君有素者爭相傾重且令子弟出門下以故從游者日眾余從父蒔菴先生聞其賢延諸家課其兩子應墀應奎以蕃亦請業焉先生與門弟子講授終日無倦容隨其質之高下而誘掖之務使通其意乃止一時爲經師者無以過先生也迨應墀補諸生應奎搆羸疾卒先生亦以衰老謝去時距太

君歿已三年喪具舉矣然當春秋祭饗及歸故山展墓未嘗
不唏噓流涕以不得終養爲憾先生所生僅兩女曾以從兄子
亮采爲後旋卒復以嫡兒子中祧兩宗自侍郎公以下所賴以
存者僅此一綫而已復惴惴焉有門第之憂咸豐庚申東南寇
亂蘇常諸郡縣相繼失守六月黎里陷先生倉猝引避突遇賊
攫重傷中爲賊所虜先生以瘡傷銷鑠於同治二年十月二十
六日卒於蘇家港旅舍年五十四後兩月配王孺人亦卒時門
人皆避亂於外其次女夫陳師曾經紀其喪嗚呼先生以賢達
之後爲篤行之士不獲一顯於世卒使身丁喪亂家散嗣絕而
窮餓以終此尤老師宿儒不得志於時者之重可悲也以蕃貧

多累末由盡一日之私誼常自忖以爲寵竄之事終當有以贊成之今年春從父慨然主其事屬以蕃及門下士沈泰邱師濟先生之壻陳師曾同會事始克合葬先生及王孺人於嘉善縣保東區之大陶圩先生故淞人以蕃有業田在淞遂出其地爲墓壤且綜先生之生平而表之如右

卹贈內閣中書副貢生殉難馮君墓表

咸豐十年金陵大營潰賊長驅入蘇常連陷各州縣所向披靡而吳江之西鄙黎里鎮糾鄉兵一千人分道控扼支三月始潰一時士大夫死節者踵相接而吾友馮君與焉事平皇上推恩天下義節之士命各督撫以次上聞下禮臣議卹時吾邑

十餘人同被此典而君獨遺於有司不得達會有言於御史王公憲成疏上其事詔贈內閣中書蔭一子入監而里人士復爲君設位與諸死節者同祀於鄉嗚呼君於是爲不死矣君諱經字曾述一字授之震澤人曾祖錫瑞祖護皆庠生鄉里稱長者父善慶母王氏生二子君其長也君眉目英偉神采皆異人少讀書日可數十行年十六入縣學已有名諸生間顧落落自負不肯隨人苟同爲文必追古大家自言金海陽劉黃岡以外無肯北面者時人皆譁之君顧毅然也時余方求友鄉邑得君文奇甚舉以語張伯衡文璿遂同約爲兄弟友伯衡性沈靜君議論鋒發數與余鬪辨余爭之力或竟日不相屈伯衡周旋兩人

間而陰袒君如是以爲常咸豐戊午君游京師中順天副榜第一歸而遭祖喪以太公精力衰始分理家政家故饒君祖長厚好通財爲人負不下數千緡及君幾困然君意量豁達毫髮不爲介又振人急如恐不及者人以此多君君自幼喜讀史及是又頗講論世務嘗謂東南自寇興以來封疆之臣弛無備禦徒以擁兵頓食爲自全之計而武臣之効命於外者雖有公忠壯猶之人率皆箝受節制不得盡所欲爲一旦禍發其靡爛有不可勝言者當時頗疑其過激乃未二年而果如君慮而君亦卒以身殉悲夫君之死也以督鄉兵抗賊力盡不支自投水年二十九死之日則六月初八也弟澠從君水死賊退收其尸皆不

獲妹未字者罵賊被戕其事甚烈因埶書焉君配沈子鼎望幼
同治六年某月某日其家奉太公命以衣冠葬君於某鄉某原
君死事已禪於天下而其平生志行成仁取義非交君深者不
及知也爰撫大略揭於墓石以盡交誼以塞太公之悲以式鄉
邦而訊異世

兵部武選司主事張君墓誌銘

余年十八九治科舉文卽與邑子相締交其最夙者莫如馮君
綸士與張君伯衡而並時之稱雄于文者亦莫如二君綸士殉
庚申之難余旣哭而表其墓乃今又及伯衡之葬追念三十年
間曩人故侶零落至此尙忍銘吾伯衡哉然亦豈可以無辭與

君諱文璿號元之伯衡其字吳江縣鄉壺蘆兜人祖候選州同
孝享饒于貲財好賓接文士父國子生與齡有陰德蚤世君幼
以孤童爲大母吳太君所育天姿雋拔及長受文法于叔父子
謙小憨兩先生年十七爲縣學生厯就外館盡橐其家藏數百
家制藝以行久而洞闢其奧自爲文益深邃每構一藝高扁篋
中不肯謾示人後交以蕃又後交綸士三人者常會談證討其
所得論有不合則斷斷鬪辨壯聲滿座各不相下退而又各相
傾服時人皆以爲笑初君以歲試第一食廩餼已而再甲其曹
館祿漸盛弟子著籍者亦漸眾每遇學政考校後生新進袖場
藝請決利鈍環列數十人無問及門不及門皆稱張先生皆知

張先生夙於文者顧君累試鄉闈不得志會遭寇亂流離顛頓
又喪其配又厄于疾病壯氣駸駸日減寇平應舉仍不售當時
漸聞有疵君文者謂高簡不宜于速化門弟子亦稍稍引去及
同治丁卯舉於鄉戊辰連捷成進士改兵部主事自謂材不可
用世遂去官以歸大開講舍倡導後學遙主震澤頓塘書院蘆
墟切問書院文字纍纍几案間君鉤校塗乙下筆不輟或自擬
藁以示程度而一時承學之士適登進無虛科於是遠近之論
文者又必首稱張進士談張進士文不釋口然君固未嘗自疑
自信於遇不遇之間也君之去官也時論皆惜之而君沖然有
以自愉時時與鄉老講求農事買田宅旁傭工以畊歲得穀頗

饒釀酒數石甘美芳冽日自罄一壺以文下之家有小閣子課
二子其中誦聲琅琅與家人機杼相應和君顧而喜曰吾雖官
祿不如人然澹泊中差可味矣君之爲人也中身神清貌癯目
短視其爲文也善往復幽如曠如其爲學也耆遷固兩家之書
及明歸熙甫古文其爲言也若涇於口意繚繞不盡其一切落
漠不可親之狀皆其天賦使然初非岸異不近人者比也余與
君家爲兩世交又同居分湖濱隔三里許初時以文字往還無
虛月比年君精神稍頹散余早衰且病不數數見然見益驩甚
必語終日及君歿而徘徊荒江益令人有蒼涼寂寥之喟矣君
生道光七年二月五日卒光緒九年八月朔日年五十七祖父

皆以君官贈奉直大夫妣皆宜人娶朱繼娶陸皆封安人子男
四人長寶鈞縣學生能世君之業次寶鏗早卒朱安人出次寶
政殤次寶鎬陸安人出女子三人長朱出寶鈞將以光緒十年
二月某甲子奉君匱與朱安人同葬邑之呵邑圩新阡以余與
君爲文字厚交先期手狀來請銘蓋亦嚮者綸士例也銘曰
大風一噓鍛羽忽竊方竊而稅孰知其然進退在己匪人匪天
蟄躬藏用宜康其年奈何一疾誤藥而顛厥我文傑靈魄九泉
遺編在篋高墳在阡我銘不華庶幾可鐫

陶君芭孫墓誌銘

君諱然字藜青號芭孫陶姓咸豐辛酉科拔貢生先世自維揚

徙居長洲縣之周莊曾祖國學生繼潛祖貽贈承德郎秉信皆
儒士父貽贈儒林郎保宗以賈起家長厚力善生四子其次居
三者卽君君少而才篤於氣誼顧性儻倜不羈時時從賓客跌
蕩歌酒間後家不振深自挫刻咸豐之末君再以賈興豪氣鬱
發所贏金隨事散去或勸之節曰吾不願壓死鼻蹄下也君於
辭章無不好而獨以賦自鳴後從震澤陳先生獻青講授益進
而求通於聲韻之學孳孳辨訂未成耑書僅先後三梓其賦曰
味閒堂課鈔者名在蘇松常潤四郡間君志行坦坦顧甚口於
世多所齟然能受君言者又皆驩君而樂聞其言以蕃年弱冠
識君於崑山試寓當時頗避君之才氣其後十年君知有余余

亦獲交深於君因以盡知君之爲人蓋浩落狂且直者也今則
亡矣君于光緒六年庚辰十二月卒于蘇州旅舍年五十一聘
嚴氏配黃氏妾胡子男四人惟奎縣學生出後世父曰惟堅出
後從父曰惟堂殤惟垂女二皆適士族孫一善鍼君卒之明年
惟奎卜葬君于青浦縣王巷村月字圩惟奎尋卒越二年癸未
其從兄子春君命子惟坻狀君事以告吳江柳以蕃使追銘其
墓以蕃君友也責宜銘銘曰

負才磅礴孰畀其豐抱才鬱悞孰啻其終豐之啻之殆天所歧
涕笑萬古渠酣而嬉猗嗟陶君韶歲玉立妙婣眾心葩藻四出
儷爲敷陳絕技尚場騷靈選思盤肝踞腸蘊古滿懷而不相襲

隻字冥搜掉指屏欹一篇躍出旣翕乃張天花飛動鸞歛回翔
軒袂揚趾大放厥狂伉直與人弗多矧寡覲面攻瑕口不肯啞
雜以詼辭醉醴聲姤要其胸腑坦白無疵彼不諒者纍疑眾詆
又其甚者交中絕之身世罕諧窮鬼戲掉婢歎奴愁舉頭獨笑
時乎偶會大挫小飛拔爲貢士晉于京師帝閭莫通連試鄉
國曰某不解大江無色動輒乖齟一激頓弛醕酒婦人甘蕤以
死蓄姬方朔賣賦相如吳趨廡下有曩一儒張轡角飲謔誹叫
呼名滿六門謗騰一都亦有知君始收終墜貴人望高怒君觸
諱復有師君愉入愠退後生氣鬻惡君直喙終年橐筆食字煮
文傷心遲暮乃感黃金卯歲過君粵偕淩子寂寞楚音突驚而

吾系然顏鬢訝不侔年謂云心疾匪藥能蠲一別幾時愕然逝
矣返葬鄉原魂魄安只遺編在世委蛻在阡何形不滅有名則
傳我來追銘綜厥終首上告日星下告誰某

先考松琴府君行實

府君姓柳氏諱清源字鄂生號松琴晚自號覺翁始祖春江府
君明季由荆東慈溪來居吳江之東村三世至心園府君由東
村移居北庫港又三世至我高祖貽 贈奉直大夫杏傳府君
諱學洙由北庫再遷分湖之大港力穡好行善我曾祖 封奉
直大夫厚堂府君諱球以節儉起家號稱素封遂拓宅置良田
而居焉祖太學生維庵府君諱夢祥娶祖母陸太君及祖庶母

王民生兩子不育是時我本生祖太學生確齋府君諱夢坤既娶我本生祖母錢太君有三子矣遂以其長立爲祖考後卽府君也性穎敏七歲就傳十三畢諸經十四出應郡縣試十六丁本生祖憂越兩月而維庵府君歿行三年喪如禮時陸太君前卒祖庶母嫠居鮮歡府君壹體其性情而謹事之遇事有斷制當艱鉅不色動以故中外帖帖與錢太君旣離居旦晚必往省或道書史及稗官野乘之說以娛其心居恆銳意嚮學渾然以古人自期先後從丁先生洵吳先生元音葉先生樹棠吳先生騰霄輩遊顧好爲詩古文辭不甚治帖括而錢太君所諄誨者亦惟以讀書砥行爲重而未嘗汲汲於科舉及服闋二年始受

知于學使申文恪公補諸生于是府君年二十一我母孺人
來歸已兩年孝姑勤家內事釐舉府君講業之暇惟與邑中諸
老宿及遠近能文之士以詩詞往來家雖日落怡然也壬辰冬
同舍不戒于火焚燬蕩如而家故饒老幼男女之資賓客親故
之醕酢雖甚節嗇終不能苟簡如細民力所不支率至貶價粥
田以繼其間錢太君又病痿終歲尊處事無巨細府君悉以一
身調劑之而卒能庇兩家以安俾大母無重感者蓋至是而心
計瘁焉矣府君旣孤露益友愛兩叔父旣災之明年葺老屋蔽
家人復治一室曰焦桐館課兩叔父讀書其中時從兄壻方從
學爲詩昆弟叔姪依依相對或至漏深不去性淡約經患以來

曰奉益殼薄又以先王父未葬深自引疚春秋薦饗歲時伏臘
未嘗不愴然淚下酒酣以往客有道吾家盛衰事者輒俯仰太
息蓋天性之篤數十年如一日也平時薄榮利顧重以家貧母
爲戚一再應鄉舉從祖古槎先生諱樹芳尤望府君深營累
勛曰汝曹年正強當以起衰振弱爲己任吾老矣他日昌吾
門者其在汝乎府君誌其言不忘然連試不得志乃更盡力于
著述耆博覽于詩尤篤好時郭上舍麀方以詞章雄海內見府
君詩節稱賞謂所造詣正未可量執友中尤善同邑張丈益
嘉善袁丈青照兩丈皆世所稱聰明俊偉之士與府君爲兄
友旬月必過從自謂友朋之樂無逾于此而爲詩且益多張

丈既歿袁丈又遠客府君意興亦漸衰減道光二十一年遭錢
太君喪亡何季父暴卒中間又累哭從叔從兄輩意常忽忽不
樂泫然曰吾年僅三十骨肉宗黨間凋落已如此脫得老壽亦
無生趣極矣迨不孝與梅氏姊漸長府君始以戲門課兒女爲
樂適從兄大奎亦來學三人環坐几案旁聲琅琅相應和府君
恆顧之而喜三十年九月仲弟文藻生咸豐三年二月又得季
弟廣蔭不孝卽以其月補弟子員府君心稍慰而所以策勵不
孝者益摯旣不孝與邑子馮經輩結文社月再舉府君喜爲之
軒輊持論一軌大家故府君雖不屑以時藝名而自庚戌食餼
以來歲科且九試異等矣歲戊午命不孝往應京兆試瀕發勉

之曰立功名任天下事交四方賢士大夫成德業在此行耳吾
豈望汝弋浮榮爲溫飽計哉比不孝下第歸府君適遭羸疾甫
瘳倚牀言別後事鬚髮星星加白益精力之衰始此也九年二
月府君年五十不孝等欲治觴爲壽弗許作自述詩五首惓惓
以葬事未安爲念又自爲編定其詩藁自是而往府君方思屏
居鄉里以老明年春粵賊東竄蘇常諸郡邑相望失守連陷各
鄉鎮吾家以地僻屢免而危警一至戶號人譁驍徒乘間作難
岌岌有不保終日之勢府君朝夕憂悸進旣不能鳩財倡義庇
及一方退又不獲躬耕爲自全之計時同邑趙丈清穎李君齡
壽費君延慶延釐皆移家在鄉府君每與嗟歎及此又數爲歌

詠以寄慨。瘵傷銷鑠，遂極于病。十一月八日，驟得肝胃疾，食入輒嘔。醫至投葯，劑不效。體肉寢削，脈力如絲，輒竟以二十五日夜半痰涌氣逆而逝。嗚呼痛哉！府君生有至性，處門內皆盡道。又篤于友誼，而論交特嚴，與人共事常爲其難，至勞怨不卹戚黨孤嫠及喪葬無措者，雖不能贍必力爲之謀，好施與不足則募貲以成。遇人事如一己有就，商推亡大小必盡誠，或以機詐進立剖，故人皆嚴憚。府君日用有定制，賓祭而外恆累月不馭肉，常服僅麤布一葺，裘衣二十寒不易其節，縮如此而于不孝讀書從師之資、友朋觴豆之費，未嘗稍言絀乏，蓋欲以資其有成者。靡所弗盡，不孝不能早自刻勵，慰府君一日之望，今已

矣竭畢世之力終無以伸其報矣痛哉府君生嘉慶十五年二月初二日卒咸豐十年十一月二十五日年五十有一所著有焦桐吟館詩初三集凡十二卷外集一卷焦桐吟館襍著三卷詞三卷詩話二十二卷尺牘二卷諭兒帖二十八條藏于家配我母丁孺人太學生候選從九品諱仁溥次女子三長以蕃娶黃氏次文藻次廣蔭女五長適同邑梅霖次末字三適同邑邱師範四適同邑吳寶光五末字不孝擇于同治元年十一月十一日奉府君匱葬于本邑二十八都大義圩祖考之穆位而銘幽之文未具用是拊心泣血追次大畧冀當世先生長者以道德文章闡幽顯微爲己任者閔焉而表其隧則不孝之感

與天地永畢已

先妣丁太孺人事略

先妣姓丁氏世居吳江西鄣之吉水港考諱仁溥候選從九品以爲善稱于鄉妣吳太孺人有賢行生一子二女長舅氏國子生諱緒次適桐鄉孫氏次吾母也丁氏故吾邑望族先世又雄於貲吾母生長執綺間而秉性泊然年二十一歸我先考松琴府君時我族自曾祖以下俱中落顧累世豐溢閨門以內猶沿富家積習甚有以此困其生者獨我不生大母錢太君敦尙儉約二十年至是而吾母又然以故甚得錢太君歡越四年所居屋火吾母益自刻苦以紓府君艱遣僮奴冗食者數人留一嫗

給使令凡縫紉浣濯饔飧之事悉身任之境雖日困而家人無
啼嗙於室府君得怡然嘯歌不以鱗雜瑣屑撓其慮者皆吾母
補苴之力也錢太君旣病痿終歲蓐處吾母間日必往省先是
吾宅通南北爲一旣災門徑多變置由吾母之室踰七戶始達
中廳中廳爲廢址由廢址折而東又數武始卽錢太君居雖隆
冬烈暑無廢如是者十年而錢太君終祖庶母王氏先大父維
庵府君側室也性戇直而識大義吾母甚敬事之有故任勞於
己而推逸於王氏有酒肉則損己之食以益其食故始終未嘗
有違言吾母體素豐然耗於多產自來歸之三年生女芹不育
再期而生芸芸者仲姊也又兩年生不肖越不肖之生十二年

凡六產其不育者男女各一人存者女蓮蘋茵蓀四人後三年生文藻又後三年生廣蔭是時吾母年四十有四而顏髮衰悴如五六十人藻生之二年嫁仲姊蔭生之月不肖補學官弟子明年娶黃氏婦吾母始稍息中饋勞然不肖每篝燈夜讀輒見吾母就案上火紉兒女衣履不輟又嘗左手抱廣蔭乳右手持刀尺作指畫狀曲折以授諸妹必通其藝乃止不肖或從旁勸少休吾母曰我習此不則不慣耳初吾母以家事繁每歸甯未嘗踰旬日及是常爲經月留蓋自外大父歿後舅氏相繼謝世吳太孺人老且窶非吾母至輒不能一日樂也及外大母繼歿吾母遂竭力爲營兩世葬命其家割遺田數畝自乃出紡紵資

益之十日而畢五喪無一錢累他氏者嗚呼此豈特世之所謂
厚其親者與不肖自幼多疾病吾母常中夜爲拊摩及長飲食
寒暖猶愛護如嬰兒夜深讀書必預儲果餌以待偶出門遇風
雪爲之睡不交睫凡吾母之所以加意於不肖者其委折微不至
雖家人輩或不及知也咸豐戊午不肖奉府君命應京兆試吾
母初爲之不怡已而曰汝父貧多累冀汝掇科第吾亦不汝強
也但無利_蛇終當歸不肖諾而行旣被放旋里明年試南闈又不
售自是以後方思杜門奉二親以老而庚申春粵賊內竄郡
縣城相繼淪陷遠近數十里皆震動府君悵悵致疾遽捐館舍
時兩弟幼諸妹未嫁寇警且日急吾母悲來交集出見靈寢則

哭入視諸子女則又哭回首見不肖羸然不勝任則且相向哭
期年之中老淚蓋幾於涸矣辛酉嫁蒞妹壬戌葬府君癸亥而
黃氏婦又殞殯甫畢聞流賊狂搜眾鄉遂奉吾母遷避東鄉之
金澤鎮去家三十里以駐官軍得稍安而天暑方甚室隘狹不
堪容又戶西向炎風烈日無地可避几榻亦不能具於是謀再
遷吾母急止之曰聊避患難奚求安七月間賊退吾母始志決
歸里先兩日囑不肖返治家具神色如故不料於次夜猝發厲
疾嘔泄不止弟妹皇遽無措遣急足馳告不肖迨不肖號奔至
前而吾母已溘然逝矣嗚呼巫醫之不具湯藥之不供屬續之
不親一朝構禍萬死莫贖不孝之罪上通於天矣無以自比於

人矣嗚呼痛哉吾母生於嘉慶十三年十月初二日卒於同治二年七月二十九日年五十有六子三人以蕃文藻廣蔭女五人長適梅霖次適吳澄次適邱師範次適吳寶光次未字不肖謹以五年三月十九日合葬於大義圩先府君之兆顧念吾母之淑德懿行具合於銘而孤賤無以自達於當世能文有道之士用是拊心泣血次其所及見聞者號而陳之以俟焉

陸氏妹墓誌銘

妹爲先君子第五女而繼室於同邑陸茂才巨隆者也光緒六年十月朔日以疾卒年三十有四卒之日其夫之家皆哭之慟其兄以蕃以他故未及視其斂則爲之服而遙致其泣而內外

淵之會其喪者亦無弗唏噓流涕以慰其死雖曰所親愛者則
然亦難可幾矣越六月日乙丑亘隆舉其匱葬於青浦縣某
鄉某原先期以書諭以蕃屬銘且曰隆少孤翼長於吾母而受
庇於吾兄嫂自吾妻之歸十一年入而侍於母之寢不聞有衰
病呻吟之聲與夫飲食寒暖之失宜而知吾妻之能事吾母也
出而遊於兄之塾生徒十數人供具必潔以周而知吾妻之能
以中饋助吾嫂也吾家故貧又窮於遇久矣然見吾妻之儉而
勤怡怡然而自樂無論囊篋錙銖之故吾不以關於慮卽人世
之得失欣戚吾亦久而若忘焉甚矣吾妻之善相吾也則今之
情不自節而哀未已者良以感吾門之不幸豈私之云哉以蕃

曰誠哉其非私也今夫婦人之能爲婦未有不自女子之能爲
女吾父之終也妹未笄吾母歿妹年僅十七然在喪次神色如
非人終三年未嘗見齒其致於余也難則相恤病則相勤盡誠
以篤前嫂之終而殫力以貲後嫂之勞其字兩弟則未寒而衣
方饑而殮頑嬉而嚴訶禁幼學而加拊慰其事諸女兄已嫁則
投溫承愉未嫁則任勞推佚故其在室也亡一人不愛悅之及
其旣嫁亡幾時必祝之來去則又思之吾循是以推而知其宜
於夫之家者無弗然且隆之言有以哉有以哉妹生於道光丁
未七月十七日其死之月日與我伯姊同而後姊厘一暮而我
仲弟文藻又先伯姊一載卒三年之中薦遭一期兩功之喪死

者不復生而生者亦將以憂傷老矣嗚呼爰爲泣誌大略且舉其内外家之系而綴爲銘詞曰

有女柳姓系河東也祖隸太學父泮宮也母丁太君劬且恭也是爲幼女肖德容也歸陸協卜夫亘隆也舅茂才君旣攷終也勤事姑許職愼共也仁惠不壽數有窮也夫度厥兆筮曰從也兄韜廬甫銘其封也

亡妻黃孺人權厝志銘

孺人在余室凡九年前五年骨肉聚順門庭晏如中饋以外無事也後四年內變外亂搶攘交作余震動憂患中惟孺人亦弗得安矣雖然勞苦患難人事之常也及稍安逸而不見勞苦患

難之人則人情之所悲也今距孺人歿已五年其生平行事顯
顯在目余悲不自克追綜其大者誌之方孺人之來嬪也在咸
豐甲寅年二十耳體質荏弱善病又自少以獨女鍾愛於父母
余竊憐其婦職之弗克勝然自入門以來上事舅姑下接叔妹
大而祭祀賓客之奉微而烹飪浣濯之役無弗既慎且勤足以
承我累世閨門之凜余秉性闊畧數年之中得以北游京師南
讀書武林晏然不問家人筐篋事者固仰賴吾父母儉勤之賜
亦藉孺人之有以資之爾庚申春寇亂大作其冬猝遭吾父喪
天傾地岌勉畢大事孺人故有咯血疾至是乃甚發時吾母亦
以哀痛故病心悸夜伏枕常輾轉卽曙不成寐孺人憂之多方

爲吾母解終不解則入私室以泣踰年葬吾父并舉王父以下
未葬者又踰年嫁第四妹時皆在大亂中力幾頓孺人助余隱
約從事雖家人不盡知其難而又連歲痛哭其父母兄弟四喪
咯血疾亦連發不止當是時內而家室門戶之憂外而干戈寇
盜之警以惴惴不保之日而重之以艱阨不可堪之境雖知孺
人之疾又何暇一日稍爲之力哉而孺人亦竟死矣死之日吾
母哭之慟余情不自節亦哭過哀然寔不自知其哀也昔望溪
方氏爲其夫人哀辭謂以執義之過而致悔方氏嚴於治禮其
以義抑情固宜而猶惻然動其事後之感乃余獨以處境之絀
而終之以無窮之悔不亦重可愧與孺人姓黃氏名儀吉世居

邑後瀟浜父太學生諱濤母鄭孺人諳書工琴棋嘗以授孺人
生母沈氏孺人生道光十五年四月初八日卒於同治二年三
月二十一日年二十九生女一殤歛之日卽舉孺人柩權厝於
大義圩先塋旣免服嘗爲哀詩十六章哭之茲復志其大略而
銘之曰

猗嗟婦兮職罔忒婉有儀兮窈其德命云何兮遽斯疾善相我
兮俾不卒權藏形兮此幽室生艱勞兮死乃逸我實負兮茹永
惻泐銘章兮語皆實

姪祖穀埋銘

祖穀者仲弟棻之之子也以光緒元年十月四日生殤於三年

六月十九日生之時其父方科試郡城值余自楔湖講舍歸甫
卽尸女奴白仲婦生女已而曰男也余聞之且笑且喜睟周余
兄弟方秋試報罷杜門謝客每與家人圍坐笑語望見穀紅衣
綠裳慙躍母抱中引余女相嬉笑情事如畫絕可樂也今年夏
余薄游金盞山歸余女走迎余不見穀余妻告余穀以母娠失
乳且中時厲病有日矣於是求乳乳之弗瘳禱藥藥之又弗瘳
延五十餘日殤嗚呼孺子之不育命耳獨念先府君在時常以
不得抱孫爲憾迨歿十五年而仲始有子抑艱矣顧又弗克長
胡爲然耶旣殤之明日歛以棺載而埋諸大義圩先府君墓陰
復哀而賜之銘曰

生年促瘞得卜吁嗟乎穀

祭費吉甫文

維光緒九年四月二十二日通家弟柳以蕃謹以脯醢之奠致祭於先友費君吉甫八兄之靈曰嗚呼兄乎命止於斯雖止於斯而兄無疵兄之性情槩深礪厚煦物濡人歸原孝友兄之節概砥毅持貞羣趨弗趨見義必行不標智能中則有實不露文章亦惟心得凡兄之爲皆我所愧豈惟我然於今孰逮憶初識兄在丁巳紀玉山定交詰弟之自我幸得兄兄亦暱我猥恕狂愚罕否多可兄登貢舉我柅鄉闈曾不自熹嗟我命乖我歷艱辛兄履坦遇若嫌於中惻焉相顧凡今之交朝炭夕冰如其

風誼豈世所能哲弟旣官於我益狎信信酣留茵稠親疊其或不見函詞琅琅靡言弗罄有託必償我近養疴緘書求藥遲久不至心疑且度豈期幾日報兄疾作又越五日凶問來告猝然入耳眞乎夢乎忽驚而吽其信然與嗚呼兄乎我方資兄兄忽我棄安有若人再逢當世未親哭弔疚兄實多胡仇而沮咄此病魔痛定思兄彌留之際愛弟遠睽病妻在視弱女非兒侍姬不予萬感難聲一瘖長已天乎人乎善人至是世方顛倒闕正昌邪善不必福豈直兄嗟雖數則然而理難昧彼倖年者或漸其內領聞純終如兄奚懟獨有我悲曷日能忘力疾綴辭以侑莫觴兄其有知來鑒衷腸尙響

文中稱兄胎息於韓李習之爲昌黎姪女夫亦從是稱重交

道也

自記

祭梅氏姊文

嗚呼我姊倏焉而終豈伊數盡藥椀其躬姊則旣逝我復何言
愴焉睠往惜姊之賢憶姊髫歲羣書早諳承父母愛曰女勝男
爰嬪於梅二尊在侍公恕姥嚴婉曲承志泊主中饋相夫力勤
軒軒四子彌壯其門年才及卅啞然抱孫入分梨棗出主饗殮
運方隆我遭寔蹇哀哀鮮民誰拊誰勉羣憂刺抱萬瘁攬身
茲值厯欲言不聲惟姊知我慰我恤我我益憐姊往來一舸
期旣老宴笑如初柰何棄我中壽未踰矧先後亡弟仲妹季

落同胞八人存四姊今免服我哀未除辭以侑饗來薦魂輿
嗚呼我姊其知之乎

食古齋詩錄序

食古齋詩亡友柳君子屏箸也子屏病革時費君芸舫自吳門往眎出手橐授之及會弔芸舫述遺言屬編勘爲之序曰昔歐陽公論梅聖俞詩世謂詩人少達而多窮非詩能窮人殆窮者而後工也而其送徐無黨序則以修之於身施之於事見之於言爲三不朽夫達則施之於事有得有不得焉窮則見之於言又有能有不能焉惟修之於身則窮達無所不獲故窮者不必能言窮而見之言矣非脩之於身言雖工不貴蓋自屈原離騷下逮晉之淵明唐之李杜皆古窮者之辭也後人讀其詩益重其人其不與巧文麗詞同磨滅者固自有在然則聖俞之詩之

見重於歐公豈以尋常工拙論哉嗚呼此可論子屏之詩矣子
屏家世稱詩從祖古槎翁尊甫松琴先生皆爲鄉先輩郭頻伽
所激賞采入靈芬館詩話古槎又納交於婁姚春木自其少時
習聞兩家論詩已服膺於婁姚氏詩外有事之旨始遊京師才
氣凌厲被放歸值江浙淪陷所居鄉僻一時避兵來者若李君
辛垞費君吉甫芸舫相慰藉苦吟窮日夜多感憤豪宕之作大亂
未平重罹家變旣痛鮮民又喪其偶煢煢弟妹哀哀負土此數
年中淒音楚調不堪卒讀旣翼兩弟成立次第婚嫁於是息心
學道讀儒書以自廣而單丁不育仲弟隨亡體素羸弱湮鬱成
病畏風蟄居冥搜憂造其詩迺澹孤篋深得古人意旨嗟乎

子屏窮至此乎豈天之忌其才而窮之乎抑以窮之者昌其詩
乎人知子屏之詩之窮而工亦知子屏之處窮有大過人者詩
之所由工而可貴乎芸舫與子屏患難交無間窮達有歐梅之
誼故舉歐公之論聖俞詩者爲之序以殉亡友之遺言還質之
芸舫焉光緒壬辰同邑凌泗謨

食古齋詩錄卷一

吳江柳以蕃 號廬

入都 咸豐戊午

笑整行裝一束輕出門惘惘賦長征花朝別酒離鄉夢 二月十日啟

程芳草長途去國情豈有文章鳴盛世正緣菽水戀微名京

華見說塵埃滿莫使征衣變化生

婦翁黃眉生先生 濤淮陰聘鶴圖

先生種梅三百株忽夢夜半元裳呼大江揚舲一以去羽客到

門雙不孤草堂杖屨坐忘老羅浮風月仙所都 小羅浮先生所居屋名世

人方酣朝市夢老翁自作山澤臞

客中聞沈南一先生曰富耗

送我長安別公乎不少留人才關世運吾黨切私憂白日堂堂去江波滾滾流老成凋落盡獨立睠前修

文章天下事家法數桐城襲邑得傳派姚先生椿吳江此繼聲百年

留絕學羣喙息爭鳴一集樗寮後憑時論重輕

何止名山業蒸然孝友門萊衣春不老姜被夜常溫玉粹瑩無滓松高鬱有根自非君子性茲意孰同論

輾轉看行篋端然兩好書無窮來者事期我意何如道遠艱難集天高薦達虛出門望南斗寥廓動長歔

贈李芋仙土菜

李生負奇不得意十載京塵疲馬趨怡思科名定何物長遣壯
士悲歧途冰漿不化肝膽熱塵土已黥容顏朱錦江花發鷓鴣聲
苦側身西望天縈紆

送費芸舫

延釐

歸故鄉

半年橐筆其辛酸游子衣裳淚未乾別酒乍醒鄉夢遠卻留孤
客送歸鞦

出都感懷同馬綸士

經作

得喪尋常耳征輪往復來百年紛涕笑終古此風埃
公道窮途愧棄才拂衣從此去感激浩歌哀

將抵黃村黯然有作

落日徘徊裊一鞭
塞驢茸帽出幽燕
風驅山勢疑無地
雲沍郊陰莽接天
遠堠烽煙驚客夢
異鄉心緒偪殘年
郎當鈴語催人急
回首京華一黯然

旅店

萬籟無聲月滿庭
披衣起立睡初醒
霜檐僕馬酣同夢
獨向長天看昴星

荒雞三唱曙光多
世界奔忙一幻波
不是長安名利客
誰能衝曉渡黃河

北歸

朔風送征車
惘惘出國門
通途界南北
輿馬無停奔
不知風埃

中涕笑幾百人偶然判得喪舉世爲紛紜人生百年內窮達皆
命存有志苟無命且焉守吾真貧當父母共被放猶國恩

我初出門時父母送河梁再拜別父母道路從此長川行舟在
水陸行車在岡行行重行行一月解我裝自是南中書一月兩
寄忙秋風決黃河致我書緩將頗聞寢門內廢食爲徬徨念此
輒自疚歸思征鴻翔

京游亦已久欲別還依依一十心難忘於我師從師自鄉
來九閱月於茲在京策文字在路咨寒飢遂令游子身倚託忘
孤羈高雲布大澤於物豈有私被恩若獨厚感極無一辭何能
報涓滴浩望渾河涯

我友馮綸士平生交最久去時不同車歸轡日攜手功名果何
物豪傑奔走諒爲親健時竊祿唯恐後顯揚有本務致此顏
已厚而況抱才疏無術干升斗傷哉貧子身出處乃多負

臨淄逢楚客夜宿同驛廬張燈就我飲欲訴頻霑裾自言困饑
寒終歲傷馳驅普天絀生理豈獨爲腐儒人生及少壯恨不歸
犁鋤君看沃土農戶戶高黍稌雞烏傍檐集母啄子與俱

車行十八日揚帆乘急流帆行乍三日泊塗當揚州揚州數遭
亂城郭燬未修荒黎竄土穴飢瘠捐谿溝行行重掩袂不忍回
我眸吁嗟此邦命甯不軫聖憂誰歟任芻牧弗一哀羊牛書
生豈有責竝立空咿嚶明朝渡江去浩蕩洗旅愁

渡江止四日忽忽家舍近呼僮卸我裝木葉滿門徑上堂拜父
母父已久卧病夢中聞兒歸倉卒驚未定果然見面真喜極淚
還迸呼兒坐父旁離緒璫屑罄阿母但歡然餘事未遑問潛行
入中厨烹雞煖佳醞勞兒風塵苦慰兒遭際困吁嗟高厚恩徒
以忝我行

攜燈入深閨相見各粲然送我千里影與君來周旋殷勤前致
辭樸摯無雜言謂舅神且衰謂姑力亦縣家貧兒遠出何以俾
息肩嗟名實我累使我庸行訾彌縫而克善豈不感汝賢汝身
又多病病已踰半年重爲奔走故使汝成久淹安能便相守高
束我馬鞭

歸自京都復爲毘陵之行感懷一律

出險纔單騎衝寒又獨舟
星霜催暮色天地入蕭愁
萬念緣親在微生與物浮
飄飄正無定翻羨傍灘漚

毘陵道中

風雪扁舟拍浪高
意中人遠迴難遭
神鷹寂寞憐身手孤雁羈
棲惜羽毛北望青門山
莽莽東流白日水滔滔
等閒老盡男兒志牢落
乾坤起獨謠

哭董夢蘭

兆熊

丈

吾黨董夫子閉門惟著書
窮年弄丹墨餘事注蟲魚
短目涵高鑒全神返太虛
從今問奇字何處子雲居

胸際萬千年年坎壈身貧憐將母瘁老被特科甄叔夜心情
懶虞翻骨相屯題旌作徵士論定待何人

得李芋仙書卻寄

醉墨寄峯灑滿箋知君狂趣劇如前詩人雄長都歸蜀狂士悲
歌例入燕旅館放談成往事酒杯行樂送華年秋來又試排霄
翮可有長風送九天

雪夜寒甚悵然有作

薄酒不能醉寒燈相與孤遙思諸弟妹笑語擁紅爐地僻鴻多
滯糧荒鶴易懼不知今夜雪寒到故園無

客夜

庚申

鼓角中宵勁乾坤夜氣清星搖春影活月傍旅愁明海宇方多事鄉關又苦兵不堪風動處容易作軍聲

哀蘇州

大星墮地山岳頽奔空天狗聲如雷妖氛一夜捲吳郡萬家夢破重門開雄兵一散何倉卒不見營門弧矢折野外星馳諸將旂城頭月照千門骨句吳地勢稱雄峙固壘深溝壯憑恃一局殘棋反掌收未經鑒鬪雄心死纖兒智機何足云東南大勢隨土崩至今蔓衍遍城邑連屋累棟狐狸屯啾啾白日鬼哭多恨血直欲傾吳波中朝一老故鄉望嗚呼奈此蒼生何

諸將

天府干城倚外藩
兩移節鉞鎮津門
波連渤海孤城壯
馬蹴燕雲健卒屯
重地甯資夷服利
中朝猶見將威尊
鼎台多少賢人聚
一宿森森衛禁垣

百粵艱難轉戰還
將軍髀肉未消殘
壯侯遠略堅屯壁
新息雄風老據輦
半局尙煩收鹿椅
崇墉誰使失龍蟠
大星一隕長城壞
孰鎮東南列郡安

保障端推第一功
君王神武馭英雄
尙方裘劍恩榮日
老將囊鍵付託中
砥柱截流江控北
戰袍流血箭傳東
餘生裹革終何恨
回首雄師十萬空

荼毒沿江近可哀
闔閭城外羽書催
上官擁甲倉皇去
大將提

戈慟哭來橫草功名驚崛起潰癰時事情良才安危豈獨蒼生
繫首策應將沃土恢

錢江烽火燭天殷梟騎驚傳寇入關萬骨蒼涼叢戰壘一軍慄
慨誓刀環縱橫豺虎潛陰壑慘澹鶯花見故山地下羣公應破
涕看馳露布慰龍顏

李辛垞

齡壽

費吉甫

延慶

芸舫避寇來鄉酒間率贈

亂中消息斷忽報泊溪濱見面翻流涕無家幸免身驚魂呼酒
壓久語落燈頻暫此安行李浮蹤息轉頻

題辛垞近稟用東坡送沈遼赴廣南韻

李生胸次無餘子詰屈古心耿不死談空說妙舌未乾猶道撐

腸多磈壘追揅百怪入詩句追琢雖工餘事耳嗟余澀弦久不
彈英華坐耗飢寒裏盛時消索已如此再擲十年將老矣窮愁
困厄未暇憂事業文章竟何似君方辟地潛蓬茅我正守雌伏
鄉里提戈擊賊病未能縱酒狂談差可喜百年風運在吾徒僅
作才人亦良耻一尊相屬舍子誰努力千秋自今始

李詠裳

葆恩

辟居夏湖偕其弟辛垞往視

浩蕩風塵此息形尊前相對極伶俜離蹤久散秋林葉浮跡如
團急浪萍意外羈愁雙鬢白夢中鄉信一燈青亂餘豈獨朋歡
渺四處分飛感鵲鴿

聞陳子松丈

壽熊

被難後近狀

忍餓著書日還教厄亂離天心方剝極吾道此窮時老母幸無

恙佳兒偏奪之

二子被賊鹵

喜聞賢弟子

謂凌磬生礪生兄弟

高義力扶持

懷陳梁叔丈

克家

軍中再疊東坡送沈遼韻

四壁呻吟泣妻子十年飢走窮欲死關河橐筆遠從戎文陣堂
堂孰摩壘功名邂逅可卿相太息霜毛已垂耳壯心鬱勃長劍
中客淚銷磨酒杯裏江干盜阻幾生還辛苦顛連疑死矣前年
得讀軍中詩同谷悲歌杜陵似龍鍾老母盼音書疾病餘生憶
田里有才自昔多不偶失路徒令魑魅喜飄零晚節那復豪棄
擲英年真可耻歌成鄭重念斯文來者茫茫貴方始

立秋夜

露氣乍橫今夜白月光併照萬家明雁鴻苦作流離響蟋蟀難
平殺伐聲萬象蒼涼隨斗轉獨懷伊鬱借詩鳴仰天忽見銀河
闊波浪空多不洗兵

讀梁叔丈蓬萊閣詩錄

天網高張不解收坐令奇士入詩流腸間自薄商秋氣身外常
擔曠古愁滄海月高孤鶴語石崖風細一琴幽夜燈掩卷如相
見把酒聊將獨笑酬

言志

千搖萬兀孰禁當志士惟爭自立彊欲借風霜刊綺麗苦將荼
蘖戰膏粱心緣求道歸平澹文待藏山漸老蒼不見磐松幽壑

底凌寒柯葉更巍昂

呈婦翁時避居蝦蟆港

叩門驚喜到兒童乍見翻疑是夢中
翁髮已嗟無可白我顏非
復向來紅齎鹽蓄溜愁過日
衣帔蕭條怯聽風西望鄉園原咫尺
烽煙消息苦難通

哀陶翁

陶翁吾邑梓墅人業負販往來予家十餘年
頻爲余寄書左近間予以錢輒忤以酒餽酬之
歡然也歲荒族有力者方賑饑翁忍餓不受
蓋販夫而有古君子風焉今夏暴疾死哀之以詩

勞賤微生業朶龐古處風茫茫冠蓋外吾意惜陶翁

哀馮二

馮經字授之震澤副貢生黎里鎮人賊攻黎里君督戰
被執死之年二十五歲其友柳以蕃悲其志乃哭以詩
咸豐歲庚申夏六月八日賊陷黎里鎮馮子以戰歿憶維仲夏
初西來寇氛逼居民各騷動橫行紛草竊觥觥諸士夫大義起
倉卒召募固有素制勝憑練卒餘復糾民團按戶一丁出雖無
紀律嚴庶幾忠信結君時年最少銳意兀無敵巡奸佩寶刀督
戰控鳴鏑遂令兵氣揚滅此誓朝食鄰境方乞降君聞目眦裂
相送十日前極論氣橫溢我言多迂疑君志益勇決謂如功不

成舉酒視此別果然兩日內俘馘動盈百壯士色漸驕諸君力
稍竭一朝爲賊闖狡焉蹈其隙強援浩大來盡銳恣豕突西營
力抵禦東路被夾擊健卒勇裹瘡義民怒豎髮後隊奮戈鋌前
驅喪矢石維時千百家鋌走棄其室而君屹不動揮眾抵益急
力盡繼以死徐君泰一時匹散師四境空虎豹爭出沒積屍藉
草腥流血膏街赤哀黎果何罪聚而供殲殺致使魁壘士奄忽
爲異物君身旣溝壑我淚紛几席詎因私誼悲實爲時運惜自
從大營潰東南勢傾折不日陷數郡蹂躪蔓城邑方今廊廟具
棟梁自森列栱櫨與宗桷備才豈云缺胡爲大厦傾螻蟻但求
穴顧慙勢位高轉覺覆載狹庸奴旣負恩志士誓許國保身詎

爲智蹈險甯自賊一朝大節光終夜英魂泣雙親半華顛思兒
淚交睫少婦啼紅顏夢中猶恍惚有弟復罹難何處收兄骨孤
兒僅三齡嬉戲繞母膝僮僕亦慘悽里巷共嗚咽而況平生友
相關若余切憶昔歲甲寅與君締膠漆暨張子

伯衡

而三氣概各

奔逸酒酣好踞罵動遭俗眼白君恬不爲怪我已思結舌士氣
愾日卑君振以義節炎炎利祿場夷然意不屑才高境益窘親
在爲名屈戊午試京兆征車先後發意氣秋飈揚文章迅霆掣
咄哉操衡者輕重斷以臆君名落副車而余并被斥十月偕南
旋載途歷風雪自後會合希江湖散萍迹胡圖不兩稔幽明路
永隔人事善顛倒天道竟茫芴與子平生心揮涕難備述豺狼

尙縱橫兵革未休息音耗梗中途咫尺阻帆楫有孤孰撫教有
家誰存恤豈無親串存實負友朋責酒肴非君耆薦以雙淚血
神魂庶來馮我願誓終塞坐待解甲兵天運轉剝極至尊沉
堯舜宵旰憂反側國步終當安妖燄不久息萬民起瘡痍一郡
奠井宅行當送衣冠卜兆就窀穸行宜有文合累李翱謂辛
筆作詩告英靈風雨晝如墨

西風

變盡乾坤色西風氣尙遒殺機開蟋蟀物命蹙蜉蝣一士冰霜
志千家衣褐愁天心將反樸盡力埽奢浮

有懷楊利叔

象濟

腳底山川半九州暮歸已白十分頭軍中策略談空壯馬上功名願未酬孤憤著書風漢老等閒看劍酒人愁回頭卻數中興將半是行間舊輩流

黎里道中

煙水蒼涼獨繫舟可憐渾不是前游虛堂落日悲狐兔廢壘無人臥鵲樓桑海久嗟時局變鄉閭猶見戰場留廟堂他日接忠義應歎書生重國讐

以孟郊朝思除國讐二語行爲短歌邀辛垞同作

朝思除國讐暮思除國讐朝暮速復速志士徒沈憂天騁白日車地翻黃河流天地有旋轉世亂平何由中原嘯盜魁毋乃吾

食古齋詩錄卷一
劍羞酒酣仰天哭義肝何時酬

秋夜獨坐

辣酒峭詩骨怪花悽鬼魂涼心孤燭暈秋夢一琴言獨坐自成
悄健懷誰與論無端牀上劍颯颯動星文

讀孟郊詩和李五韻

天地一詩境變化根人情胡爲類商蟲一絲千愁縈物羣我自
寡形槁心獨生老劍涇彌古怪峰鑱不平信哉昌黎言硬語盤
空橫嘔肝賀早死瘦力島莫爭坐令一窮者苦吟老獨征不見
廟堂上大聲黃鐘鳴

秋日雜感

秋螢出腐草實感陰氣生冥行乘黑夜燭界寸隙明邂逅一遭
撲散亂仍縱橫天明白日杲何地藏幻形

空庭亂榛蕪四集攢蚊蠅豈不應時出鑽刺殊可憎吾無商飈
力埽蕩苦不能消長有天機嚴冬諒難勝

獨鵠叫殘月隻雁呼斷雲意苦鳴更哀各自求其羣虛堂悄掩
卷不忍側耳聞流亡滿中澤誰非同胞民

商蟲感衰運悲鳴徹昏曉風霜慘行令爾生何不早蠕動各無
心憂患乃獨飽因思草野間志士多懷抱

李五以和陶詩見眎時方讀山谷集卽用其還深父同年

詩卷韻題卷端

卷一
獨吟閉一室百憂枯腸煎得君和陶詩快意盡一編凡心妙漸
洗俗病俄蠲痊涼風灑然至水流雲潏潏霜菊粲微笑澹極生
腴妍此意邈人世適會耳目前我時劇思酒呼君浮觥船要從
溘悶中同返羲皇天羣動任喧噪一琴完無弦豈不常澹漠見
道庶幾賢簞瓢秉微尚不用儻來錢朝飧咀菜根夕糧餐蕨拳
歡處會吾意賦詩時一篇渾渾古茆茨滿室香蘅茝以此薦陶
公含笑歆九泉

晚涼望雨不至

暫覺胸中鬱結開虛堂涼思晚來催銀尊瀉影明於月鐵笛吹
空怒欲雷淵底蛟龍依舊蟄日邊雕鶚幾時來暮雲爲底閒飄

蕩不是爲霖別有才

村居

烽煙隙處隱江村
依舊粉榆綠蔭門
雞犬自忘安土樂
耕桑猶戴聖朝恩
買鄰客眾鄉廬貴
淘米人添井水渾
坐對直疑塵世遠
愛聽田父醉中言

晚行田間早秬已成實矣

十倍桑麻利全資
雨露恩歲功關社稷
寶氣聚乾坤天意憐凋
瘵人情忘飽溫
試看新戰地荷鋤幾人存

辛垞臺中有駿馬寶刀二題和之

一夜房星下人閒
萬馬空精神千里外
飢渴十年中豈不饒神

勇誰堪託始終無邊飛動意迴立向長風
五尺稜稜鐵曾經百鍊過鎡含太古雪鱗動蜀江波大將沙場
老中原亂領多此時無倚託懷抱欲如何

秋夜聞笛

天高月黑風悽送誰家鐵笛發哀弄中宵吹聚國殤魂不醒沈
沈戰場夢故人骸骨況未歸新墳三尺衣冠埋固知精魄疑在
世靈氣化作悲風來一聲一咽吹轉急攪亂愁腸成百結須臾
風定音響絕獨立無言淚垂血

追悼殤女

汝身僅百日病且計日逾微芽阮霜霰精竭能無枯嗟子貧寡

藉祇有骨肉俱孩提亦天性哀戀誰能無尋思世危亂簸蕩方可虞一身尙累親遑恤身所餘

送辛垞回盛澤

偈仄復偈仄送君故鄉行故鄉萬戶縱完土居人半化爲紅巾轉喉啟矛戟動足迷荆榛危冠或遭魑魅侮獨劒難與蛟蛇爭君歸何處潛其身偈仄復偈仄送君故鄉行臨行且立斯須戀風急飛鴻忽不見人生有恨無如別湏洞兵塵況靡極休嗟良會不可常祇恐一往無消息

中夜獨立作短歌

男兒勲業當令赤手扶八垓不爾生不成名死卽埋蒿萊中原

蛟龍白日闢天門虎豹陰風摧拔劍中夜心徘徊此時四望百
感集村雞三號星月沒長空無人行不得鴻雁退飛風正逆歸
來倚劍空嗚咽

婦翁家畜雙鶴聞喪其一悼之

一鶴飛上天一鶴老江邊天遠不知處江流無盡年世更桑海
劫客弔草亭煙哀爾孤鳴者何如蛻骨仙

大風與芸舫晚眺兼懷辛垞盛澤

北風蕭蕭叫山鬼萬木蒼涼顏色改此時四望莽空闊數點人
家入寒色乾坤杳杳兵箭多風塵行客當如何出門想見神魂
動纍纍白骨荒無塚男兒不合老蓬蒿毛髮無情成種種崢嶸

懷抱何由舒臨風念子增躊躇黏天衰草飛鳥絕何日寄我空中書

重過授之家

空庭寂寂長莓苔戶冑蟲絲几疊埃地老天荒君不返樽空燭
燼我重來抱孫出見衰翁泣隔院焚黃老嫗哀十載盟辭徒負
負不禁流涕一徘徊

重陽後一日邀趙穆仲丈

清穎

費吉甫錢君研

寶傳

梅冠

伯

兆魁

持螯醉賦

重陰黯黯鬱不開凍雨五日昏如埃登高無地出郊滑使我意
氣爲低摧仰看蒼鶻翼倒塌遠聞白雁聲流哀風塵浩盪陵谷

變坐聽雨鬢流光催黃花豈解傷寂寞笑口勸酌葡萄醅交游
湖海半零落能共痛飲知誰哉偶逢酒人遠駐屐兼約詩老同
銜杯登筵罄大足飽嚼羣龍轟飲聲如雷酒酣朔風萬竅發平
野莽送千愁來連城戈甲流戰血一國鼓舞存荒臺當時賓客
高會地蒼煙白骨愁成堆吾徒偶來葬溝壑百年一瞬終飛灰
浩歌擊劍喟然起傾動四座盡悲唉爲我各浮一大白醉倒同
臥荒江隈

短歌送吉甫芸舫遷居

朔風蕭蕭送子以歌來無可依去將奈何一解鳴鵓當軛豺狼當
衢雖行不遠攬衣躊躇二解蛟龍乘災激爲橫流出門湯湯以何

忘憂

三解

篋無餘衣盎無餘糧來日大難何言歲荒

四解

天寒集澤

鴻羽肅肅日暮返哺鳥飛啄啄

五解

四方喪亂言念王國男兒墮

地本無南北

六解

手無錢刀曷佐而行家無乘馬曷佐而征

七解今

茲瞻送落葉滿野我懷焉窮泣數行下

八解

霖雨頓止年穀無害惟下田稍歉柳子識天警之有在而

歎人心之不悛也思而作詩

一雨駛半月急湍來汪洋朝波漫港汊夜漲傾隄防畦蔬沒寒

碧隴稻眠爛黃晨炊冷土銼破屋頽泥牆農夫浩嗟歎我意深

憂傷政恐兵刃餘岌岌死歲荒皇穹薄垂警俄頃殃咎藏浮雲

一夕埽連晨藹朝陽出門望溝塍穰稔分成行寒波烘霽色動

搖生精光老農喜相謂排日行納場我雖不稼穡苦樂如共嘗
但期二頃田粗足一歲糧父母給甘旨賓客共壺觴家人不戚
戚僕從歡揚揚私計誠自得惻然思流亡誰無田與廬委棄走
異鄉骨肉幸完聚喘息存微茫中路或不保生死分道旁傳聞
百里閒殍骨紛相望平生胞與懷每飯僅不忘安坐向飽煖豈
不娛且康無功蠹物力福過潛生殃天地自高厚自忖何德當
豈徒一物然此理均黔蒼願言告鄉里急敦風俗良美德寶勤
儉大本扶綱常寒衣與飢食各自求耕桑庶幾神曰福妖孽永
祓禳恆道苟或棄在人先不祥作詩示懲勸擲筆彌恐惶

接辛垞書備悉近況賦此答之並以自述

開函寥落慰離衿
念爾端居百感侵
滿地橫流滄海急
閉門高枕屋廬深
窮途妻子添羈累
殘歲飢寒壓壯心
昨夜疏林霜力勁
凍毛蕭颯感棲禽

敝廬吾亦掩柴荆
臥聽刁騷落葉聲
夢裏朔風相警急
髻邊落日故分明
詩成窮巷人誰和
歲歉荒墟盜未平
打疊重重懷抱惡
破除惟有酒多情

用山谷寄王宣義韻贈趙穆仲丈

移家分住陸雲屋
供事但有盧仝奴
坐窗不遯木榻敝
鄉里未識此老夫
嚼詩白養古肝腎
對鏡懶摘霜髭鬚
一編在手百不省
送老那計齋鹽無
閒來就吾論義皞
得意偶共傾尊壺
清風

食古齋言金
古氣眼中少喜見此老筇長扶空山雪深兒讀書兒婦織裘妻
紉襦鄰燈三更歸老漁雛鶴伴冷梅花癯邯鄲有夢不須覓義
皇雖遠如可呼安得書中坐老渠白飯一盃茶一壚文嗜

寄周三佩之比部

景會

都下

王城浩如海冠蓋羅星棋隆隆車馬聲白日如雷馳書生蟄蒼
底塊獨守其雌伏案首不仰隱几頤默支終朝兀頑劣竊被僮
僕嗤出門足嘲訕馬狗車雞棲邂逅值公卿應對多參差同類
亦柄鑿滿眼輕薄兒久居氣抑塞如馬遭鼻轡自從一見子豁
達開心脾深言洞金石密意安絢綦爛漫不知止令我忘孤羈
京師習輭媚多士巧弄姿天風振奇葩各吐瑰瑋詞相向兩駝

駭豈謂他人知酒酣氣益振狂言肆紛披感激到時事引繩窮
豪釐明知非所職士冗官亦枝懷抱有蓄憤一發難禁持自是
策我駕舍子無所之見待況異禮不隔毛與皮北方地苦寒賤
者飽莧藜知我腸胃苦酒肉勤餉遺懸鶉爲我綴蹇驢爲我騎
閒招名勝游排日窮娛嬉方欣永朝夕詎解傷別離人事善顛
倒意外生乖齟秋高戰文場彌漫青雲思峩峩登進地黃金爲
階梯巢鷺豈有翼借羽供噓吹騏驥豈無骨索毛搜癢疵低昂
出人力妍媸非天司時弊有如此士甯死茅茨紛紛掉首去吾
亦舍子歸薊門山唯唯具區水瀰瀰浩盪三千程郵書無已時
東南忽鼎沸千里生瘡痍經年梗音耗而況相見期未知京城

中起居復何爲旨甘何所給輦悅何所資公堂案牒暇曾否鉛
槧施登山臨水日誰共傾縹瓷權門方煽焰千夫工脂韋諒維
戇書生莫肯華簪低一官困偃蹇萬事傷拙遲政恐振拔難反
坐貪冒譏我今百念絕堅臥空江湄全家託荒壤幸免兵燹罹
家鄉盪略盡遠近靡子遺舊交半新鬼荒狐食枯齒偶然留一
物詎非皇天慈又不自知足我甯神明欺誓將買薄田荷蓑耕
東菑細君事蠶績弱弟安臥單飢食粗糲食寒衣縫紉衣高堂
不戚戚家人相怡怡此願殆非奢倘免造物訾子如厭塵組其
來同耘耔具區水瀾瀾薊門山唯唯相思不相見遙寄歌聲悲

哭婦翁黃先生

耄年迫流亡身在力早憊七月訪翁寓

時避居蝦蟆港

苦言陳瑣碎有

生不如死此語惻腸胃泣然送我別執手期後會八月外姑病趨眠牀孽內我來翁歸家遇寇正狼狽九月來書言外姑病稍瘥聞翁中寒涼私念百無害余妻夢不祥欲語口多諱買舸促同行來已不及待致令所嬌女生死負恩愛哀言誌隱疚流汗空浹背

我年始二十作賓甥館居偶然一下筆見輒嘖嘖譽前年試京兆拳拳送征車謂可卽騰上豈意青冥紆懷書返南國再上名仍虛似此一無成排擯良有餘酒酣重慰藉聲淚與之俱此恩感已極而況非區區孱妻病瘵日殤女入構初我貧倚翁力感

被均體膚受恩不知報母乃非丈夫臨風瞻往事淚滴雙背枯

袁丈

青照輓詞

兵凶積陰疹流疫不可當屈指知交中某某奄忽亡袁君我父

友亦猝罹其殃聞言感存沒涕出情默傷憶交阿翁初小子始

有生

師莊切

往來閱寒暑漸成丫角童

徒郎切

嗣後十年見居然已

長成

直良切

忘骸狎小友譽我有文章再見我將冠喜我升於庠

又見越五年送我千里行

戶郎切

留連共觴酌頗訝君貌蒼猶然

偕吾翁譚詩氣慨慷酒酣贈我作語重鑄肺腸我時不知感但

解吟琅琅邇來結交遍豈乏才軒昂贈言動千百無若君意良

寇警慨日深咫尺睽舟航生未眠君疾死未哭君喪頗思掇遺

行爲文銘所臧致恐孤與嫠無力營窆葬

茲良切

交深父子間負

負慚友朋

蒲光切

趨庭視阿翁老淚流滿眶

哭子松先生

獨從堅苦證修爲孤詣寥寥識者誰中散形骸如土木君平身
世老著龜亂餘叢彙飄殘篋沒後虛堂掩敝帷從此斯文真種
絕淚痕豈獨爲君垂

高才從古數逢奇臨老偏教厄亂離捍母賊叢身受患著書窮
巷腹忘飢後人待闡儒林傳輿論同歸節義祠

里人以先生位入禊湖節義祠

心事分明終論定林宗還望蔡邕碑

東辛垞

辛酉

君抱令原痛

時君遭伯兄葵卿喪

我窮陟岵恩悲來同一哭情極反無言

蒼冥高難問青陽慘不溫嗒然相對處隱見寸心存

白日無迴景滄江但去波百年良短淺一瞬感蹉跎事業脂空

畫光陰墨浪磨安能了無就沈鬱老巖阿

昨暮出郊去登高四望悠哲人泉壤夢

謂南一子松諸先生

壯士國殤邱

謂授

物化原無盡吾身適有憂向來期許事舍子欲誰謀

有母今行老能高偕隱風每思先壟側給養退耕中世境波瀾

隔長歌畎畝終讀書如有意商略十年同

聞陳丈

克家耗

並世未相見臨風首獨搔美人今不作誼士古來高忠憤杜陵

志離憂屈子騷似聞秉孤尙欲挽世滔滔
東南軍事起感激動長歎仗劒出門去悲歌行路難高才戎幕
老戰血國殤寒烽火丹陽道淒涼返一棺
吾道將安屬頻年喪老成龍蛇真有厄天地浩無情白日馳江
海黃塵暗甲兵傷時兼感逝曠蕩百憂生

書子松先生題溪濱歸櫬圖後

道光某年沈南一先生偕先生試金陵少孤均未葬酹
江流而誓曰有歸不葬復涉者大江殛之旣歸集同志
仿楊園張氏葬社爲葬親會得各窆其先世沈先生繪
圖紀之以蕃自先大父母及先君子兩世未葬念文章

學問不敢望兩先生萬一而遭境之厄與所以有志未逮者先後有同感焉讀先生遺藁泫然作此

厝棺接疊難爲墳悲涕動與江流橫先人骨肉不能安萬事何者非罪人高天厚土自仁恕秋霜春露彌懷兢荒郊淺殯等暴露乃爾衽席偷餘生竭來喪亂況靡定緩置急舉非人情家貧力薄果何藉徒使每飯心怛怛今者披吟一再泣紙上隱隱同吞聲兩賢摯行夙所慕卒以百力輸一誠何當畢志繼圖詠退耕築室吾猶能青山青山定相待酌酒先與溪流盟

悼野鵲

并引

柳子泊舟荒村見樹顛鵲巢羣兒毀焉捕其雛獨老鵲

奮飛得脫盤旋數匝不能去感而賦此不僅在鵲也

中田有野鵲爲巢叢林端啾啁數黃口飲啄一窟安羣兒叫召
來狡獪謀一餐傾巢奪其雛墮落隨飛九子身勇脫險迴翔鳴
悲酸似傷骨肉盡焉用身獨完杜書生見事遲戚戚動肺肝普
天少樂土豈獨彼烏然寘身一失所衽席叢悲歡自非引決早
曷補俯仰寬懷哉慕高蹈鑒物興長歎

趙穆仲丈移研蘆花里市聲嘈雜中能讀書有詩云浩浩

世波涌醴醴書味親可以想像其懷抱矣詩以暢之

閉門埽軌甘抱獨日晏荒厨窘炊玉忽然寄寂渲沸中一角矮
樓童五六荒雞三唱市聲眾雜沓人間牛鼠閤風簾隱几不知

愁曲肱自作義皇夢科頭吟諷朝迄晡鄰里頗怪此老夫禽言
鳥語兒啞笑自出天籟相嬉娛須臾萬變皆消滅星斗涵空月
澄夕憑闌想見獨披衣返聽收聲玩真寂

浩歌

浩歌激越振風雷萬感千愁俯仰催累累古人泉下骨茫茫俗
物眼中埃荒江老屋無人共海水天山有夢來欲撫孤桐彈一
曲緣何卻立又徘徊

夕陽

一片殘痕慘不收絲絲紅入鬢邊秋獨含萬古淒涼色不盡中
原蒼莽愁天地何心齊入暮江山如此獨登樓憑他絕代丹黃

手無限傷心畫得不

重過小羅浮追悼外舅兼示內兄

應鍾

一片傷心畫不成酒闌感我涕縱橫墓門雲冷青山色琴館風
淒瘦玉聲屋外叢梅俱老態湖干雙鶴有前盟撫今思昔悲何
限落日闌干故自明

莫訝風光又一時此身如夢亦如癡素衣對泣孤兒影青鏡新
添病婦絲隔世歡蹤已如此十年燈火費追思臨行更爲殘尊
住亂日重來恐未期

舟行雜書

悄無雞犬出林垆十室蕭條九戶扃滿眼荒田人不見春風蠶

葉自青青

短篷搖盪曲沿溪楊柳隨人綠過西一道紅橋曾泊處傷心祇有乳鴉飛

怕揩愁眼看春風春在零星淚點中胡蝶飄零鶯燕散野花猶自盡情紅

遠堠無人綠樹橫夕陽望見堞樓明三千散卒歸應盡何處飛來角一聲

數椽古廟圯荒煙零落殘碑二百年意外淒涼誰寫得白頭老衲話滄田

一枝荒筆欲生荆刻盡愁腸語不新爲誦遺山淒絕句幾時還

我故鄉春

紀聞

宿將南征日祇星北指初四畿齊震蕩中禁獨欵歔廟有和戎
議朝無痛哭書勞勞宵旰慮亦恐未甯居

敢料安危體

借杜句

從知稜疹根爵巍驕上將公弱倚權門遂便

戎心逞紛干

國典尊寄言專柄者何策整乾坤

俞丈

岳

見過酒閒賦呈

鬚髯磊落笑談雄酒半狂歌激鬱中一輩沈淪皆異物百年搖
落賸衰翁此才坐惜儒官老待我仍多國士風那不因公生感
愧著書未就鬢先童

寄章丈

樹福

不戀浮榮意灑如閉門長與世塵疏
笛家自唱煙波曲篋橐新編鄉井書
君方輯黃渡志桑落酒香招里社
木棉田熟望郊墟而今一歷兵塵劫東望憑誰問起居

立秋前一日偕穆仲丈被酒張元之

文璿

齋中賦贈

亂餘身世話漂搖肝膽猶存意氣銷
向日追思皆有味中年纔近便無聊
俚俚孤子身如贅鬱鬱才人髯易凋
因念吾師老羈泊破書殘劒益蕭條

小慈師

一霎秋光又換新眼前無物慰悲辛
風飄水泊多新鬼時陶莊鎮失陷
地老天荒失故人謂授薄酒入腸皆化淚
舊游彈指總成塵相

逢莫漫頽唐極滄海橫流要此身

遺山句

懷辛垞浦東

李生別我一百日想見蕭條旅況清山館鳴弦孤雅奏海城警
角助愁聲秋風幾夕白雙髻歸夢一燈青五更惆悵雁鴻東去
盡無因遙寄此時情

贈陶芭孫

然

世上我爲至窮物草間爾亦可憐才相逢淪落如何好白眼舉
觴三百杯

山谷句

寄殷詹事文

兆鏞

文廟虛前席耆臣建議超直窮遼海事仰贊聖明朝嗣主

修新政中興翊舊僚暫歸彌戀闕已見鬢絲凋

逋寇三吳滿懷哉將帥臣楚中開盛會河上有清人誰速湘軍

下方當皖境馴乞援公等事早靖故鄉塵

不朽爭勲業惟言亦並崇緬懷諸作者

南一子松梁叔諸丈

各有起衰功

喪亂文多厄淪亡獻亦空行藏吾道合感歎意應同

夏晝齋居

萬綠抱一廬林遙邃以幽雞雛馴不驚好鳥鳴相求萬物生元氣吾心同悠悠灑然一幅巾穆與元化游

茸草展如帶落花澹無言閒窗玩羲易靜見天地根萬化靡弗徂暫將我自珍毋爲盛辭說目擊斯道存

座中有素琴悄悄類古儒撫之一再彈調高德不孤其人五百年彷彿來遇吾神理不可滅感合夫豈徒

藤樹爲大風所拔歌

草堂古藤四十年老幹岬岬枝鉤聯糾蟠大澤障雷雨映帶老屋生風煙狂鴟叫呼走下上驚蛇起伏爭蜿蜒陰森偪人竦毛髮未許鏟斲同榛菅文章氣焰壓光怪欲待遠勢同參天滄江老龍妒神物一夜猶吼走霹靂乾坤震撼瓦屋搖十丈盤空不能立風力壓樹樹欲低風聲攫樹樹忽飛殘鱗碎甲倒捲盡失勢一落若僵螭此時萬夫挽不能滿堂屏息無敢聲龍顛虎倒亦天意縱有人力難爲爭東南兵燹況未銷秦松漢柏紛摧燒

人民遷改物亦換氣數所值誰能逃區區一藤胡可惜祇恨吾
廬少顏色中宵繞室歌送之仰視皇雲正昏黑

松聲

不著十指處忽聞琴吼高一塵俱寂寂羣籟各寥寥獨夜空山
月天風大海潮此時憑几聽身世若爲超

除夜述懷

簷風動積雪孤燭耿夜昏豈無屠蘇酒欲飲傷我魂年年草堂
內侍坐傾匏尊長跼祝父壽祝母同康甯奈何今夕酒父已不
逮存舉杯勸母飲母飲但不言不言意可想腹淚隱與吞
村南有葬地乃我祖所遺在萬三十年電窅迄未治當年我父

心豈曰姑緩之時乎倘有待昌大甯無基奈何遭運蹇變遷乃
至斯而今不肖軀已矣何所期誓當百努力急事先營茲我父
不克見亦待母在時

我友多賢士愛我不我尤昨日寄我書勸我勤媵修人生在天
地賢聖非外求庸行一以薄萬事皆苟媿立身但無忝華實兩
見收我今亦無得年歲空復周懼終坐頽廢遂爲君子羞君子
之所羞我考之所憂

仲弟年十二季也相差肩呼之出家塾並立侍母前世人訓子
弟動曰科名先科名豈不貴所及親在年我今負我父痛極惟
自鞭皇穹倘垂佑尙冀兩弟賢毋終老母感稍釋吾躬嘗

有婦歸七年七年同食貧從來寒士妻功配弱國臣左支右彌
絀補剋殫艱辛艱辛勿復道憐子羸病身去年血大作膏旦常
吟呻今年血稍止氣弱體不振子雖諱於口我實憂以神奈何
負累重醫藥翻遷逡平生骨肉地慙負非一倫俛仰意無極擲
筆爲霑巾

食古齋詩錄卷二

吳江 柳以蕃 弢廬

元日

同治壬戌

鼙鼓聲中歲又新
壯懷寥落感無因
未填溝壑憂天下
無益君親愧此身
有道尙思全亂世
不耕已分屬游民
一杯清酒吾何祝
慈母康彊帝德純

立春日

東風著地冰雪乾
草堂一夜銷陰寒
百年流光寄鬢髻
萬物大春生肺肝
天心豈須龜筮問
吾道方作龍蛇蟠
今見陽和化兵甲
坐令海寓金湯安

宿雪未消孤月交映茫茫獨對感慨係之

積雪無底痕孤月有定影乾坤一色交夕氣悽以耿空堂久延

仁人語四鄰靜毛髮森夜寒心魄動遠警念彼擔簦人迷路安

所騁時金澤一帶流民多未歸者而沉溝中瘠骸骨相藉枕聞杭城數十里道殣相望情

緣萬物深志為羣生秉古人裘屨懷澹漠吾豈忍感激綴成篇

遑惜清夜景

哭婦兄黃大應鐘四首

萬不可之事如何竟至斯六旬多病母君生母年六十五三晬所生兒

極此孤嫠慘兼無殯殮貲蕭條身後沉一念一淒其

重重考妣喪三月存相當君於前年冬遭父喪去春又丁嫡母憂相距僅三月大化曾何

酷而君又夭亡一家嗷哺急兩世厝棺荒縱未遺言及捫心詎
敢忘

有妹生同腹嗚嗚哭失聲家門今昔感骨肉死生情癡喚憑孤
櫬銜杯奠一觥直從親歿後今乃更無兄
回首重回首蕭然破屋秋孤燈昏入夢一
姬黯言愁蛛網楹書
亂塵封篋豪稠弄臧龐已畢拔涕告于幽

送少甫丈之滬上

分湖湖水綠于煙露葦風楊畫裏天那不此間常住好坐無錢
買一雙田

海上羣公半故知丹青時乞一圖之誰知中有江山淚莫漫爭

餘古齋詩金卷二
諗皴染奇

清明日挈兩弟祭先君權厝

清酤一榼薦紙鏹幾陌焚煢煢三孤兒祭陳于府君生前缺甘
旨死乃徇具文矧伊歲一週而未安窆窆生男不養葬何以生
男云哀歌振空郊一慟天應聞

過大義圩

山色湖光遠近明牆桑畦菜綠縱橫一抔已卜先人葬十畝難
忘塋舍耕社北枌榆俱長大谿南鷗鳥有生平他時終遂編茅
願先與池流酌酒盟

辛垞至留宿焦桐館

孤懷墮莽蒼蛩響起荒寂乍見神轉驚一握喜動色厨荒出飯
麤語久落燈白用籀石齋句離觴飲未闌忽忽動於邑先公君夙交
忘年契肝鬲山齋幾觴詠醉墨灑滿壁當時誰見者槎枒一藤
立滕今化龍飛何況聚散迹愴懷各悠悠來事更芒忽

宿黃氏瀟東林屋感成示婦

依舊溪楊綠單門谿雲谿水遶籬根松楸新妥高原葬外舅姑及內兄

春間安葬

風雨重傷舊客魂壁上琴猶悽作響畫中燈欲澹無痕明

窗拉雜三人影苦語零星酒不溫

內弟寅酒見款

而母龍鍾六十餘而兄中道棄諸雛蓄畚誰守先人訓珠桂難
炊寡嫂厨至戚鄭徐何所訪舊人蕭史尙來無平生別有難忘

食古齋詩鈔卷二
意不覺沾衣淚點麤

朝來

朝來慈母倚門歎升米今朝滿百錢
問道流民滿溝壑舉家食粥已神仙

贈袁鳳桐

鳳桐

袁君眇小六尺軀神骨硃碑膽氣麤
東行假道偶此泊長揖訪我江干廬
自言家世本豫產先祖作宦遷杭居
杭城一變禍倉卒老母死難家人俱尋骸
虎穴五被擄隼逸始獲逃且孕鞭笞撈掠
極慘楚身上摧剝無完膚閒關出險走千里
魂魄飄轉隨路隅豈無故人問消息高榜姓氏
招通衢

王君孟英

殘生丐活良有

地不洩血憤終非夫觥觥邵侯今碩儒薦士爲上曾公國書曾
公愛才天下聞顧盼頃刻生風雲大雕橫擊要鷹隼正賴爾輩
開其羣吳姬鑪下三更酒醉膽淋漓作龍吼宇宙誰爲感激人
我歌拊掌君昂首歌聲漸闕酒力醒東方月落晨雞鳴出門四
顧無行人蒼茫看拂征鞍行笑指腰劒期功成

感懷

滿天星斗臥空巖靜夜霜鐔寶氣含恩怨不銷非壯士飢寒能
忍亦奇男困窮那必關天地出處從來有荷擔便欲陰求豪傑
去酒酣秉燭逞雄談

雜述六首

十日困陰雨柴米莫能繼全家在西風衣裳不得製
烏鵲告我寒鳬雁告我飢飢寒我自忍莫告慈母知
呻吟重呻吟婦病不得藥不藥猶且可奈何困操作
朝喚弟讀書夕喚弟讀書農賈兩不任焉用爲腐儒
髯翁貽我硯貧極不能守老婦嫁愛女欲割不忍手
有田無顆粒良不如棄捐棄捐又不忍重是祖父傳

仲冬十六日奉先祖考妣及先府君兩殤叔匱安葬于邑

之大義圩詩以述哀

嗚呼我祖考下世踰卅霜永貧窶窶艱靈匱安殯堂其西兩子
附瓦屋僅一廂默祈家稍以次卜竈藏胡天降酷罰痛懼我

父喪呼號歛手足權厝祖厝旁冰霜橫原野豈不痛我腸願言
早負土力弱焉支當淹留倏兩載時變加捱攘無已呼同志同
志僉曰襄

地惟舊壤佳時惟仲冬吉形家爲我友

沈君嶺梅

規制助周畫經之

復營之凡十有二日霜雲兩晝低心與杵聲亟

鐸石齋句

皇天信仁

佑爲我止風雪詎惟皇天仁眾手實陰挈梅翁

竹友

首通財潘

凌

磬生

賻遠及彌縫叔有功

蒨庵

奔走弟一力

淵甫

諸君盡義分而我

感何極報恩恐難言一思一哽塞

哭婦十六首

癸亥

婦黃歸于我曰九年於茲黃柳本舊姻行輩爲等夷我生少負

才婦淑多令儀時年俱十四沈翁憲修之十九我入學廿一始
結稿始來入我室黽勉奉帚箕我時出就讀踰月旋別離慇懃
事公姥羞膳謹所司歸來我父母顧我顏色怡謂得新婦順婦
順家烹宜

我家素勤儉相傳凡四世我父值中衰早歲更多事我母相我
父勞瘁無不至汝以愛女來竊揣嬌惰易甯知懇苦情委折動
人意我生多姊妹情性或稍異汝能善彌縫瑣屑勿輒記家庭
事繁劇百不舉一二要惟舉動間闊略明大義

汝初在家時父母倚汝切父尤鍾愛深呼喚必於側傳聞方嫁
時老懷慘難別媵以一嫗來囑付周纖悉嫗果忠所託心盡不

惟方明秋汝歸甯匝月返我室汝旁不見嫗曰遣已十日我聞雖不言心若轉闕然假非諒我貧焉忍中道捐

三年生一女產難瀕危亡既絕得復甦呱呱驚在旁十日汝兄來嫂氏遺繡襦衣女出見兄是日始下牀越月兄有書母命迎歸航甫歸病復作失乳女亦疋家貧傭媪艱幾日女驟殤重以悼女故纏緜成膏肓乃翁愛憐劇叩醫周且詳投藥五十劑脫然身爲康

更生既欣欣遠別重惻惻戊春我入京親在爲名迫從容送我行了不異顏色所憂孱弱軀何以任遠涉七月明河明八月白露白九月肅霜肅木葉紛以脫檢我篋中衣一一汝手疊十月

我下第倉猝歸未得書來苦相促三復動心魄人生父母在安能久爲客微烏解返哺奈何不如物

歸來復歸來而境苦日貧明秋邀曠典借試杭州城匆匆復報罷歸舍住浹旬遂就官聘出襁被當湖潯汝時顧我語行矣宜自珍丈夫志有在衣食胡因人因人亦有道所貴惟守身松柏稟貞介金石無緇磷君誠勸此志庶幾能事親

飢驅苦未已時變忽傳烽遂有溝壑嗟豈直傷艱窮我父隱憂劇戚戚神內訐當食不下咽氣隔病在胸兩月病已篤累藥不奏功皇天降酷罰奄忽以壽終哀哀我窮民母老弟幼冲孤身當大事百力倚汝躬汝躬豈不瘁捫擋無倦容十日血再咯素

衣爲之紅艱哉喪次情厯厯吾目中

父喪甫一期而妹又議嫁凶次行吉禮草率安足訝頗聞訕笑
聲嘖嘖滿旁舍禮疏意固慚心勉力又謝旁皇以躊躇此責賴
汝卸分奩補其闕治具彌其罅居然幾日間筐篋色生乍倒麓
搜汝裳脫贈不償貰物微何足言我心庶慰藉

明春求葬地卜曰先壤吉兩世凡五棺負重匪易釋淹留復淹
留歲晏事方畢勞勞一寸心與汝豈朝夕嗟余孤露來門戶日
艱棘父恩何如深予力何者竭因循賴汝箴言輒刺心骨言今
猶在耳吁嗟忍重繹

前年哭汝考去年哭汝妣哭妣旋及兄哭兄復及弟汝非汝妣

出有母六十矣死者艱多竈生者闕脩髓衰門坎壞多一否乃
至此而余休戚關萬事敢坐視唯苦俯仰餘爲力正無幾我懷
彌歛然汝悲更無已自從別親來滴淚未乾皆

沈悲日盈積百病乃以來纏綿痼瘵成藥薄良難醫猶然強起
坐軀幹支孱羸今春幸小閒戀母迫欲歸送汝置母傍見母顏
色開胡期病轉篤女呻母歎唉我時負米急淹留申江隈淹留
豈得已浹月書兩催馳歸速往視心知疾難爲權詞強慰藉扶
掖同舟回

回家就牀褥一臥遂不起慊慊息僅屬自分早莫死泫然牽我
裾謂負君惠多豈其忍訣絕緣盡無如何願君尙有爲養志宜

及辰毋以悼我切至傷哀老親顧君未有子似續當急圖毋以
念我深致損單羸軀我聞心骨悲彌復感其賢旁皇不能答腹
淚如涌泉

精亡息僅存陰盡陽不偶一霎脫離盡千喚不回首是時夜正
半一燈閃虛牖從容易衣衾秉燭天明守是時衣衾外喪具了
無有彌縫絕不言意恐傷老母旁人憫汝賢僉曰殯宜厚儉貧
素吾位悖理虞獲咎矧今喪亂辰溝壑什常九汝死雖可悲猶
幸死吾手

汝有閨中友恩勤比兄弟常時會面稀迢遞隔一水昨者病中
見驚魂雜悲喜帖喃語夜闌兩別泣不止生離且難堪何況今

悼死吁嗟同居人苟或不知己中誠一以睽對面若千里甯知
真氣存敦篤有如此九原豈無靈銜結定何似

死者長已矣存者當何如連晨排闥來逋券如戰書頻年債而
食略遍親與疏下策就質庫乃亦良區區尋思來曰難百計無
令圖汝魂誠有知爲我應長吁長吁亦奚益窮厄吾命夫所嗟
同心人不得同艱虞

陰陽不停馭日月去如箭萬物故者新人死不復面豈其無所
親思君日靡間平時甘苦私轉輾在一念嗟余年未卅顏鬢日
衰變以身坐窮愁竊恐終貧賤安能十萬錢私願了齋奠感此
彌自慙心酸淚如霰何以報平生永懷託哀戀

贈陸雪亭司馬

日愛

卽送其之滬上

大道日淪替多君風誼高有懷慕裘廈何物是錐刀坎壈纏中

歲艱難看鬢毛

杜句

忽聞薦書下感激起蓬蒿

事業吾何有文章世所輕不才甘棄物多難拙謀生尙有衰親
在終思息壤營讀書兼力穡含哺待時清

過婦家

亂後重來款舊門入門無語已聲吞廢廬冷落無人守近事淒

涼賸僕論

時兩姦遷徙未歸僅一老僕稅居者存焉

野外難尋新瘞冢

外少姑于去秋病歿余以

寇阻未往莫茲訪其冢茫然不復能辨矣賊中猶有未招魂

婦姪元椿被

今宵若遣

泉臺覺多恐難乾血淚痕

食古齋詩集卷二
寄吉甫都下

甲子

溪上春風唱柳枝
江干秋色又霏微
蒼茫碧水孤鷗隱
浩蕩青雲一鶚飛
盛世文章公薦剡
故鄉時事息兵機
草堂依舊淪漪好
準待重來照錦衣

過金澤訪何丈

其超

卽贈

襄陽耆舊今無幾
此老風流尙可攀
跌宕語言莊老外
崢嶸詩句孟韓間
舊交零落疏杯酒
新竹參差夢故山
晚號藏翁空寓意
草堂築就未能還

宿黃聘阿

爾常

五畝園寓居

六曲雕闌傍水紅
當年嘗此倚春風
無端記著傷心事
一桁湘

簾似夢中

兩年前時偕
內子過此

七旬聾嫗箇儂識語舊喁喁煩久立勸渠莫更問來今三十潘

郎鬢毛白

過黃氏瀟東林屋

細路彎環曲繞池繚垣帖石半傾欹天桃紅到曉鵲處細柳青
於繫馬時簾外春痕慙似夢鏡中愁鬢瘦成絲傷心一角雕闌
地獨倚東風有所思

苔

不雜零花細草妍東風吹綠滿庭煙湘簾不捲文紗掩深院無
人又一年

食言金卷二
奉 太孺人匱安葬先塋述哀六首

乙丑

白日蹉跎痛自鞭荒郊淺殯忽三年一邱纔合先公兆雙穴同
封大義阡幸有高文銘毳石忍能餘痛釋祥絃回思癸亥初秋
月萬古傷心屬纊天

牽母他鄉正避災中元家祭命兒回兒辭母僅終宵頃母棄兒
難一見來萬死何能聊貸罪七情從此只知哀淒淒我哭天應
曉三日愁雲慘不開

太孺人以暴疾歿於金澤旅寢適不肖以家祭歸里相距一晝夜竟不獲親視屬纊

哉痛

偷息人間不孝身流光多事屢回新具裝已嫁愆期妹主饋初
更委任人架守藏書聊課弟田耕破硯劣支貧後堂花木都無

慈猶是當年灌溉辰

有事沈吟痛莫禁第三弱妹九幽沈瀕危尙記牀前語欲哭防傷地下心二十四年成短夢百千萬恨了從今最憐無母兒三歲長祝慈靈保護深

外家零落感難忘亂後田園儘意荒屋北桑稀猶有徑溪南榆老已無堂兒時隨母嬉游慣往事於今宛轉傷太息此情誰語得比鄰陳媪亦前亡

萬種思量一念并徘徊邱壟不能行亡妻權厝依旁壤殤女靈魂附祖塋骨肉無多分半去形神雖在亦堪驚買田築室如償願老我攜鋤傍墓耕

馮明經遺像

明經余十一年至友也庚申六月殉難里門尊府善慶

丈命題

披圖先欲哭髣髴見平生禦變倉皇節居鄉捍衛情報君宜有
後事我夙如兄無以酬知己相看愧面頰

骸骨收何處滔滔碧浪寒荒祠酬俎豆淺壟葬衣冠酒爲招魂
設銘虛伐石刊題詩重灑淚秋草墓頭乾

王丈與沂鶴守龔遺圖次君樹人索題

兵火無端裂故山忠魂豪葬萬梅間漂流一鶴知何處忍見淒

淒一鶴還庚申吳江城陷丈罵賊死長君樹年與次君同被鹵次君旋脫歸而長君之耗杳然矣

婦伯黃秋鶴文

濤

蓼灘圖文孫

元芝

索題

松葉酒香開
養碧稻花雞
脆入槃黃蓼
灘灘畔吾曾
泊記與郎

君

季安

舍飯石牀

滄桑一變事全非
羈泊文孫遊未歸

元芝時館郡城

太息元家蘆雁詠

羽毛單薄稻梁微

展卷沈吟意重傷
瀟東田在亦俱荒
年年幾斛秋收米
怎辦孤

嫠十口糧

余婦翁徙宅瀟東置繞屋田數十畝今亦荒落矣

省試登明遠樓

丁卯

萬人叢裏此登樓
空闊眞昂天外頭
殘劫江山非昔日
畫欄風月又高秋
登龍地壯臚羣士
汗馬功深感列侯
誰放人天清淨

食古齋詩鈔卷二
眼急搜杞梓貢皇州

停雲樓雙樹圖爲沈叔平丈

日康題

老去需翁已十年座中人物半飛仙
酒樽寂寞詞壇冷不待攀條已泫然

叔子相逢今亦老支離身世歎無歡
不須暮景傷搖落留取青蒼晚節看

沈琛崖先生

烜

賓鴻閣圖爲叔平題

高閣峻嶒枕水根閣中人去畫圖存
百年姓氏留詩卷諸老風流潮酒樽
湖上鷗鳬如有舊夢中泥雪了無痕
重來已愴需翁逝懷抱蒼涼孰與溫

贈謝松齡丈

雍泰

卽題其近藁

貴豪公子世承平
花月銷磨少壯心
已見滿頭飄白髮
不堪垂暮感黃金
紛華戰退詩才老
湖海歸遲酒病深
爲問何門堪跋履
浪彈長鋏不如瘖

由京口至秣陵途次有作

晚泊京江櫂巖城
氣象開通衢
自車馬海市孰樓臺
估舶雲帆聚津亭
暮鼓催旅懷
渾欲倦沽酒引深杯

侵曉揚帆席金焦
望裏過雲中
聞落磬鳥外看平波
浮世閒身少寥天
曠抱多篙師頻笑問
君去意如何

一折入葭葦
新河路幾程
隄高渾作障
山眾不知名
寥落居人

屋荒涼瘠土耕棲霞青到眼獨樹暮天橫

水行方轉陸我騎僕乘驢自歎十年內幾回經此途具餐勞野
店問姓識輿夫斜日行程盡金陵指舊都

送芸舫入都

一踏青雲事便忙征車纔息又舟航鵷鴻身世宜軒翥玉枝
柯漸老蒼在昔詞臣參諫議況今史館待文章平淮碑記中興
頌看挂高名北斗旁

仙樂曾同訪九天罡風吹我劇狂顛雲泥遽判三生迹閭闔應
無再叩緣北燕南鴻睽羽翼東鳥西兔猛答鞭青山青史無窮
事各有心期指盛年

周丈

憲會

遺象令子

鄰表鄭表

乞題

辛未

倉卒雄關起劫塵守無城郭鬪無兵告援空上管門牒瀕死猶

聞巷戰聲寶劒英風常咄咄神祠卜兆昔庚庚千秋一死甯非

吉雙節同懸白日明

丈謁選時禱於宮傳公祠卜分省得直隸吉乃就臨洛關同知卒殉難妻蒯恭人妾

郭同死之

俞丈

岳

山水遺卷應喆弟

岱

屬

少日鸞騰翰墨場中年餘事擅丹青騷壇可抗湯都督老筆能
傾戴侍郎天外飛仙俄宵邈畫中山色恣蒼茫平生終負林泉
約空使人傳舊草堂

掩卷蕭寥忽有思水村回首避兵時分箋曾結新詩社折券頻

開舊酒卮往事卽今餘悵惘名山自古重留遺
恰逢難弟珍殘墨鱗爪無多替護持

悼徐治伯丈

雲斤月斧雕肺腸才人例少身牢強螺翁作詩千首外八十二
霜乃仙蛻平生自怡惟淡泊手種梅花身是鶴我嘗看梅三過
君鶴骨更比梅精神以梅作妻逋故事君不能孤乃蓄婢花開
日日喜鵲鳴老翁七十嬌兒生世人苦究導引訣朝嚙紅砂暮
白髮如君灑落天倪全天全乃以全歸天精魂在空魄在土敬
告梅靈護終古

送陶方之模之官文縣

蒼莽七千里驅車獨自行雲方辭岫出泉尙在山清生計全家
紉官裝一束輕十年堅忍操及此見平生

萬古陰平道河山壯覽觀地雄資保障俗敝仰招安經世空談
易親民實政難知君千萬策胸次早盤盤

公餘偕父老攜酒一登臨形勝傾西北胸懷拓古今悲歌詩史

筆演易聖人心

縣爲美里故所見梁芷林方伯筆記
於唐爲同谷乃少陵入蜀棲息處也

想見低徊

處悠然思獨深

相望情何極相思路正遙吳江春水闊秦隴暮雲高出處心原
合初終道可要哦詩寄征雁匪獨惜哀勞

女阿藥生

人情重生男況值中歲踰呱呱女墮地聞者顏少愉念余平生
來事事人不如茲雖意未足慰藉良勝無紅茵乍捧出玉雪瑩
肌膚閒居百無事摩弄生歡娛外家更鍾愛矜寵名懷珠男母寄名
物情貴所罕男女焉有殊所望長成易聰慧能讀書龐知義理
則藉報撫育劬他年得佳壻一笑聊慰余

婦病踰月因至外家就醫詩以送之

涼風一夕至木葉催帆飛憐君抱病久送君轉依依念君入我
室十載甘藿藜長貧憂慮煩顏貌損昔肥奩中舊跳脫纏束辭
臂支箱中舊羅裳綽約寬帶圍含愁卻不言揣昔知今非世情
重伉儷恩愛皆暱私我鈍君謹厚相得要在微書幃月皎皎藥

銚煙霏霏期君病早瘳一笑看君歸

得張伯衡

文璿

書卻寄

王中

凌晨有客至攜示吾友書別久語意繁三復開襟裾聞君近無
事古籍供陶愉有官謝不仕歸其兒讀書回視同年子幾輩揚
軒車無心異流坎在世分榮枯詎知閑泄中樂事轉有餘薄田
方秋成高廩充黍稌歡然一斟酒邀迓鄰農俱導揚天子
聖宣德通鄉閭相期息爭訟亦早輸稅租高歌贊王風報
答誰言無寄詩附客還吟聲酣遽廬

沈春勇兵部

元溥

奉諱回籍訪余紅蕉館寓夜集沈嵯尹

文濡

齋中酒閒賦贈

食古齋詩金 卷二
十年不相見乍見喜欲狂坐久語始密悲喜環中腸昔別君未
鬢今見顏頗蒼披懷尙軒豁話舊多淒惶上言老母逝下言良
偶亡難難畢喪殯返櫬附海航便思挂衣冠壟墓守故鄉坐無
尺寸田那得安耕桑人生有命分安用多校量書生困咕畢何
似白首郎高齋燭屢燼主人行催觴無端骭髀作起立椎酒牀
因知平生心相尙猶軒昂明朝各分別含意徒相望

哭聘阿

癸酉

與君早歲同游鬢嗣託戚誼爲我兄我能狂歌君痛飲意氣往
往相崢嶸自遭寇亂各方壯天運人事俄變更衰親先後感風
樹病婦奄忽凋霜英淒淒素衣嘖瑩泣切切錦瑟彈離聲干戈

未息搶攘禍家室同厯艱難情偶衝鋒鏑走相見已有白髮愁
邊生我依湖濱誓守墓君走海上方避兵謀生無計託商賈投
謁有筆干公卿高車入市畫轂逞廣筵結客華燈明旁人色駭
獨我諒壯氣硯碑知未平乘時富貴謂可致豈意垂橐歸柴荆
庭前苔綦散賓從室內塵甌啼孩嬰中年憂患最損性世路奔
走能疲精每來見君曰憔悴不復意氣騰縱橫無端感癘患下
泄如刀攪腹常呻嚶故人有藥急難療謂吉卿辛蛇舉子挂帆紛將
行赴省試披幃別君尙危坐望我得解心怛怛天涯半月凶
訃至慘念殯殮誰爲營歸攜斗酒奠靈寢萬狀觸目皆堪驚嬌
兒收淚述遺語凡所付託堅心盟嗚呼作歌顚冥鑒不覺流涕

食古齋詩金
卷二
紛霑纓

哭沈雨春

文澍

荒郊父骨未曾寒
孝子傷心又蓋棺
重疊告凶家變極
去尊甫
之亡僅權宜立後廟祧單半牀遺稟人誰弔兩世幽竈事未完
七閱月
回首科場酣戰地可憐熱血幾曾乾

贈沈蒙叔

景修

卽以乞書

君才英妙兼眾長
惟有八法無人當
長絨短幅一揮灑
遂令屏障生輝煌
少時作書極姿態
美女對鏡簪花妝
萬毫寫禿銀海
眩嫵媚不作彌軒昂
風雲走峽猿鳥舞
雷雨嘯澤蛟龍翔
蕭蕭江天古梅落
裊裊晴晝游絲颺
枯藤伏澗鱗甲偃
古劒闕匣鋒

棧藏惟其胸次靡不有落筆變化能無方當今

聖朝重文

翰譬毫早合升巖廊凌雲獻賦不稱意歸借絕藝娛景光閨人
磨墨婢捧硯日有所作盈縑緗每逢醉筆恣奔放壯氣猶未平
慨慷嗟余弱冠學吟詠得句往往傾詞場中年失意百事廢坐
令筆墨成頽唐空齋兀坐作孤諷無復金石鳴鏘噲技臻絕頂
亦非偶遜君志氣能堅彊投詩乞書重感歎爲我援筆抒愁腸

庭院

庭院夜悄悄美人睽素襟香銷留迹細燈撥見心深璫札絨初
就銀河闊不任高空何處笛吹月轉花陰

仲弟

文藻

入學後將於九月中畢婚詩以勸之

食古齋詩金卷二
十年爲弟師晨夕同一硯仲氏藝粗成方中秀才選懽忻博一
矜辛苦歷三戰微名何重輕立志喜弗倦聊能慰兄望痛不逮
親見仰惟古賢達大半出寒賤植本苟無虧光氣久乃絢正惟
人不知天意早深眷瀧岡昔有文大界今作傳巍巍名臣業眷
眷孝子戀懷哉企前修勿僅充時彥

仲春行釋菜季秋詠結稿今人婚娶早踰冠已覺遲嗟予當室
來家事紛如絲三嫁甫乃畢百籌方及茲代親自我職所盼家
室宜勤勤外塾課勉勉中饋司了無箕帚諱但有琴瑟怡融和
藹一門如我父母時能行父母道卽此徵孝思俯首聽兄言并
告新婦知

擬古四首贈婦

美人翦絲機貽我一疋絹瑩然大素色意緒密相冑惟素表光明惟密工繾綣裁量爲衣裳用答平生眷

美人檢繡奩貽我雙玉環本非一氣生連環殊無端玉有君子德環有不解緣佩之纓帶間可以諧永歡

美人解錦囊貽我三尺琴琴材製何妙軫漆徽黃金金以喻其堅漆以形其深無言契微旨不在鸞鳳音

美人啟金盒貽我百和香幽居日一焚坐覺煙篆長煙篆久乃息含意常芬芳始知中有得形迹端可忘

秋日閒居雜賦

不覺秋過半端居意趣長
代妻評藥券呼弟檢芸綱
得句糊齋壁傳書趁野航
菊花期近在例有一時忙

支銚便呼酒安爐白煮茶
僕羸勤薙草婢醜愛簪花
旁舍哦書闌鄰居築室譁
老夫醒午睡嬌聽女呶呶
遣興忘長晝耽幽坐夜分
撥糧防餓鼠燒艾辟荒蚊
細勘生徒橐重編舊友文
燈花連夕放何事報相聞

小圃軒楹外秋光潑眼盈
晚花籬綴豆早實樹懸橙
石筍穿牆暗風窗換紙明
依人常不去禽鳥愜幽情

最識農人樂環村二百家
梗香鍋飯軟醬熟盎泥加
園芋收紅梗籬薑斲紫芽
鄰翁開晚酌邀我話桑麻

耕外非無業生涯倚水村種菱繩作界斲蟹竹爲門販艇喧湖
尾閑蓑臥樹根似聞湖稅減飽飯長兒孫

近事多堪樂熙然景太和賓盤充饌肉廟祀設神鵝俗富冠裳
麗年豐嫁娶多少陽人散處彊半醉顏酡
亦有吾家喜婚將仲子諧兄題金鳳帖嫂製玉蟬釵季月卜云
吉新人添更佳明年莧酒會湯餅祝相偕

秋戊日蒔菴叔挈弟輩恭送伯母俞楊兩孺人叔母錢孺
人嫂沈孺人及余庶祖母王孺人位同人邑中節孝祠
余以病不果往敬賦是詩

五節褒同姓如綸

聖牘言鉤邊歆特祀祠宇妥幽魂白石

蟠終古彤編煥舊門
吉蠲升粟主獨未薦蘋蘩

姑蘇道中

扁舟搖兀趁秋晴
路轉塘坳漸近城
蓑隴水深牛穩臥
稻田雲盡馬閑行
開篷翠揖羣山入
傍堞紅呈一塔明
忽有戰船銜尾出
懸知南海未休兵

夜泊王家浜

近城無十里遠岸有一村
暝行急投宿老翁拱揖迎
因翁問土俗戶戶養犢耕
低區植菰米利較年穀贏
更種蓑衣草劃心然燈明
一物得兩售婦功日夕并
吾儕近城居利與阡陌爭
因之簡人事四時無閒氓
偶然詢城中不識官姓名
但聞捉船急何

疆方用兵吾儕甫安息所怕聞戰征君看村中屋八九猶草楹
語罷翁自去取酒吾獨傾明晨抵金閭看閨中秋燈

青浦黃母沈太夫人八十壽辰令子哲生孝廉

家麟

徵題

甲戌

九峯勢崔巍三泖波渺瀰鬱茲氣清淑於母實萃之母生幼端
靜嫁黃年甫笄明經賢早世十載榮爲婺疆存撫孤子母教兼
父師惟時境大窶百事艱柱檣典衣忍嚴寒咽糠充苦飢母呻
子亦泣子學母則怡卒成名孝廉於世爲表儀文孫復挺出早
歲英聲蜚門閭漸昌大而母八十兮孝廉亟養志一官辭塵羈
吾友熊純老闡揚無浮詞爲母作生傳寓書徵歌詩松筠磊磊

節華黍油油思真氣兩蟠結母壽當期頤題詩作左券笑引華堂危

松江晤張玉珊

鳴珂

時在李軍門幕中

戎馬歸來未合并萍蹤偶聚五茸城事談滄海多餘咤詩汰風華漸老成賓館秋清晨草檄海曷烽急夜談兵萬言空抱書生策殘墨磨人氣未平

時臺灣有夷警

寄芸舫視學中州

卿雲麗霄漢威鳳翔蓬萊三年隸朝籍著作高金闥一朝被使出軒車揚旌麾馳驅豈不瘁十日官程催大梁古帝都名勝夙所推自明河患後陳迹亦稍摧揚鞭過夷門振策登吹臺雄奇

愜俛仰興替餘徘徊豁然寄長歎萬古心顏開

地靈人亦傑積氣由中和嵩高恣槃礴大河流滂沱猗古聚神
聖逮宋名賢多爰及聖清始徵君首渡河羣儒萃一門睢
州尤巍峨流風被來哲百年今未過豈無有志士導軌揚其波
使臣主文教振興甯由佗閎才力提唱實學殫投羅徒言尙文
采章句空揣摩高談獻微尙遠望心如何

昨者李孝廉尺素蓮幕貽述君夏五月珍禽摧雙飛君時在陝
州驛書星夜馳途次得凶耗哀悼良可知矧茲貧賤偶艱悴久
其之殊榮甫霑被中道俄乖離重以王事迫倉卒虧恩私此
悲詎能解而我差有辭君身屬朝廟早受特達知春華絢朝

食古齋詩錄卷二
日補報當及時長年役道路尤貴勤護持願言珍寢食勉釋中心悲

蘇郡兩徵分纂府志愧無以應而江震猶懸其人因介熊

君純叔

其英

任之

郡志綜九邑採輯分彊隅羣才赴高會徵聘辱鄙儒孰謂此責輕利病關一書掌故溯沿革人物懸褒誅貴富識體要豈獨矜補苴鄉居寡聞見職重防才疏顧念文獻廢瞻望深躊躇借材實吾地薦賢甯敢居

四十述懷

立身爭百年四十未全老因思去日多轉慮來日少秉氣素辱

薄憂患嘗已飽昔時壯盛顏覽鏡帶枯槁昔時軒翥心伏牖成
潦倒著書了無成學道苦不早如何米鹽中屈折寄懷抱及此
痛自鞭寸陰以爲寶

皇穹不我佑弱歲爲鮮民高天厚地間負負罔極恩賤貧值世
亂急事先營墳餘力畢妹嫁以次籌弟婚凡此廿年中艱悴難
具論仲子今入黌季也方屬文仰被先澤厚或用昌吾門如余
太碌碌四十猶無聞

鸞膠續良匹生長出執紼委心甘賤貧珠繡易荆布相安一十
年免我憂內顧誰言新人嫌不敵舊人素我生福易慳累子疾
成錮遭迴茵枕閒百事猶在慮肝衰血不藏少喜多慍怒醫言

食言金卷二
受患深平言待時愈竚俟春風回厄運週一月
流波無還態耆舊日凋落緬懷道咸間吾猶及老宿論文溯韓
歐講道探聞洛一從大雅亡身世久索漠吾友熊與李懷抱持
恢廓軒然世波中風氣砥頽薄其力百倍余問年實相若追陪
樽俎閒相向能無忤

文章本小技安用傾鄒枚鄙至帖括業識者尤見哈我生困科
目溺此精力頽運斤亦良苦獻璞翻爲災咄哉自貽咎於世何
嫌猜異兒志千古識量當閎恢苟能自樹立出處皆瑋才撫今
徒歎往盛年不再來

復齋詩錄卷三

吳江柳以蕃 跋廬

陸丈

日復

扁舟避難圖令子

陸

屬題

光緒乙亥

殺賊提戈氣莫伸
扁舟衝險脫驚塵
破家已作流離客
有母當全患難身
滿地風波迷所往
周天羅網浩無鄰
短篷聽盡沙灘雨
誰識蘆中大有入

累我支圖重歎欷
亂中相見極低離
夢魂纔脫重圍險
肝膽淮留一劍知
偶語總關經世務
餘生未見太平時
尺縑心事分明在
爲語賢郎善護持

婦病未瘳禱方於金盞山
遇陳翁子鞠論道頗得翁湖州

人嘗客遊半天下庚申之亂因老母死難遂託黃冠以
隱次章卽贈之

一鑪香火禱靈壇婦病三年欲療難藥鼎遍嘗人世味砂囊要
乞上方丹活人自是神仙願在世難忘骨肉歡卻有四齡嬌小
女拜空同我禱平安

萬人叢裏識癯顏枯坐蒲團百慮刪滄海已枯纔悟劫孤雲無
住自歸山閉門高節鱗生杖入定禪心虎臥關安得相從雲水
老縱橫憂患滿人間

陸君啓重繪夢遺草堂圖屬題

金溪司馬老詞客冰是肝腸玉爲骨無端夢落西湖中清絕孤

山照顏色夢回攜得孤山雲玉笛喚起逋仙魂仙株仙羽雙到

門堂中種梅數十株蓄鶴兩隻主人疑亦仙之人司馬風流不可再草堂我

我名自在當時結交盡老蒼日日飛觴縱高會文星酒星都上

天君亦躡迹追飛仙梅荒鶴老二十年我方展筆題長箋夢魂

惘恍搖春煙

遊金蓋山夜宿古梅花觀

一徑入幽翠劃然開洞天雲深初見院梅古不知年昔讀是山

記傳聞百八仙無由訪遺躅日暮思悠然

萬籟嚮晨息半山鐘一鳴鳥外宿雲起樹頭初日生大千塵際

夢孤客定中情安得遺人事幽居息此生

食古齋詩金卷三
婦病服壇方得瘉賦此志感

苦難全消轉吉祥鏡中眉色頓生黃神仙果有忘憂法花草都

成療病方

方用忘憂草合歡花

春去秋來三載劫天長地久一鑪香報施

願衍生生理坐看池魚樂未央

喜仲弟舉子

秋光爛熳黃華籬買醪獨引華間卮忽聞歡聲沸蓬華阿連新
舉麒麟兒全家笑語走相屬圍繞香盆看兒浴紅蘭嬌小蕊吐
芽紫燕輕盈雛脫殼啼聲一試何啍啍繡襦照曜珠璧光貧家
景色久寒儉陡若春氣回門牆心知英物倘果爾剝復循環有
天理先親潛德宜顯揚或不吾儕定此子焚香酌酒薦家廟長

跪紅瑜敬相告中男有子父有孫地下今朝酬望抱我生命還
百事遲四十未子甯可知眼中先澤有繼者快意那不同居奇
回看我女亦慙絕拍手花階開笑靨明年嬉戲待相偕準備榮
中分棗栗

一僕

一僕老且聾衰孺不任事一嫗性善罵與婢有同嗜嫗常欺僕
聾對面輒詬詈而婢左右之謠聚若有勢齷齪糞土言喧攘競
嚙吠詈僕未畢聲嫗婢忽芒刺嫗工亦舌翻婢善白眼視面爭
兩不下背罵嫗亦厲尋丈庖廚間終日如鼎沸旁遭鄰舍爭上
觸竈神忌主人豈不聞忍怒容爾輩貧家傭役艱恐益病妻憊

欲逐姑復存未更幸得代遂呼嫗來前令覓啖飯地幾日遣婢
嫁駮女歸蠶塋潔我井竈場埽此蟣蠹累老聾亦去去去曝茆
檐背

芸舫寄示悼亡詩八章言愁悽惻能令讀者不歡感歎賦
此

六街歲鼓催年暮我友駮征猶道路霏霏雨雪滿關河側想行
程在何處一作飛蓋走
鞭念何處素書一尺來征郵封題發自古鄧州開
函急讀忽不快八篇詩訴哀絃愁初言結婚離亂中數年同我
罹阨凶河心沈舟寓屋火奪身出險心常忪繼言京華隨冷宦
連年又共居貧慣官閒俸少僕從稀瑣屑米鹽多手辦
君

恩一日頒除書奉使河洛馳軒車遠臣例許挈家室祿贍稍慰
襄艱劬使臣宣化長行役馬發函關纔握別瀕行猶累治征裝
誰料中途死生隔回轅觸事傷心神勞人愁人兩苦辛詩中隱
約不盡道怵恍懸揣如聞呻才人鍾情自古有感此彌增伉儷
厚長年疾病醫藥艱可憐亦是糟糠偶賤貧骨肉難爲懷富貴
永別猶可哀兩般心緒各縈結百年好抱真難開噫吁嘻百年
好抱真難開安得大風送我君旁來與君痛飲三百杯

除夕

屠蘇飲罷歲云除清坐黃昏一事無粉壁燈明梅作畫紙窗風
緊雪跳珠山中甲子編詩卷鏡裏容顏變老夫四十一年如夢

過不堪回首憶亡逋

華亭張篠峯丈

鴻卓

政績圖遺冊

丙子

能具通儒術何官不政成世皆輕冷宦君獨見平生畫橐忽陳
跡豐碑猶頌聲大材吾轉惜未用宰斯氓

寄懷詠裳卽送其之宿遷校官任

公車五度走京畿幕府三年滯客駢久歷風沙殊未老隨緣飲
啄總忘機人無俗韻官宜冷士肯長貧見已稀莫向斯人惜蕉
萃絕勝低首老江扉

千里攜家出故關敝裘羸僕客裝辱風濤卻盡江南路齊魯分
看境外山地不耕桑生理薄土鳴弓槩誦聲閒誰言儒術多迂

闕定有書來一解顏

題開鑿草堂

四三丈地闢林巒一百年餘此獨看凌霄樹木空生籟傍水軒
密迴貯寒曩藤絡石盤盤翠曲沼游魚寸寸瀾最愛天光雲影
合盪人胸抱十分寬

除夜同辛垞韻

丁丑

亦知去日比來多日日歡娛便幾何況是愁腸如海闊暗將絲
鬢逐年磨祭詩盤肉貧還設入夜鄰雞凍不歌

鄰雞凍不歌山谷句

薄飲

未闌已沈醉山妻多事酒漿羅

元日同辛垞韻

戊寅

迎年爆竹入晨多人意喧闐我若何隔歲書無逋券至逢春弟
尙藥鎚磨梅無世故庸知福鳥有天機自解歌一炷清香禱方
寸從今憂患莫紛羅

又作

陰氣三冬悉斂藏瞳瞳日影曉生光歲初例有迎新事晨起先
焚省過香臘雪入年猶漬白鬢絲何意漸加蒼東風已破春消
息吹動梅梢數點芳

立春后一日辛垞見過

荒村寂歷掩柴荆忽聽楚音一笑迎人似東風來有信春隨北
斗轉無聲酒杯細數經年事病榻同銘再過情

兩蒙爲仲弟治疾

燭盡

匆匆下船去隔鄰雞唱已三更

東芸舫

雲泥睽隔歲乘除老友田間鬢髮疏
漸覺雲蘿忘世故尙煩軒
袞照江廬一飛一鍛風中鳥
相照相濡水上魚最是別來心
慎重藥丸遙寄伴封書

蒙惠仲弟藥物

時安叔六十壽

悟因先生年六旬誕初五日月仲春
舉觴爲壽謝通例自嗟老
境方遘迤草堂寂掩風日好讀書危
坐聲鏗鏗家人僕從各無
事意中已忘懸弧辰俄來一客盛冠
服雅尾銜映頭銜冰捲書
急起笑相揖延陵公子乃吾甥益盛
大酒槃硬麪願祝公壽遐

無垠始知攬揆是今日不覺狂笑爲掀髯是時先生庖斷肉戒
不特殺烹葵菹舅甥勸酬作主客卽席大醉傾十觥竭來爲我
述佳話恭念盛德今罕倫豪門酒肉鄙勿道膠守儉節徒斷斷
先生節財能善用不以自壽福在人謂減佃租及助賑中州事仁心善氣益
流行歲月自荷天陶甄眼前濤浪頓篙楫風定波息舟徐行夷
途一轉百無舛爲耄爲耄常康平老人齊眉孫侍杖玉花高立
雙嶙峋爾時鞠脰進觴竿壽君未敢辭不文貽書吳甥急邀迓
滿堂轟飲忘主賓

漫成

成仙成佛兩難期富貴無緣況已遲入世最難平福占遵時惟

有退藏宜江潮一長復一落明月自盈還自虧了徹往來無盡
理化工參錯不須疑

苦雨

入冬九十日冰雪縣接春陰雨水剛晚穀未舂餅早罄溼薪無
價竈多荒雞啼深巷門扉掩鷄啄凍泥菜麥傷閒向老農說徵
兆倘教入地埽遺蝗

遺蝗入地應千尺東坡雪詩

送純叔礪生赴河南賑飢

豪傑從來善用財起援溝壑肯徘徊三千里路舟車役廿八縣
人蝗旱災時事補苴今在下青黃調劑向須才
國儲官俸邀
恩遍辛苦壺漿越境來

榮陽不作梁溪逝義俠風聲淒窈然曠世難逢振奇士斯人能
讀救荒篇欲傾勺水資滄海安得銅山鑄販錢去去離羣獨惆
悵故鄉春雨正連縣

讀曾文正詩集

文筆崢嶸邁皖桐詩才倔彊見奇功一時作者空天下四海宗
風屬相公丹鳳獨翔朝日麗蒼龍孤嘯海濤雄韓門當日收郊
島太息前賢遇合隆

歲暮卽事

埋影空村已百旬
鬢髮臘鼓歲將更
病多晏起心常警
貧少煩愁夢亦清
調藥慣勞妻品味
誦詩閒聽女成聲
暗中瞥見春光

動牆角梅花遍拆英

除夕

白日堂堂去卽遙已過一萬六千朝身如林樹驚蕭颯世比江
潮疊長消向日自期皆幻境百年多感是今宵酒酣有意無人
會獨向天空看斗杓

元旦

己卯

兔走烏飛日夜狂一年又是起頭剛

邵子詩剛是起頭時

風光不解何多

態人世潛思有底忙因病閉門忘寂寞側身懷古獨蒼茫無窮
志業蹉跎甚癡想彭聃比歲長

展黃氏室人遺挂愴然有作

遺挂分明忍重看病姿悽楚不勝寒心含黃檗三生苦淚化紅
梅萬劫酸若使丹青能解語直教仙佛也無歡來生莫再生同
室已負今生欲報難第五句化東坡不解語意

人日陳翼亭

麟

徐攬香

藻

偕過草堂酒間書贈

一樹梅花一病身東風爲我聚嘉賓酒痕潑灩春江水人意敦
龐太古春佳節偶成知己飲悲歌遙念大河濱純叔男兒安得常
無事食力翻慙隴畝民

立春日作適辛垞寄到元日坐雨詩自謂筆墨乾老不復
如向之渲爛細味詩意在邵堯夫陳白沙之間較前進
一格矣因同其韻

靜知節候翻驚老病對時光轉惜晴寂寂戶蟲猶處蟄庚庚斗
柄已東橫小園花發雨三點一日春生千萬聲剛得故人詩遠
餉靈苗養我玉池清

散步至村寺小憩

佳境多於靜處逢暫從古刹息塵蹤到門野水如鷗淡守戶江
雲似客慵野老何祈爭擲琰殘僧多事苦撞鐘人間一瞬皆陳
跡畫壁蒼松已化龍

舟行簡辛垞

病夫乘興獨拈舟行過長隄又短洲半吐幽花香在骨一分新
草短於愁年年歲歲春誰主暮暮朝朝水自流卻有胸懷無與

食古齋詩金卷三
語美人天末水悠悠

觀伏敵堂詩弔江弢叔混

造物有心摧壯士世途無處著狂生遂令筆底雄奇氣恣寫人間涕淚聲白眼放歌惟痛飲青山留約未歸耕千搖萬阡甘貧死異世應悲倔強情

新正過禊湖

梅未舒萌柳未芽苦寒無賴勒芳華杯盤節物新年飲簫管春燈太守家儉歲風光添爛漫愁人心緒怯紛譁征車忽念南行客店月橋霜殊未涯謂赴中州振荒諸君

夢中過詠袁宿遷官舍

二十年前舊游地茫茫陳迹感飛鴻洪濤終古劃江北昨夢從
君驅馬東堆槃苜蓿兒女癡搖筆風雲海嶽雄醉後狂吟忽驚
醒雞號鐘動惜恩恩

追和辛垞丙子元旦述懷韻卽以奉寄

少年去去若爲留白髮無情亂上頭人世榮華千幻夢海天游
戲一浮漚月圓靈府心常朗花落春風迹漫求要鬪樽前身現
在子來猶待巨觥謀

贈汪虎溪貳尹

守愚

次章仍疊多字韻

尉曹卓犖孟東野丞簿寄盞梅宛陵下吏風流今幾見斯人標
格古同稱齋分山益甜逾蜜

辛垞以酒製萊腐奉貽有詩紀之

梅種官花冷自

冰有約尋君邀瘳李醉吟看寫剡溪藤

此邦歲歷四三多

陳後山詩歲歷四三仍此地

佳趣於中間幾何名士歸田

常苦晚冷官愛墨不辭磨巷無宵警容安枕戶有秋收聽賽歌

喜得公移文牒少臣門何礙雀張羅

挽笠雲從弟

天門跌蕩開元旦塵世悲涼失此人生有自來明去路死無遺
憾奈衰親告凶鵬鳥臨庚子入夢龍蛇應巳辰不有退之傳子
厚羅池誰信竟爲神

頻年講席憶追攀暇日相尋一解顏契爾語言文字外事余師
友弟兄間壯年如此猶淪落老境何成況鈍頑回首最傷同歷

地秋風三度秣陵山

讀子松先生靜遠堂詩集

兀傲心光縱復橫卽看一格見平生冥思直到精微域孤調如
聞唱歎聲峭石得雲渾縐痠寒潭無潌只空明此中妙境憑誰
悟佗想當年獨往情

得純叔袁浦道中書卻寄并簡礪生次章用純叔贈辛垞

舊韻

遠道書來慰別腸乍經袁浦息征裝長圖大念方無已水驛山
程那計長坐感淪亡心愴惻起看天地色悽涼山用半句遙知一路
郎當鐸已送輪轅入大梁

食古齋言金卷三
編排首清戶口冊絡繹兼寫公私文艱難何暇恤心力勞苦可
以強骸筋與時霑灑卽霖雨得志變化皆龍雲眼前且作快心
舉林林鳩鵠方成羣

冠溪壽者吳松千詩

世途擾擾溺嗜慾日出膏火相灼煎野人自安麋鹿性真氣不
洩龜鶴年同堂四世備乃福耕田百畝全其天縣官旌門表人
瑞冠溪壽者吳松千

重過臨流閣

孤坐生通峭池流一閣臨樹高風聚響屋老畫生陰怪鳥有時
集蒼落如此深凭闌思舊迹寥落動長吟

昔年黃君
聘阿居此

芸舫自閩中使旋傾談三日夜別後卻寄六首

凌晨書信至星使返征輪訪舊偕癡叔開樽半故人

辛垞蒙宣叔均至

情清似水古誼暝於春三日因君住相將惘款伸

八閩瀕海地海上聚瓊瑰淨洗塵中眼窮收天下才山川終古

壯風氣一時開朝廟需人物虛心待後來

長路驅車返青山□□□蠻鄉詢土俗旅迹記郵程

出縣使郡閩日記

縣裁供億關津簡送迎江神安用誓貞白有平生

別有不如意無言獨損心時情誰與識我意劇相深總帳悲猶

昔蘭芽望自今年華善珍重毋使患憂侵

去去幽燕道北風吹雪寒力强能耐事職重敢求安風捲河聲

大山連朔漠蟠此時對樽酒能弗念湖干
輦下人文聚菰中歲月長雲泥雖迴絕車笠願偕臧伊昔相期
事君今或少償名山應我屬誰信鬢先蒼

挽純叔十首

忽自放聲哭遙傳純叔亡與時彌大厄以死殉奇荒人事寒飢
渴天行雨雪霜將身擬金石磨耗亦難當

尙記登程日哦詩送壯行星馳千里驛風動一方聲孰謂書生
事所關當世輕告緡四十萬的的活殘氓

行者皆豪俠而君力更殫事兼親瑣屑義不避艱難蟣蝨滿蓬
髮蔓菁供菲餐直教生事廢一意軫飢寒

早難稍蘇息橫流殊不虞築隄資保障踏水勘菑區猶渴希師
聖勞形等役夫有時中夜起夢寐發號呼

七境勞安插遄行及衛輝屬當冬賑急不告歲終歸人事
覆天心疑是非半途要稅駕誰測杳冥機

峻絕彌留際寥寥寄姪辭餘功惟待葢一事不言私肝膽
熱神明噉獨知此中分儒墨莫以殉仁疑

公義當優卹誰裒地下魂側聞冢吏奏仰沐
聖明恩道尙今

民直功同古社論大書熊惠愍立廟徧山村
死信得其所生原有自來孤童遭亂起大任自天開人謂振奇

士吾疑作聖才九峯氣迴薄鍾毓亦神哉

況溯淵源自門庭大有人發奸兄訟振仗義叔傾圉卽此全家
善能推一體仁至今頌遺愛甯獨豫中民

逝者千秋矣而余淚益潛書終淮上筆君豫行後於袁浦一寓書夢斷峪邊

關君書有青海峪關付諸夢想之語後死未聞道餘生孰訂頑斯人不可作矯

首恨天慳

除夜七首

四十五年一瞬中眼花頭白太怱怱人間老亦非吾獨我卻先
人成老翁

年時催得淚痕枯仲弟前亡伯姊殂骨肉長離天不老青陽又
逼歲華除

置身憂患真無賴縱意歡娛亦太癡解得安心無上法渾渾浩
浩學嬰兒

飮盤肴脯酒盈觴供具親煩老孟光一瓊壽君還自頌牛衣歲
月鎮無央

世事前波引後波番番流轉態何多不知誰作空中劇都向先
生冷眼過

頗聞門外歲聲譁儉薄民風炫百華已覺道咸風近古盛時何
況際乾嘉

鄉居風味羨農田自食惟資筋力堅老我儒冠成底用只餘歌
詠答堯天

沈祥叔秋窗讀書圖

庚辰

昔見君畫扇上蘭風格澹遠無由攀題詩其上亦清絕此才空
谷嘗三歎後來索題讀書圖臥病瑟縮吟情刪已聞新功到聖
處那有鉅筆爲雕劖君師匏翁近詞伯得句往往追蘇韓常時
學書亦學畫畫必誇子書讓蒙叔傳聞湖之水清潺潺得此三
絕天不慳匏翁蒙老吾好友獨未見子心猶饒何當丐子寫巨
幃梅花一白水一灣裁量體勢要疏落匏詩蒙字參其間裝成
爲我補空壁明窗大几生波瀾病夫局戶百無事日日對此鐫
疏頑

翁穉鷗秋雨哀弦圖

房龔黯慘空無人秋雨一滴弦一聲弦聲雨聲錯雜鳴秋情哀
思相合并此時愁人奈何許棖觸當年萬千緒雨揉作淚弦刺
腸淚盡腸推向誰語噫吁嘻秋雨自夜夜哀弦自年年離枝落
葉那可返逝波一去無時還人間憂患結不解便有星星白髮
來頭巔願君從今大解脫毋自催愁送老切切聽雨聞離弦

葉五友蓮屬畫工肖其影顏曰吟詩入定圖因道其命圖
之意來索詩作短句報之

交君歲癸丑一少一壯夫忽忽廿八年我禿君髯鬚境地亦
千變面目惟一真君欲見真面貌取身外身畫者操絕藝格
相無不稱惜其太矜嚴一笑僧入定入定禪家言苦吟腐儒

事兩非君所好適肯偶焉寄 圖成索我詩我病方頽然移時

靜對去各領無言禪 竭來洗筆研為君吟短句心光自相印

不在工言語 近余亦繪影麤服頭不巾山臞澤臞耶髣髴何

代民髣髴乎何代之民楊園張子自題象贊語也 號圖曰獨立獨立知良難期君

其矜鍊晚節森歲寒

李君懷川以姊馮烈婦徵詩冊屬為追賦

嬾人殉夫惟一死遲七十日得所矣行權守正兩不刊臨變能
裁有如此嬾初喪夫夫有孤為夫撫孤心不渝嬾心撫孤孤又
殂嬾無孤撫仍隨夫吁嗟乎殉夫撫孤理則一生死之間反掌
決不能見節乃成烈三尺紅羅一命絕是為同治六年七月廿

六日距夫之亡越兩月與夫同穴孤附側夫兄作文紀其實兄
上其事顛旌卹我弟之婦婦女弟爲我狀述窮顛尾當時從容
處決一一如見之越十四年乃復濡筆歌此詩

追哭伯姊

前年哭仲弟去年哭伯姊年年送骨肉吾淚亦乾矣上天下地
了不聞西沈白日東流水

秋感

狂鳥癡兔各西東儘力催人日夜同無底愁方如海水可憐聲
又起秋風事多動魄驚心處人老歌離歎逝中始信乾坤偏我
厄不關飢凍有奇窮

養疴雜詩

名崇脫然去病魔纏未休身如蟬飲露髮似柳經秋一嬾今成癖孤生昔善愁乾坤方廓廓何事苦拘囚

兩月扃扉坐澄觀得妙思篆爐風定處古井浪平時但有月孤照并無禽下窺百年清淨業會與此相期

習靜猶非靜知閑已不閑若還空見地所在卽深山世境儘酬接心靈如往還本來無一物塵障自何刪

一笑出門去閒情與目謀無根雲自落不腐水長流物態何行止天機妙去留幾人方作劇空際起高樓

八月十五夜客禊湖時門外燈市甚鬧靜坐作此

支肘松窗靜欲眠聞塵未了耳根前
大千月色圓今夜小市燈光又一年
行水笙歌無斷續得時花柳各嬋娟
誰知正有無聊客酒醒香銷獨悄然

十六夜又作

晶瑩三日天難夜萬族奔忙共一癡

下三字摘用蘇詩

滿月已含微缺

影好燈誰看欲收時風光過眼空多態造物何心亦好嬉
一靜又將羣動了世間隨事有推移

靜故了羣動亦東坡句

除夕

百年三萬六千朝去去光陰一半遙
昔日兒童皆抱子少時朋舊半登朝
花無凡骨難妍麗木有冬心耐寂寥
飽食甘眠長自

食古齋詩金 卷三
祝任余癡鈍任人嘲

少年風味我曾知老至鬚眉自鄙夷
身幸無材供世用日常多病與閒宜
晨餐茹淡知初味清坐焚香戒妄思
學佛學仙皆幻想養心真訣視嬰兒

元日 辛巳

歲朝偶占甲子曰農謠適應西北風
山中寂寂簡無事笑摘梅花酒甕中

簡苑齋

世態紛紛日萬般倏如湯沸倏冰寒
事當老去平情見名在人間息影難
風定潮平行路穩天空海闊置身寬
此中消息誰同

渺渺思君撫瑟彈

題楊利叔欲寡過齋遺詩

書五千卷動足一萬里男兒負恢奇誰能老泥滓方君挺出
時自謂蜚龍起時會不得乘縮身返湫底同袍皆公侯顛頓獨
如此人生遇合間由來不可擬雄心漫無向一激成跼蹐獨來
還猶往自悲亦自喜婦人醕酒間跌宕甘老死旁人不知然曰
此風漢耳佯狂豈無因俗論徒可鄙留待千載下悲歌弔奇士
觥觥十卷詩按索從劫灰故人李子遠篤風義寶若械瓊瑰昨者
落吾手廓廓眼界開江河信大物龍駒非凡胎直從洪黃後突
兀見此才詞章本小技下筆疇恢恢風華外娟靡蒼老中摧頽

其或貌奔放雷釜空囂虺雄才世罕出出又遭天猜往往未老
大橫被冰霰摧斯人亦已矣眼中誰後來

同匏齋春心一首韻寄託微邈亦如原唱所云不自知其
意何著也

春雨霏微薄似煙春心如夢又今年不堪影事多飄瞥何處芳
心著邈繇水往復回回又往月圓仍缺缺還圓愁來只恨媧皇
石不補人間缺陷天

答匏齋見贈之作同韻

無影無聲值夜分窈然無見亦無聞人天兩寂方知我消息微
通欲證君數點紅梅春若笑一茸綠草雨爲耘眼前暫領元機

妙不覺虛窗過白雲

漫成

山可遷移海可填誰能緩得日輪鞭
少多大志空成幻老惜餘光但學顛
癡想希夷同入夢遠思盤古是何年
我懷不獨非人解笑我猶難自得詮

中秋夜寄元簡

寂歷雙扉掩草堂得時花月讓人忙
一年又惜朋樽阻兩地同勞藥券量
曾訂禊湖觀燈之行余以女病君以婦病均未果鏡裏新愁催鬢影
燈前獨坐見心光良辰洵美予懷悄
側想江干意正長

聞元簡抱病寄懷

一雁起遙汀。千林榭葉青。煙波浩空闊。風露耿蒼冥。之子方高臥。無書到遠翎。願言荷樵笠。一爲采松苓。

得元簡書知病愈再寄

燈花紅隔宿清曉。得來書病似寒潮退。情同倦鳥疏勞生。難宴息厄。運有乘除閒臥。宜觀易天人意了如。

重九獨酌

匏公堅坐病腰腳。否老堅臥病肺脾。二子不來戶牢鍵。雖有樽酒誰對持。黃花泥飲如有私。啼烏勸醉亦故欺。一杯滿酌飫酒趣。我自得我非人知。興來作歌告二子。不醒不醉將毋嗤。

九月晦日候元簡於勝溪家塾。卽贈用山谷體似耶不耶。

神耶貌耶我元簡必有以鑒辨之

入門一笑先問疾告我寢啖頗兩安卻令黃花愧顏色疑有白

石生肺肝

上句此形瘦也下句況肝逆也用姜堯章白石歌中七十二峯生肺肝意

千金上藥安可

覓七發妙文何不觀勸君披懷亦自勸要使病腹毋酣婪

余患少腹

氣墜病有年

張丈

椿齡

遺影

流波無迴態耆宿紛凋零峴然舊文壇閨寂誰主盟先生夙實
敬談論常側聆俛仰廿年過我髮亦不青

神仙果有無達者皆慕好

丈喜丹錄家言

悠然會真詮何元亦何妙咄

哉塵寰夢終古難一覺不見圖中人拈花示微笑

塔影硯齋圖

朱君晴江

洛

得石硯背有塔影築室貯之自爲倚聲紀

其事繪圖屬題

雲根出深山何去亦何住偶然落几案一著不復去明窗日摩
挲圓妙生覺悟誰道石竟頑中有我佛趣

歸然現一塔是塔原非真本來影似耳真幻何必分一影得了
了眾影如畢呈不見諸寶相皆自無相生

主人本妙人參透書畫禪將硯徵書畫禪理元又元問硯何自
來問塔何因緣主人不能答白雲笑無言

徐鉉山過訪作兩夕談皆癡語予獨以爲未嘗癡也歌以

解之

達人好隱遁而翁隱於癡癡非果可隱一癡了是非翁少恩闌
闌結客輕財資亦有他嗜好怪怪而奇奇一歷值垂老貧病交
相欺假非急行樂笑口開何時遂收秉燭光以癡相娛嬉謁來
叩我室索我酒十卮忽狂忽歌舞忽笑忽涕洟爲我盡癡態曰
我能渠知我觀名利人不癡常若迷誰肯作癡狀貌癡心無疵
願翁抱癡老以癡全天倪天全得長壽百歲如嬰兒

辛垞曾夜夢如少年狀有詩記之偶憶其事作此爲戲

人生能得幾時好一霎韶年換衰老直從老至思少時少時面
目誰得知無端夢神作狡變還爾春風好顏面莊周化蝶猶寓

言此夢應教昔人羨醒來顧影仍老翁
夸說夢狀驕兒童兒童亦知夢影幻
但咤逐歲顏加紅君戲鼻與君齊年我老醜
常是輸君開笑口人生但得遊戲如神仙
眼前白髮生春妍與君一笑皆少年

得潘二莘田書問近狀作詩報之

短翮棲遲絕可憐楚南游倦復幽燕
官場結納工千態中道槩停又十年
病眼觀人心轉了勞生隨俗骨難仙
由來士賤無長策不信爲官亦政然

一介馳書叩戶嚴潛夫誰識已深潛
苦思述作才先盡偶說名場夢亦嫌
點化元野外葵蔬鄰餉足山中筍蕨婦知甜
鷗波一

笠弁終老略述疏慵作報緘

邱君毓芝以鳳尾竹一枝見贈索詩

邱髯手種鳳尾竹愛護檀欒如惜玉無端割贈青琅玕謂與韜
翁慰幽獨韜翁戶寂常不開簾紋搖綠春風回是日立春湘雲粲粲
落几案疑有碧鳳雲中來是生只合鵷鷺侶不上雲霄溷塵土
鳳棲空谷憤長飢怪得枝條瘦如許升沈遇合我不關日日對
此娛清閒槎枒肝肺久不作但期晚節砭疏頑老髯嗜竹世無
比兼嗜我詩將竹抵我詩可稱竹高寒問竹不言還問髯

除夜

滿堂笑語已東風人影團團燭影濃老柏多枝生暖翠冷花無

食言金卷三
語發春紅墮簾藹藹弟兄樂觴豆雍雍夫婦同好與山中魚鳥
約安心泉石伴韜翁

元日散步

壬午

春風著物物不知出門百族皆熙熙縱橫人事此暫息靜極乃
復生動機壺觴浩蕩醉田叟鼓舞爛漫嬉村兒花紅柳碧豈解
事婀娜相向娟新姿化工無物物自物得意亦各懷其私老夫
漫興人不識醉倚霞天看紅日

匏齋以令子

吉脩

入學於上元后一日舉觴款賓是夕同

人召女伶侑酒主人復出盛肴款客卽席賦此

雙鵲檐前喜聲發詩老開觴夜觴客酒波綠盪越州春燈影紅

連上元夕郎君插帽花枝搖阿翁笑映酡顏嬌雄軍互張奪酒
國我縱不飲差能豪無端四座語聲悄嚙嚙鶯喉起清妙滿堂
花月夜如年一隊管絃春欲笑紛紛色相我久空十年不賦詞
驚鴻禪心綺緒雨無著但恐行樂追春風春風只向少年好時
過尋歡奈已老回頭試語簪花人妍畫宮眉亦須早

落花一首再用匏齋春心韻

落花如雪雨如煙誰遣春光似昔年獨往獨來思縹緲不情不
緒意纏綿燈何窈窕香何定人自東西月自圓此事若教無一
恨古來已老有情天

再疊前韻愈不知其思所著也

網緼誰熟麝爲煙散落餘香不記年
歷劫難銷猶有障一絲孤
裊不成縣米超色相甯知幻頓悟
空明卽是圓寫出胸中無著
語自疑珠欬落遙天

春愁

春愁春思浩無邊
簾外春生漠漠煙
遠夢欲飛先縹緲
一絲孤
裊獨纏絲笛何情
悵簫何豁人自闌
珊月自圓愴惻心
靈埋萬
恨幾能際地與蟠天

三月望日同人集礪生退脩新築看牡丹

昨日笙歌耳根沸

觀近村
演劇

今日花前醉芳觴
嬉游日日爲春風

天遣吾曹適無事
吾曹會合亦偶然
雲蹤嬾散風難團
常時得

酒無笑伴花月自向空中圓
淩侯意氣得豪絕大梁歸來謀退
息精廬初闢淨無塵猶恐雕欄少
顏色海壖買得花娉婷邀約
俊侶翩揚舲扶筇一老作祭酒
時安叔入座諸子皆忘形當杯何
忍不頻醺眼中之人各非少朱顏
且自爲春酡白髮休教被花
笑花枝爛放行離披風光終古如
一嬉人生踏地便陳迹浣壁
且著新題詩

元簡惠贈手栽菖蒲一盆翊日復繫以書其辭曰盆菖雖
爾藐然然正有陽羨之泥玉峯之秀六朝之碎粉零金
而茸茸者乃玉衡散采昔者安期生服此永壽衍母實
孕蕭錄其班諸明窗斐几以助文字古羊者亦有張籍

蘇轍之流以是實中興之策必相視笑也感歎其意歌

以謝之

故人嬉娛作清供種石一盆莒一茸老夫無事學栽植特走長
鬚乞仙種長鬚忽抱盆池回脫然徑贈殊不慳割君煙雲百葱
蒨伴我風月雙清閒森然玉立片峯耳無數岡巒若將起青螺
百點在下浮規出空濛一泓水清虛縹緲何洞天蒲郎插足仙
乎仙千春綠髮不能素使人對此懷堯年昨者故人書繼至繼
綬重申贈投意安期餐葉永壽年衍母存花兆靈異券我佳
符昌陽助我文字添吉祥斐然之頌如江郎江淹有儷事典雅
情深長臨風再拜銘不忘如君言者與君同醉神仙之醕三

六千觴

課蠶

閨人連朝晏梳裹一箔春蠶課嬌女區區能得幾絢絲要識蠶
中意劬苦風陰連日欺花房銅爐熨火紅生光天機得暖逞嬌
動葉聲簌簌房櫳香大眠纔過齊作繭箔上杉璘排雪點一蠶
一繭自爲家更有同功雙綵繾同功繭鏤千葉花餘繭作絲絲
滿又綠窗長日正無事料量餘課忙阿茶艱難蠶事從此諧好
女不狎羅與紈

中秋夜禊湖燈市同元簡寂坐紅蕉館寓廬

月明花滿天如願特放華燈儘意紅夜景忽然全畫色春聲誰

遣沸秋空一釵一扇多新態何院何樓不好風無數管簫吹惱
亂冥情誰識兩飛鴻

李子遠

道悠

索題蘆盦舊雨圖

朝見蘆花開暮見蘆花落蘆花開落自年年一去流波浩無著
此盦舊葺因招提雁湖卻捲當窗漪良辰灑埽會裙屐倚闌吟
遙聽秋詩闌千能得幾時好不獨吟詩人去宵卽今酌酒弔荒
城一碧落花抱煙老向年我亦留鴻迹老笛開樽飲六客升沈
存沒一須臾最少年人亦頭白

咸豐己未李君笛仙招飲厂中
沈君蒙叔費君芸舫楊君利叔

周君子方錐庵在座芸舫蒙叔
方與余齊年而月日先於余

披君此圖重回首君所思者半

其舊

兼謂沃之
獻青兩丈

昨宵尋夢到蘆間獨味滄寒袖雙手

續修家譜告成敬賦

祖祠作譜在道光彙十一世圖記詳迄成同來更卅霜又積三
世支繁昌後者續續前者亡不亟釐訂愁紛咙叔兮志此如未
迄曰今老矣敢不獲萬事蹉跎茲必償吾主其役子其襄叔釐
訂口班次彰生卒妃匹兼厝葬叶平蕃纂家乘徽嫩揚曰傳記述
偕銘章周六閱月定本臧劄十二卷函以緗告成家廟恭焚香
頒諸族人分庋藏繫惟始祖來淞江起家穡事韜窮鄉季明訖
今傳嬗長百五十餘丁森行務農肄讀營工商各守其業豈不
良嗚呼安得敦崇禮義爲維綱孝弟慈讓蒸吉祥門成通德輝
梓桑貴我譜牒逾璆琅敬告覽者其毋忘

如此

如此星辰寂掩門星辰而下篆氤氲百年心事瘖無語曠世音
塵宵莫聞奇氣青霞天際想仙葩珠露古時芬我思不解能縣
邈知爲誰何與爲君

沈君達卿以姚君研詒小影索題且言姚奇士也不欲得
尋常人語言因賦是詩

瑤林孔羽百瑰麗春山瑤玉千明光平生所思苦無見有見彌
復思深長沈侯少年古佩裳惟君與之雙參翔我交沈侯未覲
子但從圖畫窺軒昂妙意所寄誰能量何當掀懷大笑一握手
使我衣袖披拂三年香

辛垞過此爲風雪所阻

相向發古笑萬花齊怒開奇心同縹緲好語雜諧詼雪白照詩
膽春紅生酒杯風姨知興劇特地止帆回

縹緲

縹緲雲窗夜有燈有人燈畔共亭亭輕盈仙睡疑吹玉窈窕
魂瞥化星一影一蹤留夢想匪詞匪韻寫心銘叩真不用焚蘭
麝自有奇香貯寸靈

沈詠樓采藥圖小影詠樓因病習醫行於時故篇中多寓
古者頌禱之意

九疑仙人蒲作裋桐君仙人芝作糧靈蹤縹緲歲月長白雲窈

宛局洞房人迹不到巒蒼蒼沈侯善病探異方入山求藥匪志
荒山神知君久悵望豁然招入雲中鄉青猿白鹿前導蹕笑
荷鋪已挈筐歸來衣袂瑤草香呼龍種瑤瑤年穰壽身壽世壽
未央我鐫吉詞頌且揚仙之人兮恍惚來聽鏘宮商

讀龔定庵詩

別著人間不著思蟠天際地一游絲我疑李白飛仙筆世謂張
良好女姿世傳定庵美姿容絕代才情宜善窈千生懺悔未除癡西方
侍者應含笑不見拈花示寂時定庵後入禪

歲暮得元簡書韻其所語為詩

沈寒困病思瑟縮不得醒忽挈元簡書魂蘇體若輕書中何所

語排疊颺心靈上言苦憶我欲飛無翅翎含思寸絲邈自向孤
燈青爐熏添續續珮玉摩亭亭纏絲在心肺反勝常合并下言
不得意中宵步空庭俯覽大地月仰睇寒穹星所懷浩無際所
感茫無因三疊洞簫囀一縷梅魂馨神思忽飄墮如花散空冥
問我拾得否孰解此中云大哉乾坤內萬億人同形獨惟寸靈
地同者能幾人君思我善解我思君能名兩思團一思一思絲
無垠無垠亦無竟際地蟠蒼雲

夜坐漫感

靜夜方瘖四座言一燈紅入渾淪前細思萬種人間事種種都
成不解天

胸中留此一團疑有若含茹大鯁時古笑古悲齊一作似聞阿
樂哂耶癡

除夜

髫齡喜歲除一縱出家塾背耶覓鄰童粉碎千爆竹春聲散四
空童心不可捉阿母喚之歸家宴正燃燭沃以酒一杯慙癡愈
難束當時渾渾爾亦不名其樂無端成壯夫憂患百纏縛無父
庚冬悲無母癸秋哭從茲又一天日月異昏夙不知孰付余一
羸復一縮縮者不復羸星終忽四覺予今年四十八今夕復何夕如夢
恹恍獨屏間花搖搖爐內香續續惜惜語萬端盤盤腸九曲
縣向後情渺渺已往躅依依靜夜燈潭潭百年屋神思浩無窮

癡坐到更柝山妻進厨肴穉女煖醅醑呼觴大酌之摩盪百憂
腹醉鄉是何天童心又如掬

蘆墟三官堂面臨分湖前年里人增葺精舍三楹爲供設
神乩之所顏之曰鶴歸來偶游賦此

不知鶴歸處還問去何年流水自無已白雲曾不言此湖終古
秀有氣或云仙若果仙堪遇思量我鬢元

歲朝

癸未

鏡中老態逐年來何事能令笑口開醉抱阿鴻看燭蕊渾淪心
亦似嬰孩

鴻年姪去年九月十三日生

蒲爲上供能延歲竹有同心共耐寒添到香圓圓結識平安長

壽大團圓

几上供萸蒲一甌鳳
尾竹一盆香圓四頭

病況

天風悽戾襲予涼病崇纏繇媚我長心似枯禪常習靜身如處
女只深藏夜燒紅燭供癡坐曉費青桑代異方一月苔階疏履
迹似聞移綠上琴牀

春愁

春愁病思兩惓惓淒入簫心又笛心若嫋若飛孤想起如飄如
墜一情沈異華自惜常韜玉上藥誰從訪鬱金費盡夕爐香寸
寸閉門聊此遣春陰

病中乞梅花數枝作瓶供

傳聞隔水有叢梅乞得梅枝半未開若恐病夫餘悵望怒催苞

萼起春雷

是日始聞雷

幾枝密豔破濃英幾點疏葩淡自橫公道看花無別異密疏濃
淡總天成

埽除一室斷知聞月地雲階靜掩門閒煞病夫無箇事番番燒
燭坐黃昏

贈花無物代明璫擬琢嬌詞怯病腸聊爲梅花助風韻女兒湔
茗我焚香

昨日湖干得一鱗故人書問起居頻故人正爲思儂苦借一枝
兒贈故人

謂元吉

食古齋詩金卷三
瓶梅落矣補供桃花幾枝

東風吹雪了無痕換得紅霞照眼溫欲駐濃春伴枯寂肺肝重
發舊華曆

浴花弗惜頰面水照花弗惜明鏡光女兒愛花特癡絕願花不
落春無央

徐子繁友乞八十四窠陶松石畫菖蒲壽石於便面索爲

題句

南山仙人黃白石東澗仙人餐綠蒲吾衰亦欲晚聞道八十四
窠無隱乎

元日述懷時年五十

甲申

昨宵忽夢童年樂夢見童年傍母時醒爇爐香叩諸佛願身常
作夢中兒

爐香不息到天明後我偏虛續續因莫向靈簪問消息老夫五
十是今晨

同袍五友歲干符嗜好差同命分殊成位三人成藝兩媿予豈

獨在無鬚

五友辛丑蒙叔芸舫式如復有迹疏而嘗以學術相鋟合者則陶方之也五人皆有鬚

哀樂中年太偪真至交沈痛失三人

吉甫元之吉卿

開顏獨爲諸元吉

春酒雙卮奉老親

稽首蒼雲默有求神仙富貴類皆不只斬八難三災盡同我糟
糠人白頭

詞章結習浩無邊雕琢肝腸例不堅願勒定公言七字著書何

似觀心賢龔定菴句觀當作去聲

五十初度述懷十首

憶昔先皇歲乙未我生初度人間世堂堂白日萬八千空被
丸浪遊戲少年讀書存遠志壯年著書耿微意逢時棄置從不

才未老衰羸爲何事二語借用白居易詩怡怡分應上聯真天造地設之文

性情多鬱常寡歡氣象不春苦太寒坐令憂患成故物無謂亦
自淒心肝心靈肝靈百悱惻愁魔病魔雙糾纏兩年數門蟄不
出非豹之隱非龍蟠

蒼天可補海可填人事一缺無由全自從二親背我去日月又

各爲一天中間骨肉況多故卅年家累初息肩繩繩續續後來望驚心已過商瞿年

文家諛我慧業好命家疵我福星少本來福慧幾人全坐擁吉羊還縹緲閨中有人情德心不惜長貧惜衰早爲我日炷南斗香富貴無緣蘄壽考

古人代謝今人生今人古人胸合并今人吾友十數子古人漢宋唐周秦邇來吾友半雕落今人一眴成古人寄言存者要倔強橫流自岼牢堅身

人材莽隨世運退慶光之間思老輩獻翁

陳子經學需翁沈南松丈一丈

文直與桐城昌遠派當年交我皆先施今日捫膺活生嘅可憐

國士已眾人

南翁贈詩有國士不易逢之語

來者茫茫更誰代

學儒無功學仙遲昇天拔宅非所思真人留書說服氣謂可吐
濁茹清微爐香不飛燈火定閉門千息朦朧時靜中光景不可
說我自得我非人知

昔年卅九嘗寫真面龐太瘦人難名
謁來面瘦適相似老瘦又異曩時神似耶
異耶何足較前容後貌皆寓形他生輪迴若果
有我身已是誰何人

詞章習氣鏟不窮現雲鱗爪西復東願堅道力撤魔障人天消
息俱瞋聾孤言子字了不著精氣內斂神宅空破天鑿字老元
吉從我擲筆觀鴻濛

親朋饋我生日酒女兒捧觴爲我壽笑呼女兒釀一觴祝汝福
祥倍母厚汝母嫁我方廿年我相不肥累渠瘦願汝得增食肉
飛莫似孱翁恥人後

客居禊湖寫懷

養疴仍不適偶寂輒生暄涼引人欹枕

今年早涼病體差宜

風隨客到門

予年來畏風甚且不耐酬接而客以文字醫藝相牽率者日常有人甚苦之也無能羞眾役有抱迴誰
論驀見閒廊外幽蘭自吐麝

丈室巡行地飄飄動我思匏翁圖象贊蒙老扇紈詩

予新裝三十九歲小

影匏翁爲作贊蒙叔以題武林許氏娛園詩爲予寫團扇皆足爲行篋生色配以熏爐潔參之盆玩

奇

周雨人贈琉璃香爐歸裝自夸詫未許俗人知邱毓之惠盆蒲都妙

六言三首謝毓之惠菖蒲

髯公老癖同我虎鬚分餉簋盆大好水深石淨一泓養此靈根
昔者之江釣叟金種蒲詩之畫之只恐蒲今令笑仙才怪筆全
非

蒙叔以五十初度詩四章索和同其律而變其體其遣詞
嫩而不老腴而不枯見病夫之猶未才盡也

少日吟壇讓爾驕逸情奇思善飄颻文人豔筆紅蕤錦詞客仙
心白玉簫屏障遍傳吳越界碑文高綜漢唐朝聲華莫謂妨時
命如此工才要福消

一別流光十數年略聞豪氣綢於前藏書新築三層閣飼鶴聊

謀二頃田暖日培蘭娟挺秀

謂令似采侯茂才

異邦種李燦生妍

君累攝校

官料因上界多官府故謫閒身作散仙

君拔貢朝考始擢一等覆試以脫字被擯

同歲偕君乙未生等年五十獨強勅述懷自寫生平事攬鬢微

傷老大情白社故人多宿草青雲舊友半歸耕回頭猛憶西湖

夢廿六年前息壤盟

厄我孱軀百病中秋花何計發春紅久無獨笑飛揚起反怨多

生憂患工丹汞養真知已晚黃金擲牝悔俱空而今一味饒癡

想揮轉義車再作童

四月廿八日會吉甫葬

去歲寢門虛一哭今朝墓舍繞千悲如君風義豈能再從古報

施多可疑忍痛成墳憐弟瘁入幽齋恨竟誰知平生結契先文字退筆思題第二碑

劉禹錫詩朔方徙歲行將晚欲爲君刊第二碑

自題三十九歲小影

觀今照昔一衰哀活潑靈臺頓悟開畢竟畫身非是我身自見我身來

問我何因見我身渾淪面目本來真儻令百歲身還在只是當前白鏡人

髭鬚早白又無兒

白樂天句

詠香山適肖之若使前生真此老底

無官爵但能詩

年來多病只關門文字無如結習存號作韜翁還自笑但韜蹤

迹未韜言

仙乎飄飄不可期佛乎微妙不可思著書沒齒卽成就傳不傳
又非可知

勞我以生息我老我今息老良非早息身何似息心賢萬緣一
切無煩惱

多感深閨椎髻人扶衰衛疾百勞辛我身以外原無我自得渠
如有二身

舊交三子歲年同一上金鑾兩臥松各有贈言題首幅匹如四
老一圖中

吾鄙塊才元簡子贈我奇文狀返似世人掉首我低頭胎觀九

篇此具體

自題卷尾十詩成知分安時萬念平此後對天無別祝祝身長
健世長清

除夜

百年甲子方過半一歲忽忙又欲除久坐漸聞羣動息靜觀如
見我生初紅梅豔豔春邊動白髮番番鏡裏疏儻不急商行樂
法有涯歲月若爲娛

食古齋詩錄卷四

吳江 柳以蕃 弢廬

歲朝靜坐

光緒乙酉

一樹梅花一老夫一瓶一几一熏爐地鄰窮巷千門靜天付閒
身百事無豈爲風淫成病肘預占日吉擬留鬚春陽見說多功
澤準待吹噓弱柳蘇

春夜

春夜坐凌競春窗月乍升怒貓蹲暗几小犬吠疏燈花障搖千
綺茶煙裊一藤觸屏舂響起癡僕睡曹騰

春思

春思黯無聊春魂不可招香通心窈窕風釀病根苗吻渴耽澆
茗神虛怯聽簫撩人花影動多事怒如潮

少時

少時魂夢劇飛騰癡鈍而今似凍蠅半世才名餐畫餅百年笑
語寄風燈舌乾已謝談天客頭禿真疑再世僧尙有平生恩未
報昔人孤淚一沾膺

花日方新

花日方新鼓吹歡不禁飛動醉春盤少年自稱時名豔老眼偏
宜慶事看門族最爭佳子弟賓筵猶見古衣冠擎杯起酌蒼髯
未酒味而今似蜜甘

昨日看花

昨日看花紅滿枝東霞西日爭奇姿今日看花花漸白玉容退
嬌無力花開花落爭須臾明年卻又春萌蘇惟有花開人一
是綠髮朱顏不重好勸君且勿嗟願君聽我語請君呼酒急典
衣日日花前買鼓舞莫待春闌感風雨君勿向花愁君勿對花
嘆醒眼看花可奈何典衣急買花前醉

飽齋過禊湖寓中夜話卽用其答從兄子遠詩韻賦贈

春夜挑燈坐薄寒病中談舌未曾乾縱橫千載孤心炯俯仰中
年一笑難閉戶不知時事幻聞海夷警未息養閒且喜散身寬湖千雙
笠天留在何日眞同把釣竿

病中作

略犯春風總未能兩旬苦病睡
膏騰芳菲落盡春無夢窗戶
深夜早燈舊友入山煩藥寄
朱君晴江至金蓋山
鮑齋爲予託祈壇方老妻調飴望
餐增幾回商略茸裘卸玉骨
新來瘦起棱

留鬚

我生蹉跎時易失留鬚亦踰年
半百出門羣兒笑聲劇新蓄口
毛半先白白者明知不還黑
猶喜黑者助光澤相人驚我相
非昔富貴吉祥滿顏色侯王將
相夢久絕韓安有雄心酬眼力
但願此鬚冉冉化長鬣伴我修
齡八九十爲野夫長亦良得

徐藻涵屬釐定詩卷卽題其上

蒼嚴老筆陳良叔縹緲仙才龔定盦前輩風流吾未見於今
尚孰深談斯人自是後來秀遠致能從詩外參頓覺眼中雲
撥一輪孤月下澄潭

俞丈

岳

笠東草堂詩藁文孫

煥章

乞題

髯翁長身仙鶴姿靈氣入畫兼入詩以詩形畫畫尤勝畫境雄
莽詩平夷同時湯貞戴文騷壇匹雙鸞上天野鶴隻而今獨鶴
亦仙去一例人間感遺跡

又題絕命詞遺卷

咸豐癸丑丈爲太倉校官青浦土匪周立春爲亂將撲太倉城丈正衣冠危坐

作絕命詩二十八首城破誓投泮水死會州守擊賊退得不死

畫苑英聲湯戴齊二公大節八垓知後人莫誤髯名士

髯翁丈晚年自

食言金卷四
號也
不見危城七字詩

輓薛慰農師

不趨眾勢早林泉萬口猶傳太守賢
說士心情如啖肉撐天風骨不貪錢
笙歌花月三千首詩酒江山二十年
白髮門生曾託契那禁潛涕輟牙絃

輓錢覺蓮

錫庚

一振陽剛氣風標卓可驚
孝侯功晚蓋剛主學孤行
側想心期磊微聞家況清
由來公道在徐聽蓋棺評

人心

人心風俗問如何
浩大乾坤半障魔
儘力銷金催世竭
鑄形成

土葬人多彌天殃禍嗟誰種殘局脂膏苦被磨聞道關津徵稅
急尙煩官禁峻條科

婦病甚夜坐有作

鐘漏花階急爐星藥火圓聞君苦呻息累我廢宵眠身世原同
命心情只獨憐童然嬌女外誰共一燈前

春夜聽雨不寐作

丙戌

春陰黯默春宵冥檐雨一瀉喧眾鈴挑燈寂掩帷帳聽隔窗心
惜花零丁此時愁人影伴形苦寒禁痒體不甯冬心瓦爐燃火
暖酒瓶細斟淺酌難酩酊悄悄戚戚神反惺辭杯就枕闔畫屏
目欲成睡心先醒繁聲急點不暫停燈火變白窗光青天明急

起開軒櫺亂紅滿地飄春星作歌恂悅招花靈

贈辛垞用山谷體

前身豈是古老子後輩爭呼辛丈人

龔定庵有別辛丈人文自註辛丈人新安郡齋古桂

唐時植也

學儒學佛兩無障匪道匪藝通以神諧談劇論萬花笑白

鬚紅頰長年春種杏成林復種柏媼神無法使君貧

送徐藻涵之山左

頻年送君蹋京國春官上科拾不得紅紗魔障一以生若箇文

人不埋沒酒酣以往英氣出馬首欲東來告別千金之劍五

筆應使公卿動顏色

君往張朗齋中丞幕

海疆新務況孔急

時山左方有治河防海

荒諸事

自古飢腸出奇策

用元遺山句

君其行矣君努力嗟余年來

衰疾不蜚不鳴一鳥息因君忽復夢空闊泰岱風雲渤海月

欲游紫筠庵未果毓之有詩紀之走筆爲和

衰翁苦被病魔弄晏起連朝常自訟飄然遠思飛煙盒欲借晨
鐘警甜夢周生有約爲買舩邱髯左券詩成先良期已屆人事
阻香火悵失當前緣午陰客館垂簾坐爐篆瓶花齊帖妥半日
髯來講淨因妙法華鬘如示我我生誤落文字根憂患疾疢相
緣因心靈摧軋慧燈淺欲通覺路茫無垠回頭前望傷蹉跌老
矣而今當著力今朝未得叩禪扃一念知歸心有佛

中秋禊湖客館作

美人仙去酒徒老我今何處通懷抱秋清夜永無奈何翻悵月

明爲誰好有人勸我開笑顏紅燈畫舫千管絃乘時行樂豈不快
自覺神意難爲妍惘然非夢亦非醉花助無聊酒無賴行坐
眞成出入愁無愁須出青天外

吾儔之士有干貴游乞糴者各不遂意因贈

紛紛綸綸九鼎茵奚容旁訴饑人呻琳琳琅琅洞房曲那許前
陳嫠女哭人生苦樂難同量要有命分爲主張強邀異趣結歡
笑終古不得通肝腸問君何爲日皇皇欲向要路求津梁津梁
波浪多如許恐君有懷不能語

寫懷

身世不相管祇于冷味親硬擔窮骨脊膏養病精神宵夢清無

嚙家餐淡自珍心情指松柏獨有歲寒身

題舒鐵雲瓶水齋詩集

鬱怒橫逸舒鐵雲定盦論詩吾昔聞人言定公目空世何獨歎
袂推此君心藏是編不得見客座談之空齒豔匏翁袖卷擲我
前日與鐵雲相對面寄岑厯落彼何人夙生乃自戕眉僧讀草
卷書眼雪亮行萬里路身雲輕千奇萬態寸毫攝不生尋常一
標格忽悲忽怒忽笑嘻疑仙疑佛疑英俠同時作者誰相當王
曇龍鐸參翱翔曇乎光怪鐸奇闢訝此一筆能爲雙有時作意
弄妍態影語波詞百嫵媚鳳紙千張寫欲殘聘書獨靳龍么妹
人能挺立詩亦然其人其筆皆可傳口中讀殘二千首胸次橫

食言金 卷四
著三千年

謝陶小梓惠龍井茶

山人晝夢梅花眠醒來獨味冬心妍雲中有鶴附書至一緘投
我新茶匳靈株葳蕤產龍井筠裹誰貯春晴天西湖淺淡借顏
色露芽一碧娟曉煙僧窗昔年話風韻舊夢恍落吟瓢前已未歲與

蒙叔芸舫讀書怡淥山莊徧游武林諸山僧人必出佳茗供客松枝急烹新活火石鼎細煮分

湖泉聽湯三沸恣一瀉杯面盪作湖天圓一澆已令肺渴解再

酌能使頭風痊飲之三四神態異如雲綠骨輕於仙同時二客

翼亭元簡

各領取靜對如證無言禪嗟余卅年飽世味拉雜嘗徧辛

酸鹹爾來所好祇一淡味外有味工磨研煮葵燒筍慰飢腹得

此尤足清心咽一泓自養廢井活六鑿不受膏火煎琴清香妙
閉門坐相與寂寞娛流年人間物美縱無盡當前偶值誰能捐
詩成寄遠隱几坐惜哉猶未忘言詮

偶至宅後廢園

一徑蹋叢棘攜筇復此過屋空虛響起

近園諸屋爲從兄姪輩所居今各散徙屋虛閉

矣

木鬱怒花多雍徑微留蹟

族子輩有薪於園而炊者

揚塵不再波

向有池從形家

言填平

試看林際鳥去去各遺窠

題雲巢訪舊圖

是圖張叟漱卿訪陳子翔而作也子翔湖州人以黃冠
隱金蓋山之雲巢庚申之劫其母被難城中子翔從北

燕徒步歸尋母骸骨溷身流民中轉徙至吾鄉梨花里
因識叟叟察其異甚加德焉今年累書招叟入山叟往
作數日留歸爲是圖命子鳴騶來乞紀序且徵詩聞子
翔衣一藍布袍敝甚不易乃曩年叟所贈者每語人曰
吾不能忘張君也

五峯縹緲環琳宮誰其主者陳髯翁山房襤被記三宿

予三至金蓋山

與子翔談道家言甚相得

邀我拂塵聽松風爾來多病腰腳嬾十年不踏青

芙蓉聞翁閉門養胎息眉髮已具神仙容吾鄉張叟抱古德識
翁曾在流離中分金貸粟慰孝子入山感涕猶橫胸黃冠旣易
儒服毀贈衣獨被銘深衷孤雲一藏不更出舊雨再合知何從

洞天四月道場啟會者如鶴趨九龍

用九龍圖天慶觀元遺山嘗有詩

一老

書往結約一老策杖來登峯山中世上劃昏曉豈意垂暮重相逢挑燈細語海桑事對榻寂證圓蒲功丹成不死豈可獨臨行挽袖分餘紅叟歸作圖紀年月索我題句存爪鴻詩成擲筆神忽往置身儼在千巖叢

謝蕙庭先生

元慶

石刻遺象爲令子綏之

家福

題

昔聞先生名今拜先生象吳中善人天下知豈獨吾曹生敬仰當時孰領袖粵惟潘舍人推之助之石心與蓮春懿哉先生一相與以有成謝善人名到今

善人生華門志不溺紉綺善人具瑋才亦不樂撫仕一心爲善

食言金卷四
他不知一家四海無畛畦枯者澤之瘠者肥戚疏遠近無闕遺
散金如水散粟如沙泥善人之願無盡時不見介壽之米畫蘭
值的的都行布施德

千家供香花祝善人有後萬家設俎豆禱善人長壽善人六十
未大年善人五十生子賢子亦無他願繼親以爲善以善續善
善益昌燕齊豫晉聲溢洋使我善人如不亡噫吁嘻爲善之報
有如此父爲善父子孝子

孝子感少孤倩工寫父真追摹色相溫且醇雕之鏤之棗栗新
流傳徧同志丐辭揚善人我謂善人自有不朽業一歌一贊皆
其迹何況吳中十萬家久已絲繡平原金鑄佛導揚豈藉文人

筆我詩質直辭不阿祭社聊當迎神歌

余用山谷體作七律一首贈匏翁匏翁以爲大佳余興
鼓遂仍其體續爲如干首分贈諸舊友

陸譜琴明經

互鴻

大宙紛紛夢爭奪一門浩浩熙黃虞承愉後母真孝子誦法先
輩名師儒太和滿抱法當壽古好三癖神與娛

平生酷嗜隆萬
人小題文及古

錢古玉
三者

嬰兒心腸童子貌行年七十猶無鬚

凌礪生部郎

淦

目中空無數十輩胸中遠有三千年因人不爲碌碌者道古常
自嚶嚶然手揮萬金心膽熱力作百事筋脰堅近方借瑣耗奇

氣龔定庵語小學日注蟲魚編

陳翼亭孝廉麟

世上工為畫地餅斯老早脫名韁塵田高圃肥資用約貌古意
樸風光新無心拾得混沌譜有福作箇逍遙人男婚已畢腰腳
健為問游嶽胡逡巡

張欣木孝廉玉熙

徵君訪溪先生門下高弟子鄉邑之間古先生科名不玷孝廉榜跬

步恪守儒先程斯人有子亦神理君年五十餘始得一子晚節不出以疾

貞君歷膺諸上公聘近年以病不出時風滿眼真士少因君更念陳桂卿

費養莊處士涵

入山行藥孫思邈賃廡偕妻梁伯鸞閒身頗無婚嫁累行地疑
作神仙看蠲疴贈我愈風酒服氣自鑄還年丹謁來叩門乞生
傳何方爲療枯腸乾

姚鳳生明經

孟起

黃塵浩浩填盤閫中有一士深韜藏長身迴如滄海鶴氣味雅
似蘭竹香蘭竹香出日本國國人乞君書常以爲贊君往往分贈友朋間冥心制器出天巧微
言說妙鏗清商作書日日手腕脫千金歲致娛高堂

徐翰波布衣

耀

了無一物挂腸胃獨嗜爲善如貪饕婆心殷殷佛廣照行腳僕
僕僧同勞終年不黔墨子突風世能拔楊朱毛雖然煦子非仁

義絕勝飽食閑吾曹

落齒

落者什之八存者什之二其二雖僅存咀嚼亦無味其先但苦
四旁齧今歎中央都飢艱乾魚硬肉且弗勝何況飮盤梨與栗
饑涎一口嗟老饕生前已似餒若敖山妻恐我腸胃憊日求輒
美充盤肴吾生取世多不足儉腹惟容一臠肉命神何事苦相
仇并減餘生薄口福

家人

一房一室曲尺如安置長物劣有餘先生圖史琴劒觚家人
簞瓶罍盂山妻治事鱗雜俱嬌女聽詩忘晨梳一僮一嫗母

雛嫗善駿作僮次且爾來僮亦供職劬埽地三面如鏡鋪先生
於中一事無倦來攤飯醒讀書

除夕

萬族奔忙夜閒身寂靜閉門人海外憶夢燭花中雪色洗煩
惱茶香圓寂空心期呼婦語投老佛燈紅

新意

丁亥

一方丈室著維摩藥鼎茶鐙伴歲過幸得閒身無那老略思前
事盡如魔夢中久息浮名擾紙上猶嫌贅語多庭草又萌梅蕊
發好將新意養天和

立春

老夫盥罷日當已爆竹千家迎立春人事又爲謀始計流光屢
換故吾身園林微雪萌芽動兒女東風笑語新一病祇今成百
懶意中慙負是佳辰

雨後晚眺

野水多於屋湖雲淡似人歸林雙鵲大薦網一魚春村女挑新
齊溪童曝溼薪倚門閒眺久暝色起遙津

懷菽庵

君之貴我伏居十年南北分襟裾泊君之歸我抱痾五年未
造君屋廬與君聚散若雲雨

東坡句

往復空費千番書卻思少年

好日月笑懽爛漫連朝晡昨宵夢中闌君室花前飲我酒百觚

玉山欲倒自起舞駢臈不用春風扶醒來顧影獨惆悵照案一
點青燈孤憶從病後暝衾枕舊友滿抱音塵疏中年離別易悲
感白日況復催顛顛英華告退壯氣老昏庸駸鈍誰鞭予丈夫
豈作兒女戀抱此孤寂能不吁燈前百念自起滅思君一夕顏
增臞癡心速呪病魔退一月一泛胥江艖

褚平巖少府

世鏞

重洋濟險圖

故人別廿年天海迴相望忽乘南飛鴻寄圖索歌唱開圖緬曩
蹤神魄猶震盪大洋十二月乘輪衝曉瘴暗礁觸船裂抵隙水
不讓顛沈在須臾

昌黎句

同舸泣相向跳身上輕划大半魚腹葬

餘人聽指揮堅坐漏舟上千撼不一動力與蛟鰐抗相持一晝

夜構會得無恙紅燈導彼岸豈非神所相憐君婉孌年畝書守
家巷胡爲汗漫游造次犯鯨浪飢來橫驅人苦被一官誑世途
艱百端宦海謫千狀懸知厯險餘萬事明得喪去官尙無資爲
貧仕堪諒竝待薄宦成嘉遜表初尙分湖綠依然雙笠待相傍

悟言

浮生如一夢此意人盡知何不竟稅駕卽夢咀含之或嬰世故
縛或逐名利馳役茲如夢身直到無夢時我欲味此夢晝遯夕
與嬉

世境萬不同有勝卽有負因境起人事取與紛葛糾不知穹壤
內萬物孰可久何物爲我私何物爲人有出入先後間誰非空

兩手

世人

世人多嗟貧貧來百事擾世人多歎老老至來日少我今貧者
兼徹悟甚煩惱東家白髮翁旦食夕不飽西家綠髮郎朝笑夕
則天我年五十疆三餐足昏曉環顧天下人河沙紛紛浩浩幾人
如我貧幾人如我老因此樂有餘匪曰能見道

自鳴鐘

頭上光陰火急行義鞭雖駛不聞聲何人縮取風輪樣日夜催
人不住鳴

聞李芋仙

十菜

耗弔以詩

我昔少年游帝京蜀中一士傾神明後來薛啓式如座

海甯周景曾比

部酒邊大笑聲相轟是時長安秋九月京兆榜散同無名我方

拂衣返鄉國君亦厭苦居都城醉吟大句送我別紙上憤激皆

商聲自後雲天邈相望聞君浪作東西行參文幕府尹小縣不

肯詰屈隨公卿談兵論政露才劇萬口不謂書生能無端作氣

投手版遂與酒杓同死生去年有客來自滬垢衣羸馬曾逢君

侯門乞食散歌院蕩突不顧羣兒驚心知壯士氣未盡豈料奄

忽靈埃塵故鄉萬里孰歸骨

子無

令我吟歎傷心神

輓潘莘田

人間豈有三品官晚節潦倒愁飢寒頭銜似此百無用鬱不得

志靈九原憶君壯年事戎馬乞師走皖躬艱難遙迎使節駐海上助軍奔走疲輪輦當時薦疏三四上大風吹羽幾徹天無端事勢莽乖隔中路屈曲生波瀾同時輩流或鼎貴獨此坐頓閒曹閒露才揚己古來惡梅都官句昔人感歎今猶然前年去年兩書至書意悒鬱難爲歡目盲身病眾所易登場竟作懸疣看了無長策救身世獨有文字鳴腸肝報章惓惓勸歸隱七十二峯青髻鬟傷哉一貧爲官縛直至竟死招魂還

毓之來述近況感歎賦此

士生斯世何賢愚輕重謬以人心殊當其困阨伏里閭但與萬口供擲掄殘衫破帽狀偃蹇憊揖癡步描迂拘一朝金紫裹四

體震動萬目驚千夫爭言於法本當貴好醜出口翻斯須因知
流俗勉知愛勢利而外言無餘君今老矣猶坐困神氣鬱轡連
眉鬚頗聞百輩輕薄子引作前鑒規其徒以余相好特來訪聽
說窮況人閒無我無氣力與聲勢口吻微薄難爲噓齋咨相助
亦何用不若破涕爲軒渠窮愁苦語且閉口相與一醉忘飢飮

輓袁韻珂

憶識而翁太史座

謂我庵

穆然古德如瓊瑤攜來季子嬌玉雪

坐作賦方垂髫大梁歸來才一見老鳳忽逝悽蘭若善人中

豈神理我方睨子騰青霄

青霄冥冥迴且長羽毛欲奮猶回翔終知此才法當貴臺閣

藝娟無雙平生科名坐蹲蹠每望後儒心飛揚誰齋玉樹翳黃
土悼子重爲而翁傷

邱生

兆蓉

鶯花館遺詩旣爲刪定付刊後系以詩

窮愁入骨死不滅碎作錦囊千縷血天公著此雕子身猶謂工
才似長吉長空豈眞造玉樓地府亦有何文修人間有才不許
住萬古豈獨渠儂愁遺編傳世渾閒事猶勝秋燐亡姓氏中夜
呼觴奠宵魂秋燈忽吐蒼虹氣

西泠五布衣詩刻

寄窰厯落金吉金支離古怪丁鈍丁老鐵古玉錚同鳴西泠鬱
律開先聲金石書畫文素靈藝各入聖詩通神一絲不挂名利

塵樵悴專壹爲老民西湖之水天下清布衣五子同留名吁嗟
乎人間豈無官一品百年姓氏埋秋燐

夏日閒眺

黃庭讀罷閒無事拖杖出門風物酣茶賣涼亭開小市酒香深
巷圻新壤溪漁曬網日當午估客掛帆風正南只有鷺鷥無箇
事滿身涼雪看江潭

葉家埭

背田築屋村徑斜大桑小桑青盤拏田蠶麤畢足生事婦勤種
菜兒耘瓜此鄉居人餘樸質故家遺裔南陽葉

居人皆明葉
天寥之後

百年來弔海桑礪牛尙有前朝石

除夕

歲行天不語老至我何言
陳迹隨年逝衰顏借酒溫
道函孤性定利激眾情喧
卻想漫天雪高局幾處門

元日

戊子

一回一往移青律不覺不知生
白顛漸少舊人談舊事驀驚今
日又今年孰消孰息成斯世
非耄非童自一天萬事升沈都冷
看但期長健作頑仙

窮巷

窮巷新年寂塗泥況未乾
雨攬微雪急門掩早春寒
磨病詩爲崇生愁酒是端
後庭梅放未風悄怯前看

懷程子翔

萬千人事海茫茫一杵清鐘自上方久與時情忘得喪定看浮
世可憐傷通明爐火新丹訣太古梅花好道場所居名古梅花觀昨夢
逢君醒轉悵滿山瑤草未分嘗

卽境

寂漠江鄉裏蕭然晝掩堂水禽窺戶靜春草閉門長老境知閒
味清貧生古香晚來無一事臥看篆煙颺

正月十三日辛垞見過

剝啄昏黃動草廬點燈洗酌一軒渠東坡有二月二日點燈會客詩舊交又值
新年見晚學方知少日疏病榻光陰消故紙春盤風味翦園蔬

眼中去日多如髮醉裏飛騰說著書

是夕極論古文源流所欲爲者甚大蓋又非少年時

見地也

落齒

韓公喻落齒謂與崩山同我齒殊不爾脫若遭磨礱蘊蒸殆已
久藏毒非甘醴陰陽默乖和水負火激沖遂令齧齧地鬱作腐
蠹叢日磨月耗敗糜爛無完蹤脣虛旣失助舌在難爲功當食
輒廩廩如蹈杭桎凶嗟身寄大塊藐焉一倮蟲四體與百骸乘
化皆有終偶然見缺陷豈必關身窮況我視聽間目明耳未聾
閉門抱幽獨天人來交通足此而奪彼造化甯不公一笑釋形
迹豁然開心胸

散步

散步歷墟曲天高風日晴
早鶯爭樹出小犬繞衣行
緩策看花圃談茶憩草棚
比鄰情款款再出約觀耕

早起

五更曉枕鶴一聲獨眠微覺華
津生望晨辨色攝衣起沐頭濯
足舉身輕葛蒲撲鼻露香重
梅花刮骨風神清汲泉磨墨寫新
句嫩硯一抹春苔橫

彭秋士詩集

六門萬戶一春海秋心沈沈瘖
欲死秋死不死生此士幾根窮
骨撐吳天忍餓著書自年年清
風白雲相與言當時知者羅老

獨身後千秋仍寂寞鴻飛冥冥仰寥廓

晚節

晚節貞同疾長窮守若盟白頭心更戀窗下短燈檠

江上

江上西風颯暮寒靜中身世感無端風波舊拽危舟過樓閣今
同海市看悔鑄百年成大錯未爭一著窘全盤而今衰疾催遲
暮向後心情那自寬

獨居書懷卽柬沈君達卿

幾年高臥託深居萬事浮雲付太虛舊雨不來花又落夢騎螭
曉讀仙書

閉門漸喜紅塵遠學道生憐白髮疏見說故人工養性元關消

息近何如

時達生方究養生家言

秋懷用放翁秋興第二首韻

萬事紛紛渺一毫荒江高枕謝羣曹詩從林壑千聲起人與霜
天獨月高身世窮囚鑿賈孟肺肝靈鬼窟莊騷一樽欲酌無人
共辜負新紅滴小槽

入秋以來疾疫流行螟螣害稼愀然若不可爲懷也

慘澹殘秋疾疫狂北邙簫鼓送人忙門庭兩度聞悲哭

季弟婦及同居

從孫女相次以感證死

親舊連書告死喪

數日中得親舊訃者三

風崇橫行天釀劫

歲時餘沴稼遭傷病翁累日胸懷惡開盡黃華未舉觴

夜坐

庭空月白淨無塵
鐘漏丁丁報二更
深院支燈看菊影
小鑪添火聽茶聲
地幽卻稱詩情淡
夜靜能教畫理生
穉女瘦妻都解事
忍拋鼾睡味閒情

達卿贈詩依韻奉酬

一輩才俱老
因君曠思生
處囊神劍靜
伏浪大珠明
眼力追皇古
心光薄太清
是龍雲必應寥廓動
余情

又和見贈鄙人及元吉詩韻

病魔狎肺秋連春
槐花著蕊忙催人
我歌七發君不答
衡門自鎖荒江濱
君以嗽疾不赴省試
荒江沈沈無過客
獨招元氣歸靈宅
近從事丹

食古齋言金卷四
言 爐家 心息能調 疴癘平詩書苦被兒童役忽然一笑雙眉飛書
城南面供指揮蕩摩古腹出光怪百靈總總紛來歸雄文力大
無餘子我欲呼天開眼耳九州生氣恃人才願叱風雲急噓此

慰詠裳失子

仁賢坎坷凶邪橫禍福胡然倒行令直疑藥殺元氣車天地爾
來不神聖如君質行甯有疴幾老乃亦悲無兒昌黎援命慰東
野大靈解語將毋欺由來達人惟所值別是剖非枉饒舌蹠回
堯桀兩俱忘一笑與君浮大白

與礪生元吉會飲勝溪草堂

落落雲顏合滔滔歲月過眼中奇士老身外古憂多排興棋成

癖傭文墨浪磨人生各情事各自惜蹉跎

達卿贈元吉詩有六尺腹天地片言胎古今二語元吉書

爲楹聯更屬予製七言偶句因足成一詩

食太和氣母羣物

君善醫

揖皇古文僕眾才朦朧天眼不相照坐

鎮蛟龍荒水隈

蒙叔爲嫂貞孝君重徵題辭敬賦

雙門南北波迴抱一樹女貞青窈窕至竟爭傳節義名匏齋之

姊蒙廬嫂匏齋昔作述姊辭稱引名德無溢遺大書貞孝爲立

傳當湖耆宿蒙廬師

顧徵君廣譽

無端一劫更桑海獨幸茲文巍然

在雕板郵傳廣乞言重使金珉發光彩東南作者毫爭濡事行

詳盡吾弗書當時隱痛獨嗟惜夫後未立身先殂而今應破九
京涕叔有佳兒夫祚繼授室成名廿載中叔亦蹶然慰心事回
思曩日貞艱情闡揚一念彌綣綣何當自撰不朽作誄嫂再見
昌黎文

老屋

不城不市不山林流水村中閉戶深四序美花分節候百年老
屋占風陰青松自養靈長歲白鳥同忘去住心莫謂空虛逃已
慣臨風側立聽楚音

磬生翼亭元
簡約同過

校閱切問書院課藝有作

舊業疏蕪曠不治經師難望況人師薦書重愧推賢意

謂礪
生講

席甯同息老資

師者所以息老近人汪容甫語

異地文章供借助

秀水沈達卿長洲陶小沚

爲謀中翹楚

陋邦弦誦惜凌遲顧名鄭重思前哲

朗甫先生

正學昌明彼

一時

歲暮

村坐忘昏曉年華又告終雀坐天欲雪鴉聚歲多風儉俗艱生理寒威栗病翁虛樽方倒臥寥寂意誰同

磬生書來寄眎悼亡七律三十首幽抑纏綿不堪卒讀矣

愴然賦此

傳詩隻雁度荒薄發讀都成變徵音地老天荒沈玉恨

君二子皆美才

相繼以逝酒闌香散裂絃吟漂搖自警中宵夢危苦難爲獨立心含

意寄君無別語略同青主勸亭林

沈玉見王勃喪子詩

除夕病中作

屠蘇不飲已頽然清坐深宵百慮蠲
又是一年扶病過此身已算荷天憐

老婦賢明弱女聰藉渠聊復慰衰慵
若論來事師何法一日僧撞一日鐘

亦思徑作打鐘僧薄有紅塵累未能留
取佛前三載約雙修夫婦一龕燈

年年肴脯祭新詩循例杯盤病廢之
政要懺摩文字盡一泓清

水觀心時

觀去聲

季子鰥居拂惻深一觴呼與酒同斟迴燈瞥見影影驚動無

窮後顧心

李弟年三十六而顚髮皆白

苦念窮交兩白頭近居萃塔遠在磬生

詠裳

遙知今夕樽前淚同

灑殘燈各白愁

二君皆喪子詠裳爲校官宿遷無以爲歸計磬生有續膠之意而難其選蓋情事又不同也

元日

己丑

扶將舊病入新歲強起披衣風雪冷呼童謝客急掩關獨味梅花養肝腎

正月初四夜

夜靜風高雪壓廬沈沈悄悄意何如無端整頓孱心力紅燭雙燒讀漢書

病中詠二物

埽除几靜焚香丈室梅花作道場忽有靈臺開闢意綢繆還
我舊心光

香

一燈照影不知年老境頽唐絕可憐猛憶兒時慈母帳夢痕紅
接混沌天

燈

雪窗

最憶消寒綠蟻醅縱橫談陣玉龍摧而今舌在渾無用獨向寒
齋味雪來

春抱一首用進退格

縹緲復孤寂醉醒兼笑顰古心胎異夢春抱襲陳人鞭影垂垂

老鋤情續續生不知爲誰贈奇淚忽盈巾

悟意

莫歎形骸病長調心氣和
簡思清夢魘學道懺詩魔
名理閒中貯天倪淡處多
君看礪刀石一日一銷磨

戲言

搏土媧皇偶戲游劇場終古不能收
是非若等牛毛析多恐天公早白頭

戊午在京師乞人書屏帖八幀計名姓三十有二
今其人或達或鼎貴或貧賤以老或存或亡不一也
噫此卅餘年事而遷異已若此況倍之況數倍之有可勝言者乎

感歎作此

紙光殘駁墨痕新卅一年前卅二人獨立風廊重檢點升沈存
歿總驚神

謝日者

家人爲我問流年門外招來日者絃自省星宮談不得請君卷
舌我將眠

與妹夫陸三夜話

醯雞與桂蠹各自領酸辛我累幽憂疾君猶旅食身貧家無易
事晚節沉窮民

君亦無子

今夕燃燈坐披懷見性真

古劍一枋外母陳恭人贈物也洎今二十三年劍固無恙

而母逝久矣重拂流塵慨然有作

曾走崎嶇路四千

外舅得自粵西官所

晚留塵壁廿三年神龍一蟄甘無

用不起風雷警病眠

持贈當年厚意存風雲激我壯懷掀祗今摩拂空惆悵一種平生未報恩

病起散步後庭見叢穢中春蘭一枝嫋然作花

病起窺園景物移偶然留眼到荒籬國香誰判前因誤棘地荆天秀一枝

過題紅仙館

盈盈當檻又欹紅重照樽前白髮翁廿四年閒人換盡倚闌無

語看春風

王復葢

景曾

刑部解官有年矣去秋賦悼亡鬱鬱不快挈

其幼子女慨然赴官頃來告別并示友朋贐行之什作

短歌二章送之

凌晨叩關報有客山僮驚人整巾襪相逢大笑忽黯然曰有遠
行來告別君辭郎官將十年偕隱誓不揮征鞭閒窗對鏡看笑
靨豈顧富貴摩青天

梅都官句

百年人事忙迴掉酒醒香寒夢孤悄

激盪翻成汗漫游男兒作氣誰能料

高冠長劔紛陸離鞞馬僕從生光儀笑攜兒女入京國閭里驚
動君聊嬉曹司隨班抱公牘雖有長才苦窘束諸公貴人一輩

新露膽揚肝向誰託風雲邂逅翩高翔脫不快意仍還鄉短歌
激越送君去杜陵自謂知王郎

瓶供垂絲海棠

烘窗曉日影離離散作紅霞滿眼絲病起正當禪力怯春愁惱
亂又多時

飽齋見過口占二絕句

一回相見一回喜勝覲尋常無數人同值生年同嗜好著書同
作老經生
一回相見一回老屈指朋交逐歲稀且買新醪且酣飲呼童且
典篋中衣

金石因緣圖婦伯黃曉槎

楚湘

偕六舟僧渡江舟中評論

金石繪圖紀之今爲文孫頌玉屬題

三十年前讀此圖嵇生癖懶一詩無而今重展寒窗卷已是曩

曩一老夫

名僧詞伯久歸真金石俱消劫後痕難得抱圖來索句青衿又

見讀書孫

元遺山句

費君養莊去年曾過訪值予不家今又惠臨臥病不能出

見越數日手齊登仙酒見貽歌以報謝用東坡徐使君

分新火韻

負疴日作橐駝坐厭聽松窗藥爐火閉門不樂出更愁安有四

禪天著我

四禪天無風災

丈人辱臨兩迴轍忽擲空中雲一朵靈芝瑞

草佛洞春

甘露明珠仙掌顚飲之不老說近荒沈痼蠲除倘猶

可奚童旁立拍手笑窗戶從今不煩鎖

余自得畏風疾日日掩窗而居

莪菴過談酒次賦贈

我思不樂無可言終朝挂舌屋壁間君來有意慰孤寂半日伸

眉開笑煩我爲贅儒君倦仕挂袍都無壯年事樽前瑣語往復

深春風搖動絲蘿心

君次女與余女均踰笄未字談次頗往復及之

君今已畢長女嫁

雛郎受經聲姪蛇田園滋味澹自佳讀書煮茶娛生涯而余偃

蹇百事輸豈直齒落鬚半枯當前可意且飲酒君行又欲關其

口

燒琴行贈張忻木

王熙

同匏齋作

忻木苦燒故以名篇

龍門老桐古子遺材之為琴光鬱儀偶然出響為世知意度落
寞終違時空山坐送歲月移敗壁飽受塵霾欺其紋如甲如之
而其色非綠非純黼斑斑爛爛老松皮厯厯落落蒼苔貌雖
奇醜神不媚瑤華開出太古姿舊句琴華太古鞠通瘦天風泠然振朱絲
一彈軒轅再慮羲柔笙脆簫噤不嘶風雨獨賞神自怡近從東
海窮遨嬉海上或遇成連師琴乎琴乎得所之老矣不操歸來
辭忻木方授經上虞嘻吁嘻爾琴雖燒落落全天質更有良材爨中泣

磬生翼亭見過作三日談酒間賦此

見無多語別常思總角嬉游幾故知垂老倍珍文字飲有詩權

當甯馨兒枕中幻迹三春夢
領底蒼浪一色髭花事未闌
春酒熟百分莫放手中卮

鄉人迎社神牲酒鼓吹以獻名曰待青苗
蓋卽古者秋賽之遺意爾爲吳體一首

歲其有矣苗黍郁靈之來兮
輿馬駢廟巫唱歌作神語

巫者唱謠辭薦

神名曰贊神歌

村老張蓋收社錢
脂牲大酒氣豐盎
紅男綠女聲喧闐

病夫畏事獨不出
隔牆燒燭聽管絃

匏翁爲予處方謂近年氣體有異藥宜甘溫而不宜涼苦

戲題一絕

十年沈疾未能蠲
方藥多煩次第權
豈識衰齡心更苦
爲調甘

草撒黃連

八月初十夜焚香靜坐

銀河耿耿破昏黃
珠斗橫空露氣涼
白覺靈臺無一滓
天青月白夜燒香

寂寞

了無人跡來不聞
鳥聲起寂寞百年心
空潭養秋水

讀近人詩集

精微極處成真放

梅伯言

艱苦深時出大雄

曾文正

文正自言每作一詩文必如醉

如癡者累日

刊盡人間皮殼語
兩家異曲總同工

不雄不竒不能飛
萬變心光一種詩

龔定安

縱處較難橫處易

龔定安

有縱難
一論無因說與鐵翁知
舒立人

題空山入定圖

叢林月黑莽無垠中有禪關兀坐身猛虎在前蛇伏後看師整頓定中神

農謠

墾盡山下田防飢無粒穀雙手不霑泥穰穰飽珠粟

輓薇人從兄

家難頻仍痛播遷六年羈泊一棺旋寒瓊席帽銷中歲劫藥妖姬送暮年禮葬棺衾徵族厚
蒔庵叔及諸弟姪同任殯殮資橫流門戶覺兄賢作書爲告元方老
翼亭商略同醵治墓錢

問俗

百年桑梓最關情聞見無多已變更比屋炊煙渾日滅荒廬祇

火徹宵明

村中賣阿芙蓉者日甚

豐年尙憫兒童瘦新事都令父老驚風

運遷流到鄉曲更堪消息聽都城

卽境

霜風獵獵動蕭晨徂歲真同下坂輪

放翁句

飽看親交成故物

秀水

陶楚卿同邑蔡進之汝新孚吳梅史及余妹婿吳幼江相繼物故

強支衰病亦陳人著書未了

名山事坏戶聊藏太古春

磬生贈予詩有地天一閉冬蟲蟄坏戶中藏太古春之句私贈頭

銜誇僥倖六房長老四朝民

曾祖以下六房子居最長

紀災

淫霖卅日勢滂唐萬寶難登十月場久爲三吳憂水利洊驚五
屬困奇荒餘糧直與蛟龍競冬潦兼空薺麥望見說官家勤軫
念急籌疏瀹奠耕桑

天上醲春雨露溥振饑緩賦

詔書寬

十月望奉

特旨頒發

漕賦分別
奏請蠲緩

皇仁自卹災黎困曷吏兼籌

國計安

大府初
議剔荒

徵熟縣令皆
到鄉勘災

地有窪隆區等易事分收發並行難

業戶于成熟
田減成收租

後奉免糧明文賑局亦四出查戶
鄉人藉口逋租而業亦重困矣

凋殘不獨傷單戶幾見高堂

晏坐餐

贈綏之

冗士無功合閉關負才如此豈容閒風培積氣能噓物雲斂高

蹤不出山能與羣公恢策略直爲吾輩砭疏頑讀書養晦知深
意已挂聲名萬口閒

送周生

鄭表

爲縣令山東

倦攻帖括赴官書遠道嚴寒戒僕車祿食自娛迎養後奉母宦
途宜慎入場初立身肯爲時趨貶出手方知坐論疏見說黃流
猶未奠試籌要最讀河渠

達卿有飯禮空王之願得詩十六首見眎感而賦此

剗平憂患返歡娛開闢除非起佞盧萬念俱灰君亦病一天別
貶我何辜意中了悟金仙近夢裏親逢玉女姝鐘動雞鳴塵界
現依然身世各樊笈

歸佛謠簡達卿元簡

天穹地庫日月迭送寓生于其閒晝影夜夢
夢則非我覺還我眞覺而猶夢夢何時醒
佛曰可憐苦海無邊孰使汝擾擾以至無年
大哉佛慈如母念兒雖則孔念柰亡子之不歸
不歸何待歸抑已晚晚而知歸佛豈我違
自今以始匪朝匪夕以定汝識以堅汝願以奉持佛
佛緣旣通歡喜無窮言告我二子息壤其同

除夕

薄田冬收無顆粒冷落酒漿入年節山妻爲我典一釵
楚楚春盤作除夕飭盤有肉無鮭菜菜價高翔肉同貴
竈下風光種種

新爆竹涇薪芽穀飯

山谷詩翰林涇薪爆竹聲

艱難豈獨傷腐儒幾家晏飲

能歡呼只有高田農大樂賑錢買酒租錢肉

元日

庚寅

歲朝無事看新曆偏是饑年逢閏月三百九十來日難大霧茫

茫起頭日

邵康節詩一年又是起頭時

家人顧我顏粲然如君亦復憂飢寒

日餐不盡米兩合造物雖詭甯能慳我聞此言百憂失況有餘糧儲擔石且呼綠酒擁紅爐坐看兒曹賭梨栗

周三

景曾

以刑部郎出守蘭州瀕行有書數千言寄莪庵

并以眎予作歌送之邀莪庵同賦

卅年作宦爲曹郎抱牘日就臆驚行雖然僕僕百寮底心乃一

逞千丈強上官動色聽言事猾吏歛手難逞狂讀書讀律兩無
負但論科目猶尋常階資累積例遷轉蘭州太守新分疆少年
幽并氣激宕剖符恰遣官西涼人才地勢稱雄莽詎非冥冥工
主張昨者馳書到東國十紙發讀詞惋傷爲言除書下三月首
塗才得諏辰良交遊管鮑幸有託不然僕馬誰資裝蘭州境僻
販圖隘戶口雜襲兼戎羗居民頑嬉惰耕作地利瘠薄空儲藏
權收商稅參冗吏苦幹兵饟資丁糧興功究弊縱有志舞袖絕
短難掀揚簿書鉤校亦循例稍欲行意羣譁吮等閒袍笏送日
月公府冷落如僧房俸糈寄命二十口衣食謀急猶皇皇壯夫
坐此或慘沮況乃齒豁鬚蒼浪平時卓犖談建樹到頭疲馬愁

登場窮邊委骨未可料戲約深友爲銘章嗚呼君言何憤激未
免弱念先盈腸男兒身健事難定山谷艱苦政以開方將因風
寄語百努力我思空闊馳大荒

采芝圖

并序

采芝圖者沈子根黃悼婦彭安人作也安人在娠時其
母夢人餽芝草而生遂字采芝及是根黃復夢見一女
子風鬟霧鬢手一芝珊珊然來諦視若相識意以爲逝
者之幻身也繪圖作記邀予賦之

一莖仙草何人種幻出情天兩奇夢仙姥瑤笙跨鶴歸哀絃獨
弔留孤鳳多生影事何分明萬劫不鏟苗條情祇愁密寫嫋嫋

記又識他生未了因

褚平巖以少尉乞歸書來述況賦此贈之

褚侯少年性通脫散盡千金身作客捉入官中爲貧役

捉將官裏去楊

誠齋

卑司行意苦未能安得日伺人喜暝回帆急流收我身分

千盈盈舊月色無田可耕歸亦得嗚呼仕路今愈塞

以詩代柬答贈李明經

我泉

書來多君慰飢渴卻怪書辭太唐突自言婚嫁累正長翻羨閒
身少瓜葛人生孰見當前緣山僧思家客愛禪笑公有睡不自
睹令我欲辨渾忘言

四月十八日磬生翼亭元簡同過作三日談喜賦

造物尙留窮叟在荒江又見故人來一年離合無窮事百歲光陰有限杯身弱身強同兀傲鬚蒼鬚黑漫驚猜忘憂久學莊生達行樂何妨曼倩談

少年各有凌雲氣睥睨天門誅蕩開只信樽桑有東出爭知滄海不西回蹉跎志業甯非命點綴山林尙要才但祝年年人老健插花霜鬢醉深醅

別後再作一首以紀此會之樂調磬叟以挑和章也

瘦諸首入座冷語發逋峭黝陳繼乃至硬語自排界性情無鑿柄意趣分靜躁譬如南北曲合奏成各調最後髯凌來一婢揜二妙或莊或嫵媚忽寂忽叫嘯紛翻天女花炯握空王照突然

肆談諧無語不絕倒
粹官與盲詞一一工
摹剽人閒老技師口
頰無此肖遂令滿屋中
騰聲惟有笑陳爲頭風
痊諸爲肺疾療
翼亭數日前患頭痛
寒熱元簡方病咳
而余困幽憂豁若開九
竅倘今日日偕白
髮定還少歸船惜恩恩
梁音猶繚繞

懷一翁三友

何上舍丈

長治

談空說妙無不有
東方先生漆園叟
少年愛事喜公來
疾捲詩書爲行酒
咸豐初丈行醫禾中月必兩過
此與先君子飲酒談笑爲樂
滄桑一別卅載餘
公

老我病天各隅
昨宵夢中騎蝶去
狂醉笑捋虬髯
鬚鬚自號髯鴻

人呼

三鬚

必大令 虔

昔年君客中州幕附語星輶問巖谷 甲戌君在河南中丞幕適芸舫視學中州詢鄙人消

息甚切發書天末莽低徊髮髯重聆海濤曲 君善琴戊午在京師於式如座中聽鼓天

風海濤曲風塵浩蕩知音難抱琴又向何門彈不然家聲繼單父此

琴未定藏深山

張大令 鳴珂

鯉書來自江之西中有一卷冰雪詞 客夏書來言宦況甚貧寄贈新梓寒松閣詞說文佚

字攷大箸二種宰官風雅有如此無怪刻骨貧難醫知君骨相不宜肉

母老家貧需薄祿一輩侏儒已飽颺可知尚有饑臣朔

錢觀察 寶傳

八年一臥滄江病聞道故人官二品

以觀察加二品銜

公輶兩下吳江

城十萬官錢散荒賑

去冬今春君兩主江震賑務

東風占便飛書來約我九

月蓬門開紫鬚湖蟹酒三白力貧尚可謀深酌

君昔來此最嗜分湖蟹及蘆墟

三白酒後相見必誇道二味今來書約秋閒過訪

三先生詩

陳子松壽熊沈南一曰富董夢蘭兆熊

三先生名在道咸閒文章行誼爲吾郡魁傑以蕃少時

嘗親接其言論丰采今則亡矣追憶顯顯綜爲是詩覽

者有以想見之其文行有誌乘紀載不復及云

子松先生風格幽屹若子雲長宛邱著書兀坐工冥搜客來問字聲軋酬一生不識世法稠六鑿化盡心天游南一先生德量

優道學不腐真風流廓然道廣陳太邱旁趣溢出方朔周裏糧
出邀客至留卒歲例典蒙茸裘此先生自語夢蘭先生天機適讀書
垢面不櫛頭坐穴一榻羣籍油出門咫尺步從人詎目短不識歔
歔羞古人古人口未休

前詩既成再作一首追懷陳沈二先生感知己亦自疚也

憶昔鯁生年二十才輩首交陳古弼甫申偶吟壯句播人口詞林

丈人爲動色贈申甫有酒人多涕淚游子總飢寒二語爲陳先生擊賞者闐然訪我彝聽樓

黎里邱氏四座少年爭掉頭夙聞阮公眼常白半日爲我橫青眸相

期相錯詞磊砢口則諾之心暗左俗學牽人不自由浮名驅我

真無那泊年廿四將入京掉舟一謁南翁行贈詩七章命酒食

謬以國士知狂生

贈詩有非我好刺刺國士不易逢之句

別來書到長安再語重

心長生感歎功名邂逅望青史不爾名山終汝待行藏孰料皆
蹉跎歲華半百風狂過強思末光收炳燭痛念耆宿淪山阿此
生朽落何足齒前輩虛懷顧如此願移一片愛才心坐待寄崓
後來士

病起作

經歲埋蹤不出村
匝旬堅臥不開門
早枯未死花留蒂
晚學重收葉返根
一室靜分僧境界
數編冷對古精魂
卻嫌小鳥猶多事
強管陰晴聒耳喧

偶眺

食古齋詩金卷四
偶縱村墟目幽懷不可攄林荒多怪鳥泉濁少嘉魚卽境誰堪
憩忘機且儘渠乾坤吾自有掩戶讀奇書

飲酒歌

一杯二杯潤喉頰三四五杯發顏色爛然忽作滿面姿變化老
子爲嬰兒須臾酒力退如洗又轉嬰兒成老子天生神物亦弄
人不如止水鑒井留吾真

天生至神物遺
山飲酒詩句

心地

心地大功收汗馬眼天遙致送歸鴻此中採取真消息寂寞荒
江一病翁

題泮湖詩文集

高枕君山挹眾靈著書深入古門庭故人大半圖麟去獨向寒

窗老一經

曾左羅彭諸公皆厚交

文字宗傳溯皖姚相公名論詎能桃如何誤引西江例公案平

翻不肯銷

論文不服宗派二字詆姚姬傳氏爲呂居仁之比未免失當

病況

未有佳眠食渾非舊起居羸形枯幹似兀坐偶人如遣興無新
事論交剩故書世情諳已熟不用彊親疏

負疴兩月而以事相別甥者無虛日殆非所堪然亦弗能

卻也漫成二十八字

病中世故莽相仍才了還生苦厭憎眼見熙熙人一輩始知有

味是無能

自題詩卷

雕琢肝腸銳性靈萬言在紙血猶腥
多生楚客工愁怨後日中郎孰典刑
苦設祭筵償島瘦鎮思埋冢學劉銘
百年姓氏真留得也似秋皋點一螢

感事

儒冠失職聊方技閨女逃空半梵門
世界如前風會變軒轅彌勒笑無言

中秋

溶溶月色任當頭清坐深宵萬慮收
香火一房經一縛

縛義同卷兩

年如此過中秋

笙歌畫舫昔游曾老病隨緣謝未能太息歲荒民疫後風光猶說楔湖燈

懷人二首

陸明經

巨鴻

古貌清風老蹇翁寢餐行坐一樓中自將道氣扶衰劣不借禪
譚破苦空舉案幸能留德曜拜牀誰更肅龐公平生風義吾心
折何況馮劉事半同

姊夫梅明經

兆魁

不入人閒醉夢場閉門歲月自羲皇七孫四子戶庭壯百役一

食古齋詩金 卷四
身筋骨強陰德好行囊屢破農田親力飯尤香科頭晏起吾今
慣安得從君策惰荒

聞匏齋病愈喜賦

與君交久無如我並到頭童白領髭偶記姚姬傳先生贈王禹卿詩二語借用一病

關情非偶爾百年有事尙相期夜燈著草君平卜杯水楊枝耆

域師謂元吉兩度報書傳古語令子吉修兩書告慰不禁黃色滿雙眉

九月二十五日磬生翼亭元吉達卿同過酒閒書贈末章

並懷礪生上海望雲吳江芸舫綏之蘇州辛垞蒙叔盛

澤

萬元千搖裏天猶活此翁時情已冰炭勝友復雲龍用意崎嶇

外杜論交灑落中百年幾歡會莫放此深鍾用進退格

兩君年輩等磬生翼亭壯氣足開予身健酣行樂才多猛著書人非

科目重交自叩童初予與二君於鹿城童試時爲相識之始垂老情彌戀殷勤攬

珮琚

奇才不世出二子元嶙峋元吉達卿時命紛爲祟文章各有神誰收

天下士並老眼中人無力相推挽長歌解鬱湮

亦有同袍子迢迢江海隈才名俱老大天意此低徊皦日心猶

在頽波世不回鎮流須砥柱已矣散樗材

叟言

有鄰者叟知爲誰向我乞藥來披帷我方校課時方闕切問徹書院課卷

授藥而叟不去旁瞧窺睢盱既久出語眾拙哉此老將何爲齒
牙落盡頭白禿病骨一束如枯柴提持寸管踞方案手作空勢
如摹追之乎者也口不絕意注一冊旁纍纍不知自爲抑誰爲
竟作此態忘其衰吾儕半世服田畝出入惟有鉏犁隨但勤筋
力報一飽四體雖困神無虧豈知文字有許苦直以身命供毛
雖不能自養反自寇政恐有害無補裨一叟聞之入相告掩卷
愕聽心黯悲行年六十病環繞顧不自惜蒙人規徑思投書謝
公等婢報明日晨無炊

唐立軒司馬

起鵠

秋窗學畫圖已燬於兵火令子指摹倩

陶松石翁重繪乞題

江山偶逢龍漢劫畫圖亦埽鴻泥跡一紙能生今昔悲人閒何
事堪追憶當年題墨曾留名瞥如春夢消無痕酒酣恍讀新
畫絹素漠漠春煙生背煙酹起圖中魂

畫史風流不可再令子才華亦珠貝名筆徵題十數家耆舊寥

寥及吾輩摩挲愴動人琴情侍郎宿草盈墓門譜經殷丈匏翁松丈

近皆化開函手墨驚如新吾詩長笛同悽聲

商歌行懷周三蘭州

九月十月天雨霜繁蜚落木鳴清商閉門慙慙戰虛警心氣孱
薄多感傷思君擁麾臨古羌笳鼓肅厲草木荒蒼然老氣自岷
強熱血不共冰天涼豈如孤士感搖落一髮化白干徬徨噫吁

喜男兒在世能慨慷并州何必非故鄉

壬辰夏六月棹往大港問柳君韜廬病時距其卒纔一月然君雖憊猶留予款語久之以詩彙見屬攜歸檢校苦其旁行側注篇次叢雜以示謝君綏之則大喜因與予謀所以壽世者遂分屬張君魯孫方君靜之張君桓伯端錄排比凡閱兩月而成帙蓋謝君慕君之爲人也久於其詩文又往往神契復屬凌君莘廬刪存編定亦君之志也嗚呼使天下後世盡如謝君之所以愛君重君則君之詩必傳無疑君不遇於一時而遇於千古此豈非冥冥中有以位置君者君雖死可以無憾況如君之作正歐公所云斯文金玉也精氣光怪不能銷蝕卽不遇謝君猶傳乃卒克於生死絕續之交而釐之而成之則第目謝君爲地上

食言金
之子雲也抑又淺矣其醵金付梓者錢君君硯李君詠裳顧君
剛甫及君之從姪寅伯也刊成予爲書其後如此光緒癸巳春
三月費延釐謹跋

我翁刻弢廬集竟自爲之跋不一月遽歸道山周君式如自
蘭州任所郵致刻貲我翁不及見矣謝家福埏識

子屏余聞其才名已兩載而未獲見頃始枉存詢知卽將入都
把酒黯然用少陵句忽漫相逢是別筵爲韻賦詩贈之柳生入
我座神清秀在骨旣來不肯留鞍馬去忽忽問君去長安就
冰抑就炭豈無叟稱迂亦有郎號漫迂叟功在宋漫郎功在
唐並世有捷足徒具金玉相科第君自有旣得將孰從非我
好刺刺國士不易逢顯揚亦多術豈盡出青紫世事無皆非
君心定一是淵路相贈處千里仍合轍蒙君不鄙夷老夫一
言別有得幸見語道在勿以年頽然醉君側盍誦賓初筵
戊午正月十日愚翁沈曰富作

情深似海心細於髮蘊茲靈襟吐爲妙文石帚玉田將有嗣響

自書詩言
寶洲浮麋豈得專美然一此弗懈則百事俱廢與其在阿堵傳
神何如向大處落墨以故人爭津津僕獨落落正由愛之實摯
未免論之轉苛耳曰富

右沈沃之先生題子屏詞藁兩則子屏年二十許工填詞咸
豐戊午正月謁先生將應京兆試先生以詩贈行復爲論詞
學得失旣別去抵都先生郵書相勸者再六月先生訃聞於
殷譜經侍郎侍郎與先生交密時爲大理卿於同鄉應舉中
器子屏又習知其器於先生也相約會哭於是侍郎哭以詩
子屏亦哭以詩而子屏遂不復倚聲矣昔姚惜抱氏自言少
嘗爲詞一日嘉定王鳳喈語休甯戴東原曰吾向畏姬傳今

不畏之矣東原曰何耶鳳喈曰彼好多能見人一長輒思效之夫專力則精雜學則粗故不足畏也東原以見告余悚其言多所捨棄詞其一也沈先生學宗姚氏而其論詞更有會於程子玩物喪志之旨視王光祿之言抑又進焉烏虜先生與子屏僅一見耳先生惓惓愛才守先待後之心子屏服善之誠進德之勇且歷生死而不渝卒其所成就不負先生期許今日師弟友朋閒甯復有是哉余編子屏遺藁用惜抱軒集例存詞若干闕以沈先生題詞弁其首旣見前輩用心並使鄉里後進知子屏少日清才亦不廢江河萬古流也壬辰十二月凌泗跋

十一

此方治諸虛百損，氣血兩虧，精神萎靡，四肢無力，心跳怔忡，頭暈目眩，腰酸背痛，遺精滑泄，月經不調，赤白帶下，產後虛弱，一切虛損之症，服之立見奇效。此方乃金匱要略中之名方，名曰八寶丹。其藥材包括：人參、白朮、黃芪、熟地、山藥、茯苓、白芍、甘草、大補元氣、滋陰補腎、養血安神、健脾開胃、化痰止咳、平肝理氣、活血通絡、祛風除濕、強筋壯骨、益氣養血、寧神益智、延年益壽、百病皆除。此方乃金匱要略中之名方，名曰八寶丹。其藥材包括：人參、白朮、黃芪、熟地、山藥、茯苓、白芍、甘草、大補元氣、滋陰補腎、養血安神、健脾開胃、化痰止咳、平肝理氣、活血通絡、祛風除濕、強筋壯骨、益氣養血、寧神益智、延年益壽、百病皆除。

食古齋詩餘

吳江柳以蕃 价人

喝火令

繡戶簾衣薄。歌樓鏡檻斜。東風留住小楊花。輪與紅襟燕子香。
夢鎖伊家。愁翠低眉岫。嬌朱暈臉霞。春三豆蔻好年華。可奈
芳蹤漂泊已天涯。可奈滿腔幽恨只自寄琵琶。

菩薩蠻

海棠

嫣然獨倚東風笑。臉痕醉暈朝霞小。鬟不勝斜玉。人真睡耶。
繡簾春似夢。銀蠟燒雙鳳。抱影宿深枝。輸他胡蝶兒。

又

茉莉

晚風吹淨庭陰暑一簾珠影跳疏雨通體雪肌膚嫩涼禁受無
芳心開尙怯已被春纖掐情味泥昏黃露華雙鬢香

又

芋

禾疇瓜堰分區種濃陰大葉高荷共最好野扉開隔溪聽雨來
年年秋色莫園栗同收取一笑且然糠夜闌人語長

又

楊梅

紫囊豔帶霞紋蹙玉肌
西京暈皴紅粟風味試評量何如十八孃
堆盤珠顆顆一捻猩痕破生怕觸冰綃淚花凝不消

又

枇杷

幾番雨滴霉天小
著枝催得蜂黃飽
酒渴最相思玉纖剛送時
雪花晴滿戶橋畔曾游處
彈指蠟成丸寸書誰替傳

又

石榴

錦囊乍破湘紋裂一窠紅露團珠骨
著齒耐冰寒蕭孃正嗜酸
春風花醋醋顏色猩裙妒回首換時光
離離子滿房

又

水紅菱

一繩界破煙痕瘦
吳娃蕩槳來溪口
愁然鏡奩花秋風又奈他
誰家簾卷處
雪盃供消暑
纖手褪紅裳
風情話嫩涼

又

蓮子

紅衣褪盡西風老
綠房漸見珍珠飽
采采近涼天一雙人可憐
相蓮相惹處
誰解同心苦
但得解同心
何嫌味苦深

金縷曲

春暮

誰作春光暮漸惜惜搖晴弄暝滿湖香絮癡絕梁閒雙雙燕猶
在碧紗窗語似埋怨東風何苦吹散繁英仍不管趁夕陽紅到
銷魂處斷送也向何所倚闌幾徧渾無緒又聲聲子規唬老
十分淒楚便倩游絲齊著力難挽一宵春住問何不將愁共去
殘墨半泓箋百番教斷腸刻盡新詩句雙鬢影瘦如許

又

題陶芭生十願窩詞稿

脂粉天然洗裊迴腸瓊思一縷蟠天際地綰盡古今風月恨斷
送中年去矣情至者大都如此十載旗亭傳雅唱畫銀釵尙有
雙鬢記齊擊節喚才子人間我亦傷心史慣纏綿紅箋寫恨

錦絃彈淚天與豔情無豔福暗老絮萍身世更莫問知音剩幾

黃韻宋花飄零張黃李重遠悵瓊簫誰共花間倚只此筆尙如

綺

沁園春

指

誰削葱根羅袖揎來玲瓏露尖笑鏤金驅約情緣不解連環結
綰愁緒慵拈調粉勻妝抽豪寫黛鏡裏分明見玉纖支頤好有
香痕一捻紅印顰添握來真箇摻摻似乍放楊枝軟不嫌記
新聲細拍替將綽板遙情待寄封上泥鈐背數星期暗彈珠淚
心共螺紋屈曲緘紗窗底愛錦鴛雙繡噤住春嚴

又

腰

一捻纖纖疑是束成伶嫖者般向恁時繫也玉環未解幾分瘦
了珠襍潛寬戀睡微伸因嬌或彈無力支持頗自難含情處想
新來歡喜偏向人瞞步時搖佩珊珊約百蝶仙裙態更妍記
掌中迴舞輕身比燕尊前一搦小字呼蠻軟欲歌花柔疑擺柳
抱月飄煙想像間風姿悄助全身嫵嬾不數肥環

又

蠟淚

淚眼無端想是平生最憐別離向畫筵長遞暗愁天曙銀屏斜

背幕替人垂滅迹先拚灰心未肯也爲柔情一味癡多應是帶
蟲蟻舊恨來試紅唬高樓人正相思慣照見黃昏擁髻時想
粉妝唬破一般明滅榴裙溼透無限淒迷點點行行重重疊疊
相向心心心上知臨將炮怕風前狼藉紗急籠伊

摸魚子

銀魚

正東風楊花吹斷碧濛濛入溪漲橈頭幾葉船撐出寸寸雪鱗
迎浪榔乍響襯細雨零花淩亂黏絲網蘆汀荻港趁村店新荔
柁樓晚飯鮮價賣應長幽棲好十里鷗波無恙年年夢熟
槳烟邊雨後閒滋味時有釣師分餉充箸想付摻手厨孃一

晶鹽見酒人三兩待菽乳同烹芹芽細和相約醉春釀

又

詠裳邀同錐菴夢粟子方葵卿集蘆雨厂酒酣賦此
卽贈厂主楊利叔

問何人風簾水檻吟廬小築三四此來可惜秋容晚溪上荻花
殘矣窗洞啟只一角紅闌占斷全湖勢塵襟盡洗有繞榻嵐光
浮杯帆影留我座中醉煙波好隨分莼絲菰米爲佳
棄黃皮袴褶從軍樂何似綠蓑閒理君倦未算蟹斲
成歸計扁舟待檣便酒榼三升詩瓢一笠分領畫中

柳稍青

雨淨溪沙扁舟晚繫淺水蘆花澹澹風燈疏疏驛樹人
客程鄉夢偏賒酒醒處殘楊亂雅半枕疏星一篷

天涯

如夢令

窗外兔華移過窗內淒清惟我酒醒一燈涼又是離懷無那孤
坐孤坐生受黃昏幾箇

又

脈脈深深情意冷冷清清滋味蛩語又些些攪得五更愁碎無
寐無寐紅蠟替飄秋淚

聲聲慢

梅花士女畫幅

深梢雪霽曲徑香浮黃昏庭院誰家羅襪何人瘦影冷立如花
高枝月明霜峭恁禁他出手檐牙縞衣薄又宵深幔卷可太寒
些 恰訝仙遊夢裏看姍姍是否挂上雅義約畧當時日暮空
谷逢他幾番畫圖癡認認翩翩彈袖來耶渾誤了恰微風敲響
茜紗

賣花聲

贈內

小雨夜悵悵繡戶寒侵惱人眠不是重衾最是病難
薄春陰 香令鴟鑪金簾幙沈沈海棠誰護一叢深

JUL 03 2001

闌幾曲曲愁心

水龍吟

古劍

老龍何處飛來虛堂一匝眠秋水寒芒黯腥花雲
此大俠風塵老仙湖海故交都死想生平恩怨許多
泣明珠淚慚媿尊前拂拭鬱書生壯心未試爨桐室裏薜荔
壁上十年磨爾霜月橫空星雞動野暮愁無際問何時攜向天
涯塞北逞男兒志

